

MINE BEEN ZHA NE PXEEL JESÚS BNEE XTIIDZ ME

¡Diuzh Tiofl!

¹ ¿Yose luu dien bets? Naa gon nac Luc, laa naa rxel stib guits rii lo luu. Mine pxel naa lo luu glo ga, lo co pquia naa grëse mine been Jesús, grëse wseed ne blu me lo miech zeene psilo me xtsiin me ² haxta gol dze ne psan me diidz pe nac ncuane gun grë zha ne bzooblo me tsie tsienee Xtiidz me. Espíritu Sant bdeed guielbiini lo zho bien zho zha racladz me; lëe dze co ga zey me gbaa.

³ Nli psacsi miech me, beet zho me, per brieegan me. Ni par glu ganle ne nli brieegan me, dipse len choo ngbidz brieequia me lo grë zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

⁴ Tib vuelt ndxie zho grë zho me, dzigo pso me diidz lo zho ible grieed zho lad guiedz Jerusalén, haxta guiet Espíritu Sant gdeed guielbiini lo zho zigne nacle xtiidz Pxoz me; ni biire rëb me lo zho:

⁵ —Golsoladz ganle laa naa nile lo to: nli laa Juan pchoobnis, per niab nisa; sangue to zgaa to guielbiini ne gneedz Espíritu Sant, rrieequia Espíritu co chobnis to; ni zhile gdziñ dze ne laa min co gac.

⁶ Len ngbidz ne sca nolulo me lo zho, tib vuelt bnabdiidz zho lo me, rëb zho:

—Ndion̄ no men̄ rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma?

⁷ Dzigo pquiab me rëb me lo zho:

—Dios, men̄ ne nac Pxoꝝ naa, ncuaane gun̄ me rieguialde to gacnan̄ tow, mese nan̄ dien̄ pa dzew, dien̄ pa horgaaw; sac mese nac men̄ ne grieelo guna. ⁸ Sinqe to, zeene laa Espíritu Sant gneedz guielbiini lo to, hor co laa to ygaa poder ne rap me, laa to csilo gnee lo grë zha Jerusalén cho nac naa; tsie to dib xtan zha Judé, dib xtan zha Samar, ni lo grëragaa miech, tsienee tow.

⁹ Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me biongueetsse len̄ xcow co, gon̄draa zho me. ¹⁰ Laa zho bii quiawique zhan gbaa zaatne gon̄ zho biongueets me ga, tibaque zeene bdziñ chop mgui zaatne zo zho ga, dib nquitsbiese rna xab grop mgui co; ¹¹ rëb me lo zho:

—¿Pe nacne squitaa quiawi to zhan gbaa? Zigne gon̄ to i nagon̄ zey me gbaa niina, squique guiet me gbaa gal̄ dze ne laa me guiaad stib.

¹² Blozh ga dzigo laa zho wbi guic gui co (lëë Gui Oliv ga). Zhisaque bzë zho laa zho bdziñle Jerusalén, lalse ne rzë zho dze ne rdziiladz zho lo dziin. ¹³ Bdziñ zho zaatne rbëz zho, bieꝝ zho len̄ yu ne riaan̄ glaa; sac len̄ yu glaa co ga no zho. Ga rbëz Pedr, rbëz Ndrés, Jacob, Juan, Lip, Mazh, Bartol, Matew, ni Jacob ne nac xingan Alfé; Simón Zelot, ni Judas men̄lidz Jacob. ¹⁴ Grëse zho tibaque rcaalsa zho rzodiidznie zho Dios grë zho

zha bets Jesús, xniaa me Marí, ni grëraa meñ wnaa ne nacgrë zho.

Bzo zha ne guñ dziin ne psaan Judas

¹⁵ Tib dze pcaalsa maase tib gayoo gañ zho, dzigo guso Pedr bnee me lo zho, rëb me:

¹⁶ —Grëse to bets, grëse to bzian, golgacnañ ganle, miñe been Judas zeene sca güeyto me Jesús, nole ne sca gaca. Lo Xtiidz Dios zhobneew, lëe miñ co pquiaa rey David zeene psiaab Espíritu Santa guic me. ¹⁷ Ye Judas gocgza no, ye me nac diidz niun dziin ne nodziuuñ no niina.

¹⁸ 'Ni nligaa laa ne niun me dziin co, leñ been me guieñtseeb pto me Jesús, ni blozh ga lëëque lo liu ne bziuu dimi ne bdiizh zho me ga, ga güeytsobe me bzob guic me lo liu, wbilgazh me, nëzrii nëzrec bliaal len me. ¹⁹ Miñ co nacne zeene laa grë zha Jerusalén gocnaña, dzigo bleelë zho liu co “Liu Ren”.

²⁰ 'Zigne rneque naa ga —rëb Pedr—, ible lo Xtiidz Dios sca zhobnee; ni lëe miñ co ga raquiet zaatne znu rnee:

Ible ziaandets lidz zho,

ni stib choot gbandraa zaatne bio zho.

Ni rneequew:

Zhaale zha ne guiaañnie dziin ne no niun zho.

²¹⁻²² 'Miñ co nagon, ible nonguiela so tib zha ne guiaan xlugar Judas, gacgza zho no guioxobnen no ne nli brieaban Jesús. Nana sca, lo grë zha ne nacgrë no psilo bzianie no me zeene pchoobnis Juan me, haxta gol dze ne laa me zey gbaa, lad co golgotsaa cue ne tib zha ne so gacgza no.

²³ Dzigo ble zho tib meñ ne lë José Barsabás (lëëque me ga rnee zho Just), ni stib meñ ne lë Matí.

²⁴ Blozh ga, bnab zho lo Dios, rëb zho:

—Dios, ndion no luu nac meñ ne rnabey no; ndion no luuse nac meñ ne runbey zdoo tib tib miech, gane niina laa no rnab lo luu, luu blu dien cho tib zha rii racladz luu so ²⁵ gun dziin ne psaan Judas; sac laa Judas zeyle zaatne rieguial Judas.

²⁶ Blozhse bnab zho lo Dios, laa grop zha co bio rif. Nacne briequia meñ ne lë Matí ga, dzigo dze cotaa laa me gogza stsiiptib zha poxtl co.

2

Biaad Espíritu Sant

¹ Zeene goc gadz zhmal gut Jesús, lëëtaque dze co run grë zha Israel lni ne rnee zho Pentecostés. Dze co grëse zha ne no xnëz Jesús, laa zho pcaalsa.

² Laa zho ndxie grë zho, tibaque zeene bio tib bi nroob zhan gbaa, zig nac zeene rriee tib medox, haxta len yu ne ndxie zho ga pquiab; ³ ni briequia nzian biini, rluw zig nac ludz miech, tibga tibga biini co blëz guic zho grëse zho. ⁴ Horco grëse zho pcaania guielbiini ne bdeed Espíritu Sant, psilo zho rnee zho grë xtiidz stib miech mine rsiaabtaa me guic zho.

⁵ Len dze co nziandoo grë zha Israel ne no stib ladz ben bdziñ Jerusalén, grë zha ne bii zienał xley Dios. ⁶ Laa zeene bio bi co, ye zho no lad grë miech guizhiu ne bdopbe zaatne zob yu co; tib tib zho zeene bin zho laa grë zha ne pcaania guielbiini co nonee xtiidz zho, per nli rzee zdoo zho. ⁷⁻⁸ Rlozhd gwi zho rnee zho:

—¡Pe nli diidz rii! ¿Zha rrieelo rnee grë zha qui xtiidz ne, ni led zha Galilé nac zho? ¡Tib tib

ne ndxie ne nu, zhaase zhaase diidz ne rnee ne!
⁹⁻¹⁰ Nu ndxie grē men Part, men Media, men Elam,
 men Mesopotam, men Judé, men Capadós, men
 Pont, men Asia, men Frij, men Panfil, men Egipt,
 haxta grē men ne ziaad nēz África, delant guiedz
 Ciren; grē men Cret, men Arab, grē zha Israel ne
 ziaad nēz Roma, grē men Roma, zha ne zienal
 zhiwseed zha Israel.

¹¹ 'Pe zhidaa ne —rnee zho—, ni diidz ne
 rneepaa ne tib tib ne laa ne nodzion rnee zha qui
 grētaa milagr nroob ne run Dios.

¹² Grēse zho per nli rzee zdoo zho, rdzieldraa
 zho zha gun zho, rnabdiidzlsa zho rnee zho:

—¿Bay pe i? ¡Ncuanea gard dzian ne!

¹³ Laa nogaa zho rzhidznie, rnee zho:

—Rzudz grē zha qui, gane squi rzē xtiidz zho.

Bdeed Pedr tib lban

¹⁴ Dzigo bzoli Pedr gza me stsiiptib zha ne nac
 poxtl ga, psilo me nguiedz bnee me lo grē miech
 ne ndxie ga, rēb me lo zho:

—Grēse to, zigtaa zha Jerusaléna, zigtagaa zha
 ne blanso Jerusalén nuw, golgona ganle. ¹⁵ No bla
 to quianee rēb to rzuudz no, per led rzuuzd no.
 Griinpaale name blan ngbidz, niicle niaca zha ne
 riepaa nziu, niacxe goon nale laa zho gzudz. ¹⁶ Led
 rzuuzd no, sinque niina nagon noyac grē mine
 bzeet Joel padzeela (tib men ne biadteed xtiidz
 Dios), zeene znu rēb me:

¹⁷ Znu rnee Dios:

Zeene wzhile runfalt gal dze co, laa naa cxel
 zhiEspíritu naa zdoo grēse miech;
 grē xingan zhow, grē xindzoo zhow, laa zho cteed
 xtidz naa,

grë zha nguieg, nzian grë ncuaane glulo lo zho,
grë mengol, nzian grë ncuaane glu mcaal lo me.

¹⁸ Leñ dze co,

grëse zha ne nguzobdiidz lo naa,
niicle mguiw, niicle wnaaw laa naa cxel
zhiEspíritu naa zdoo zho,
dzigo grëse zho cteed xtidz naa.

¹⁹ Nzian grë ncuaane gzee zdoo to glu naa zhan
gbaa,

scaque lo guidzliu, zañ to ren, zañ to bel, zañ to grë
goxdoo.

²⁰ Zeene zhile gdziñ dze ne guiaad meñ ne rnabey
ne,

laa lo ngbidz ycow, laa mëë gna nizhnie zig rna
ren.

Dze ne guiaad me ga,

dze co gac tib dze ne mazdraa nroob, tib dze ne
mazdraa ndzon.

²¹ Grëse zha ne dib zdoo gnab lo Dios yquia zdoo
me zho,

grëse zha co scaania me zho.

²² ;Grëse to, goiquiaadiaga sca ganle! Led nanwen
to ganle Dios pxeel Jesús, meñ Nazaret ne biaad
lo guidzliu rii, Dios bnabey been me grë milagr
nroob, been me grë ncuaane bzee zdoo to; ga blu
ganle ne nli Dios nacie me. ²³ Laa zeene laa Dios
bdeed diidz biab me ladznia to (sac ible xtiidzle
Dios naca, nanle me zha nac ne sca ted Jesús), laa to
bnaaz me, bzobdoo to me, bnabey to gut me. Led
to goñ bloo me ladznia grë zha ntseeb ne sca psaci
me pquiaa zho me lo cruz. ²⁴ Per bleeban Dios me,
psilaa Dios me ladznia guielgut; sac lëbd guielgut
ne lëew gnabey lo me.

²⁵ Zeene bzeet David Jesús, znu rëb me:
 Men ne rnabey naa, ran naa tibaque quianap me
 naa;
 tibaque zo me cue naa nëz derech, ¿pe nac nadien
 ne lega pe gac naa?

²⁶ Gacxe waa, nley no zdoonaa,
 niicle ludz naaw, rleya roolnie naa me.
 Ni gane tibliladz rac naa;

²⁷ sac nan naa niicle guet naa,
 ib csaand me guiaan naa len baa,
 ib gdeete me diidz xin xpëel naa.

Naa nac tib ngundziin lo me, ni rleynie me naa.

²⁸ Me blu lo naa zha grieelo ygaa naa guielmban,
 ni tib guielbley nroob ne ygaa naa zeene laa naa
 gdziin lo me.

²⁹ Bets, bzian, to ne nac to menladz naa, golgona
 ganle: led mine bdete pxozgol ne David bnee me
 nu; sac gon, zeene gut me güey zho güeyqueets
 zho me, ni haxta lo nadze laa xpaa me bii niaa.

³⁰ Sinque mine bded Jesús ga bzeet me, sac gon tib
 zha ne biadteed xtiidz Dios goc me. Gocnanle me
 ne lo xtii me grieequia Men ne nacle diidz ga cxeel
 Dios, ni men co sob gnabey zigne bnabey me; sac
 scale rëb Dios lo me, ni haxta bzeet Dios lë Dios
 parne glu ne yquidied me. ³¹ Dzigo zig nac zeene
 ranle me grëtaa mine ted Jesús, nacne bzeet me
 ne ib zrieeban Jesús, rëb me guiaan xcuerp Jesús
 zaatne rbëz grëraa men gut, niicle xindgaaw.

³² Jesús ga gon bzeet me, sac zig nac Jesús grop lo
 no bdion no bleeban Dios me, ³³ ni niina gbaa zob
 me cue Dios nëz derech, sac me nac men rnabey.
 Ni zigne nacle xtiidz Dios men ne nac Pxoz me,
 laa me pxeel Espiritu Sant lo no; ni niina grëse

ncuaane noyan tow, grëse ncuaane noyongaa tow, xtsiin Espíritu Santow. ³⁴ Laa naa rbire rne lo to stib ganle, led mine bdeté David ga bzeet David; sac gon, zeene gut David güeysobd David gbaa. Davitaque goc zha ne znu rëb:

Rëb Dios lo men ndzon ne rnabey naa:

“Cue naa nëz derech, nu bzob,

³⁵ nieeda lozh gnaz naa grëse zha ne rlëe lo luu, csa naa zho ladznia luu.”

³⁶ ‘Grëse to men wladz, golgona sca ganle: Jesús gon, men ne pquiaa to lo cruz ga, lëe men co nac men ne rnabey. Dios bzo me, ni Dios pxeel me biaad me lo guidzliu.

³⁷ Zeene bin grë miech ne ndxie ga sca bnee Pedr, biab guielnë zho, psilo zho rnabdiidz zho lo Pedr ni lo grëraa zha ne nacgza Pedr ga, rëb zho:

—Bets, nana, ¿pe nac ncuaane dziuun no?

³⁸ Dzigo rëb Pedr lo zho:

—Tib tib to, golsaan xquielntseeb to, golbig lo Dios, ni none chobnis to zeena guiaanmbe to lo xtol to; scagaa ible sxeel Dios Espíritu Sant gacnie to. ³⁹ Sac psanle Jesús diidz ne ible sxeel me Espíritu Sant gacnie grëse zha ne cuedz me sëeb xnëz me; zigtaa tow, zigtaa xpëed tow, zigtagaa grëraa menzita.

⁴⁰ Nzianraa grë ncuaane bzodiidz Pedr lo zho, ni pso me diidz lo zho csaan zho grëtaa guielntseeb ne run miech lo guidzliu rii. ⁴¹ Lo grë zha ne bzoobdiag grë mine pseed me zho dze co, rga zho maase tson mil; blozh ga, grëse zho brobnis, laa zho gocgrë grë zha ne riladzle Jesús ga.

Niowse mban zho

⁴² Grëse zha ne rliadz Jesús ga, dib zdoos zho zianal zho grë mine rseed grë zha poxtl co zho, tibaque rcaalsa zho rzodiidznie zho Dios, ni row zho guietxtil zigne psanse Jesús diidz gun zho.

⁴³ Grëraa zha ne zo stib lad, rdzieb zho; laa grë zha poxtl co, nzian grë milagr nroob ne run zho.

⁴⁴⁻⁴⁵ Tipse rnee zho, rdeedlsa zho ncuaane rquiin zha ne nacgrë zho; zha ne quianie liu, tel pe grëragaa ncuaane quianie zho, haxta rto zhow, dzigo rguiz zho dimi co lo grë zha ne guiend pe yquiin.

⁴⁶ Gzataa dze rcaalsa zho len yadoo; rlozh ga, rcaalsaque zho lidz grë zha ne nacgrë zho row zho guietxtil zigne psan Jesús diidz ga; ine nley, ine ndooladz rbe zho grë zho rquiin zho guielwagw ne runlo zho, ⁴⁷ ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëeb xnëz Jesús, laa zho racnzianraa.

3

Biac tib men ne në ni

¹ Tib dze zig rbixwe ngbidza, brie Pedr grop Juan zie zho yadoo nroob ne zob Jerusalén, sac lëë hor co nac horne rie zho yadoo riezodiidznie zho Dios.

² Gax ro yadoo co quia tib puert rnee zho Puert Ndzon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezooob me ga rnab me gon lo grë zha ne rzëeb yadoo. ³ Laa dze co, zeene gon me laa Pedr grop Juan zieded ga ne laa zho sëeb yadoo, zëeb nia me rnab me gon lo zho. ⁴ Dze rwi zho lo me, tibaque rëb Pedr:

—Lo no bui.

⁵ Dzigo blis lo me bui me lo zho, nan me bod no pe dimi ne gdeed zho lo me. ⁶ Wbiire bnee Pedr lo me, rëb Pedr:

—Quianied naa dimi ygad naa lo luu. Ncuaañe grieelese gnedz naa, laaw gnedz naa niina, jniapse por Jesús (meñ Nazaret), laa naa rnab lo luu, niinagazh guso i zeen bzëni!

⁷ Dzigo bzhen Pedr nia derech me bliso Pedr me, hor cogazh laa grop ni me ga bdaan, ⁸ laa me psilo bzë. Rley me laa me bzëëb len yadoo gza me zho, lo guieñbley co haxta rias me, ni roolnie me Dios.

⁹ Grë miech ne no len yadoo, zeene gon zho laa me rzële, ni scataa rley me roolnie me Dios, ¹⁰ bzee zdoo zho; sac runbey zho me, nanpaa zho rzëd me glo, tibaque ran zho me rzob me zaatne quia Puert Ndzon ga rnab me gon.

¹¹ Zeene laa Pedr grop Juan brieen len yadoo nroob co, yeque me nal zhits zho ib rsaand me zho, laa zho bdziñ stib nëz cho yadoo co zaatne quia tib nsaap nroob ne rnee zho zhiNsaap Salomón. Nalaque grë miech co, rlozhd gwi zho, rlozhd gzee zdoo zho. ¹² Dzigo rëbchaa Pedr lo zho:

—¿Pe rac to? ¿Pe nacne squitaa rzee zdoo to, squitaa rwi to lo no, zig nac zeene no bdziuunguiac men rii, zig nac zeene por nguzobdiidz no lo Dios gane brieelo psëe no me? ¹³ Golgacnan ganle led scada; sinque Dios men ne bliladz Abraham, men ne bliladz Isaac, men ne bliladz Jacob, men ne bliladz grëraa xmenğol ne, men co blu lo to niina ne nli men nroob nac Xpëed me Jesús. Lëe Jesús co ga gon bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe liaadz

to ndeed to diidz. ¹⁴ Bdeete to diidz nlaa men ne nac men ndzon, men ne peet xtold; lel bnaab to blaa tib zha ntseeb ne nzëëb ngutoo. ¹⁵ Laa me, pquia to haxta beet to me, ni me nac men ne rdeed guielmban. Per bleeban Dios me, ni mban me niina; sac grop lo no bdzion no me.

¹⁶ Ni niina men ne ran to biac nu, niapse por Jesús biac me; led runbeyle to me nanle to ganle rzëd me glo. Ne dib zdoo no riladz no Jesús, gane brieelo bnaab no beenguiac Jesús me.

¹⁷ Grëse to bets, ne nac to menladz naa, rgobey naa niicle to ni niiclegaa grë zha ne nac zhiwxtis ne, lega laa to bnabeyse bgaa Jesús beet to me, niicle to biendaque dien pe nacne sca been to.

¹⁸ Laa Dios bneedz diidz been to grë guielntseeb co, sac sca goc grëse mine bzeet grë zha ne biadteed xtiidz Dios padzeela, zeene bzeet zho zha nac grë guielnë ne ted Jesús, Men ne nacle diidz cxeel Dios guiaad lo guidzliu.

¹⁹ Dol nroob ga gon been to, gacxe nana gon waa golsaan xquielntseeb to, golbig lo Dios; zeena csanmbe me to lo xtol to. Me gneedz guielbley lo to stib, ²⁰ ni zbiire cxeel me Jesús lo to stib, guiaadsilaa me to. ²¹ Gbaa no me niina, ni ga cuëz me nieeda gal dze ne laa Dios blozh bnabey goc grëse ncuane none gac, zigne bzeetse grë zha ne pxeel me padzeela, biadteed xtiidz me. ²² Zig nac Moisés bzeet me laa Jesús guiaad, rëb me lo grë pxoz gol ne: “Dios men ne rnabey ne, ible znabey me ne lo xtii to grieequia tib men ne gac zig nac naa lo to niina. Zeene laa me guiaad, golgon xtiidz me; ²³ sac zha ne gond xtiidz me, ib tedsod znitlo zho.” ²⁴ Scaque Samuel, ni grëraa zha ne biadteed

xtiidz me, grëse zho bzeetle zho grë ncuaane noyac len dze rii.

²⁵ 'Grëse to, xmenḡol to nac grë zha co, ye to ga rëb Dios ḡunlay me zeene znu biaan me diidz grop me Abraham, rëb me: "Niapse por tib men ne grieequia lo xtii luu, laa naa ḡunlay grëse miech ne ndxie ḡdibdoose lo ḡuidzliu." ²⁶ Ni niina ne laa Dios bleeban Jesús, gloque lo to pxeel me me, ḡunlay me to, zeena csaan to xquieḡntseeb to.

4

Güeyzo zho zho lo wxtis

¹ Laa Pedr grop Juan bii noneeque lo grë miech co, zeene laa bla zha ne nac pxoz bdziḡ ga, bdziḡnie zho tib zha non ne quianap yadoo co ni zla zha ne nacgrë zha saducé. ²⁻³ Zigne bdziḡ zho bnaaz zho Pedr grop Juan, güeysëeb zho zho ladzguiib; ni ne bdzele dzew, ga biaan zho dipse guieel co. Rlëe grë zha co, sacne laa Pedr grop Juan quianee lo grë miech co zha bleeban Dios Jesús; ni rnee zho grëse menḡut, scaque grieeban zho.

⁴ Niicle ne scataa rlëe grë zha rnabey co, per nzian zha ne ndxie ga bliladz Jesús; zig gaay mil rgaa loxaque zha bgui.

⁵ Zeene biini liu co, grëse zha non, grëse zha ne rnabey lo menḡuedz, laa zho pcaalsa. ⁶ Ga bdziḡ Anás men ne nac pxoz nroob ne rnabey, ga bdziḡ Caifás, bdziḡ Juan, bdziḡ Lejandr ni grë zha ne nac menlidz pxoz ne rnabey ga. ⁷ Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rëb zho:

—Golnē nadien, ¿cho rnabey to, cho pxeel to ne squi no to?

⁸Horco laa Espíritu Sant bdeed guielbiini lo Pedr, pquiab Pedr rēb Pedr lo zho:

—Grēse to ne nac to zha ne rnabey lo menɡuiedz, grēse to ne nac to zha gol ne non xtiidz. ⁹Telne minē rliisqui to nac ne dien zha bdziuun no men rii ne laa ni me biac, ¹⁰golʒiguiel golquiaadiaga ganle, zeena gacnan tow ni gacnan grēragaa menɡuiedza. Jesús gon, men Nazaret ne bnabey to gut lo cruz ga, men ne bleeban Dios ga, men co beenɡuiac men rii; ni laa to ranɡaa me laa me zo lo ne nu. ¹¹Lēē Jesús ga raquiet lo Xtiidz Dios zaatne znu rnee: “Quie ne psēeb zha ne nozaa yu, ni nand zho lēepaa quie co nac minē rnazdziits yu.” Ni scapaa nagon bzhaac to me. ¹²Loxaque me zrieelo csilaa ne lo xtol ne, sac bzodraa Dios cho stib zha ne niaad lo guidzliu niaadsilaa miech.

¹³Zeene gon grē zha wxtis co, scataa peet dzeb nod lo Pedr grop Juan, bzee zdoo zho; sac runbey zho Pedr, runbey zho Juan, nacd zho cho zha ne güey wseed nroob. Ga gon zho, pa lotaa guielbiini ne bgaa Pedr grop Juan ne bzēnie zho Jesús.

¹⁴Peet brieelod nliisqui grē zha co, sac nligaa laa men ne biac ga zo lo zho ga. ¹⁵Dzigo mazd bnabey zho brieē Pedr ley grop me Juan; laa zho biaan bzodiidz zho dien zha gun zho zho, ¹⁶sac rien zho tib milagr nroob ga sca biac ni men co; niicle ne racladz zho yqueets zhow, per grēle menɡuiedz bina. ¹⁷Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeena lozhd gacnan grēraa miech zha biac men co.

¹⁸ Dzigo bredz zho Pedr stib, grop me Juan, goctox zho lo zho.

—Laa no rso diidz lo to gon —rëb zho—, gbiire-draa to cseed to miech zhiwseed meñ ne rnee to Jesús ga.

¹⁹ Pquiab Pedr grop Juan, rëb zho:

—Zha dien rzac to, ¿pe nonguiela ga laa ne dziuun no mine rnabey Dios, lel mine rnee to i dziuun no? ²⁰ Grieelod gon dziuun no mine rnee to i, sac grëse ncuaane bdzion no, grëse ncuaane bdziongaa no ib none gnee now, zeena gacnan grëse miecha.

²¹ Dzigo wbiire grë zha rnabey co, ntseeb rac zho lo zho pso zho diidz csetraade zho miech; blozhse ga laa zho psilaa zho. Bdeetew diidz nsacsi zho zho, sac ndal miech ne rleynie Dios, rdeed zho xquizh lo me ne been me milagr ²² beenguiac me meñ co, ni choole iz rac sca gacd së me.

Bnab zho lo Dios

²³ Zeene laa Pedr grop Juan bdzin lo grë zha ne nacgrë zho, bzodiidz zho grëse tel zha rëb grë zha rnabey co, zha rëb pxoz non co. ²⁴ Grë zha ne nacgrë zho ga, zeene bin zhow grëse zho psilo zho bnab zho lo Dios, rëb zho:

—Dios, luu nac meñ ro ne rnabey grëtaa ncuaane no, luu bzaa gbaa, luu bzaa guidzliu, luu bzaa nisdoo, luu bzaa grëraa ncuaane no. ²⁵ Padzeela zeene bdeed Espíritu Sant guielbiini lo pxozgol no David, meñ ne been xtsiin luu hor co; znu bnee me:

¿Pe nacne squitaa rac grë miech ne nacd zha Israel rlëenie zho Dios?

Racladz zho guṅ zho ncuaaṅe ni grieelod lo zho.

²⁶ Grēse zha non ne rnabey grē guiedz,
tipse rac zho laa zho racntseeb lo Dios rlēēnie zho
me,
ni rlēēnie zho meṅ ne bzooblo me pxeel me lo
guidzliu.

²⁷ 'Ni nligaa na scase goca. Guiedz Jerusalén
nu, nu biaad rey Herod, biaad Pons Pilat, pcaalsa
zho grē zho meṅladz no ni grē menzit, tipse bnedi-
idz zho psacsi zho Jesús, meṅ ndzon ne bzooblo
luu pxeel luu biaadguṅ xtsiṅ luu lo guidzliu nu.

²⁸ Grēse zigne psanle luu diidz, scase been zho.

²⁹ Ni scaque niina, bui ganle zha racladz zho ctseb
zho no parne peet gneedraa no; luu nac meṅ
ne gocniēn no ne nac no zha ne rdziuuṅ xtsiṅ
luu, zeēna gdzieebd no cseed no miech xtiidz luu.

³⁰ Laa no rnab lo luu, beṅguiac grē meṅ rzacnē,
been grē milagr nroob, blu grē ncuaaṅe gzee zdoo
miech; zeēna gan zho ganle meṅ nroob, meṅ nd-
zon nac Xpēēd luu Jesús.

³¹ Zeēne blozh bzodiidznie zho Dios, masaque
bzhidz zaatne ndxie zho ga; hor co grēse zho laa
zho bgaaraa guielbiini ne bdeed Espíritu Sant lo
zho; peet rdziebdraa zho laa zho zieseed miech
Xtiidz Dios.

³² Len dze co, grēse zha ne rliladzle Jesús ga,
tibaque nac zho, tibaque rnee zho, tibaque nac
miṅe zienie guic zho. Nod zha ne guiab lose zho
yquiin ncuaaṅe rap zho; sinque grēse ncuaaṅe
quianie zho chen grē zho naca. ³³ Grē zha poxtl co,
zeēne rseed zho miech zha brieeban Jesús, nzian
zha ne rliladz me; rlupaa ne Dios nacie zho.

34-35 Ne nligaa tipse nac zho grë zho, nod zha ne guiab ne guiend pe yquuin, sac grëse zha ne quianie liu, zha ne quianie nzian yu, rto zhow dzigo rdeed zho dimi co rguiz grë zha poxtla lo zha ne rquiina. 36 Sca been tib men ne nacgrë zho lë José. (Zha xtii Leví nac me, gol me tib lo guidzliu win ne no lo nisdoo lë Chipr; zha poxtl-le bleelë me Bernabé. Bernabé, nac zig nac ne rnee ne: Zha ne rchoobladz zdoo miech.) 37 Pto me tib lë liun me, dzigo bdeed me dimi co lo zha poxtl, bdiiz zhow.

5

Znu bzhaac Ananí grop Safir

1-2 Tib mgui lë Ananí, laa tsieel me lë Safir; ye me pto tib lë liun me. Gonlo tsieel me, tel palal dimi ne bdo liu co, bzhenga me zhisa. Zeene laa me ziesan mine biaan ga, lo poxtl, rëb me lëë grë dimi ne bdo liun me ga. 3 Dzigo rëbcha Pedr lo me:

—Ananí, ¿pe nacne bdeed luu diidz bzëëb mendox zdoo luu? Mendox i gon noquiil luu nan luu yquidiee luu Espíritu Sant, rnee luu lëë grë dimi ne bdo liun luu nu. 4 Bien ganle chen luu liu co. Dimi ne bdiizh zhow, chen luuw, niac niun luuw zigne niaccladztaa luu, ¿pe nac dzigo ne racladz luu yquidiee luu? Gon ganle led nod noquidiee luu, Díos i gocladz luu nquidiee luu.

5 Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdzieb zho. 6 Dzigo güey bla zha nguieg pchel zho ngutoo co lar, blis zho me ga laa zho ziequeets me.

⁷ Wdzeelaaque goca zeene laa tseeel me bdziñ, ni lalnu güeynied guic me ne laa tseeel me gutle.

⁸ Bnabdiidzaque Pedr lo me, rëb Pedr:

—Bnë dien, ¿pe nli lëë grë dimi ne bdo liuñ to nu?

Pquiab wnaa co, rëb me:

—Nliw, lalgui pto now.

⁹ —¿Pa brieer pensar qui lo to grop tseeel to? —rëb Pedr—. Ne squi tipse bnee to nan to yquidie to Espíritu Sant; doñ nroob i gon been to lo Dios. Laa zha ne güeyqueets tseeel luu blansole ro yu nu, ni niina gon laa zho güeyaque luu.

¹⁰ Diidz co blozh brieer ro Pedr, znuse biab wnaa co liu, guchedraa me ga. Zeene laa gza zha nguieg co bzëeb len yu, laa me nixle ga; gon zho gutle me, dzigo blis zho me güey zho güeyqueets zho me cue xpaatseeel me. ¹¹ Grëse zha ne gon sca goc men co grop me, zha ne bingaaw, zigtaa zha ne rliladz Jesúsazigtagaa grëraa miecha, per nli bdzieb zho.

¹² Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz run zho. ¹³ Grëse miech ne rcaalsa ga, rleynie zho grë zha poxtl co, nzian zho rliladz mine rseed zho, per rbigd zho gacgrë zho zho.

¹⁴ Zigse zie dze, scase racndalraa miech ne rzëeb xnëz Jesús, mguisaque wnaasaque laa zho rliladz me dib zdoo zho. ¹⁵ Zhoob diidz scataa milagr ne run grë zha poxtl co. Dzigo psilo miech rbee zho grë men rzacnë, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimlëse Pedr guiab lad grë men co zeene laa Pedr ted. ¹⁶ Haxta grë guiedz win ne ndxie gax Jerusalén ga, rrieer grë

miech rdziñnie zho grë meñ rzacnë, no grë meñ co noguitnie meñdox; grëse zho runguiac zha poxtl co zho.

Bio grë zha poxtl ladzguiib

¹⁷ Zeene gon meñ ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëë zho, ¹⁸ bnabey zho bgaa zho psëëb zho zho ladzguiib stib. ¹⁹ Pcow liu co, guieela bdziñ tib xanjl Dios pxal me ro ladzguiib, blee me zho ga; dzigo rëb me lo zho:

²⁰ —Goltsie leñ yadoo, grëse miech ne ndxie ga gołnee lo zho, zeena gacnañ zho zha ygaa zho guielmban ndzon ne nodeed Dios niina.

²¹ Biinigazh liu, silgaw laa zho bdziñle leñ yadoo; psilo zho laa zho noseed grëse miech ne ndxie ga.

Laga laa zho noseed miech leñ yadoo, laa meñ ne nac pxoz nroob ga, grë me zha ne nacie me, bnabey zho ycaalsa zha ne nac wxtis ni grë zha non lo meñguiedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguiib. ²² Bdziñ zho ro ladzguiib, ni tib choot guiend leñ co; rzhit-saque wbire zho güeynie zho diidz, ²³ rëb zho:

—¡Choot guiend leñ ladzguiib! Dziits niooga bdziñ no, ga zo zha ne quianap; per zeene bzhiäl ro ladzguiib bziaab no, bdziñ no choot guiend leñ co.

²⁴ Grë pxoz ne rnabey, ni meñ ne zo lo meñguiib ne rquianap yadoo, zeene bin zhow, rdziendraa zho zha guñ zho. ²⁵ Lëëtaaque sca no zho, zeene bdziñ tib zho rëb:

—Zha ne gon bloo to ladzguiib ga, laa zho no-laque len yadoo noseed zho miech.

²⁶ Lëëläd brieen men ne zo lo grë menguiib ne rquianap yadoo, brieenie me bla xaguiib me, güey zho niapse wen diidz güeyxi zho zha poxtl co len yadoo; sac rdzieb zho ngoquie grë miech co zho.

²⁷ Zeene bdziñnie zho zho lo grë zha wxtis co, dzigo rëb men ne nac pxoz nroob ga lo zho:

²⁸ —¿Pe nacne ronde to diidz? Led pso no diidz lo to cseetraade to miech zhiwseed mgui ne nac Jesús ga. Ni na gon dible lad guiedz nu nozhoobnen zhiwseed to i, haxta rcaadzdoł to no ne no bdziuut me.

²⁹ Dzigo pquiab Pedr rëb Pedr:

—Rdzion no miñe rnabey samiech no, per glo none dziuun no miñe rnabey Dios no. ³⁰ Men co bliladz grë pxozgol ne, ni men co gon bleeban Jesús, men ne sca psaci to beet to lo cruz. ³¹ Ni meque zeynie Jesús gbaa, bzoob me Jesús cue me nëz derech; sac Jesús nac men ne rnabey, men ne rsilaa miech lo dol. Ni Jesús gon, gdeed guielbiini lo grëse men Israel gbiire gbig zho lo Dios stib; zeena gunquizhd me zho xtol zho.

³² 'Miñe rnee no lo to nu diidzliw, nozhal bdziõa, ni led loxaque nodsegaa; sinque ye Espíritu Sant men ne rxeel Dios racnieñ grë zha ne ron xtiidz me, ye men co quianee ganle ne nliw.

³³ Zeene bin zho sca rëb Pedr, blëeye zho, rzac zho tebaa gagazh gut zho gza zha poxtl co.

³⁴ Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo men guiedz; dzigo guso me bnabey me brieen grë zha

poxtl co nēz ley, ³⁵ bnee me lo grēraa zha ne ndxie ga, rēb me:

—Grēse to menquiedz, laa naa rso diidz lo to, golcobey gon dien pe gun to zha qui. Golguien ganle, nonguielda ne lega mine gacladztaa to gun to zho. ³⁶ Golsoladz ganle, padzeela squi bio tib men ne brieelē Teudas, rēb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasē me nabey, zeene laa me gut nēzrii nēzrec bliaal grē zha ne gocnie me ga. ³⁷ Laa len iz ne nodop lē miech, scaque brieequia tib men Galilé brieelē Judas. Ndal zha ne gocnie me, per zeene laa me gut scasaque nēzrii, nēzrec bliaal grē zha ne gocnie me; brieelodaque pe niun me. ³⁸ Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, zdziñ dze ne nitlow. ³⁹ Laa telne nligaa Dios rsiaab guic zho squi rseed zho miech, niacxe zlēb to gnitlo to wseed ne ziaadnie zho. ;Telne guiab to gnitlo tow, nande to nend Dios ga tilnie to!

⁴⁰ Grēse zha wxtis co bzoobdiag zho xtiidz Gamaliel, bien zho ne scataa nonguiel gaca. Dzigo biire bredz zho grē zha poxtl co, bdiñ zho zho, ni biire pso zho diidz lo zho gbiiredraa zho cseed zho miech zhiwseed Jesús. Blozhse ga, dzigo laa zho psilaa zho.

⁴¹ Zeene laa zho wbi ga, rley zho por grētaa mine pteed grē zha non co zho loxaque ne rililadz zho Jesús. ⁴² Ib psaañd zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne nli lēē Men ne zēēble diidz cxeel Dios lo guidzliu ga nac Jesús.

6

Bzo gadz zha ne gun xyudar poxtl

¹ Ni ne len dze co quiayac nzianraa miech ne rzëeb xnëz Jesús, dzigo psilo grë zha Gres rlisqui zho, rnee zho rdioond grë wnaa viud ne nac zha ladz zho zaacse; zeene rgaaz ncuaane row zho, rgaad zho lal mine rgaaz grë wnaa viud ne nac zha Israel.

² Dzigo nacte bredz gza tsiipchop poxtl co grëse zha ne nole xnëz Jesús ga, bnee zho lo zho rëb zho:

—Gacnan to ganle, grieelodraa ne noque so dzian no dien zha ygaaz ncuaane yquiin to, sac gon nonguielda csaan no mine nac xtsiin no, ib none guioseedraa no miech Xtiidz Dios. ³ Min co nagon, mazd golzo gadz zha bgui ne gun dziin co, lëeraasi golguien cho gzo to; golguib zha ne ndzinli, zha ne nixbiini, zha ne nactie Espiritu Sant; ⁴ zeena sca guiob lo no gzodiidznie no Dios, gnab no lo me, ni cseed no grëraa miech Xtiidz me.

⁵ Grëse zho rëb, wen sca gaca. Horcogazh psilo zho ble zho zha ne so gun dziin co. Bzo zho tib men lë Lip, tib men lë Prócoro, tib men lë Nicanor, tib men lë Timon, tib men lë Parmen, tib men lë Xteb, rlpuaa dib zdo me rliladz me Dios ni nactie Espiritu Sant me; ni tib men Antioquí lë Nic, mazd glo Nic goc tib zha ne bleyniedox grë zhiwseed zha Israel. ⁶ Dzigo güeynie zho gza zha co lo zha ne nac poxtl. Blozhse bnab poxtl lo Dios gacnien me zho, dzigo pxobnia poxtl guic zho, bnab zho lo Dios gdeed me guielbiini lo zho.

⁷ Zigse zie dze, laa Xtiidz Dios quiagaazraa dib Jerusalén. Nzian grë zha ne rzëeb xnëz Jesús, haxta

grë meṇ ne nac pxoz, nzian zho laa zho bliladz me dib zdoo zho.

Bnaaz zho Xteb

⁸ Goc palal dzew, nzian grë milagr nroob ne run Xteb, sac tibaque sca dib zdoo me rliladz me Jesús, ni nacie Espíritu Sant me.

⁹ Laa tib dze, brieequia bla zha ne rie tib xyadoo win zha Israel, lë “Esclavos Libertados” gocladz zho ndildiidznie zho Xteb. Brieaque zla zha Israel ne ziaad nëz Ciren, nëz Alejandrí, nëz Cilis, ni nëz Asia, ye zho gocgza zha co rlëe zho lo Xteb.

¹⁰ Goṇse zho rlëbd xtiidz zho lo Xteb, sac niapse Espíritu Sant rdeed guielbiini lo me, rien me pe rnee me lo zho; ¹¹ dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

¹² Zeeṇe bin meṅguiedza, blëe zho; nacie bnabeyaue zha ne rnabey lo meṅguiedz bgaa Xteb güeyzo zho me lo wxtis. ¹³ Ni güeynie zho bla zha ne lega bnexuu, rëb zho:

—Nliw, rtsidil mgui qui xyadoo ne, rtsidil me xley ne. ¹⁴ Bdzionpaa no goṇ quianee me laa Jesús meṇ Nazaret ne quiazeet zho dib i ctsil yadoo rii, ni ctsëe me ley ne psan Moisés lo xmengol ne.

¹⁵ Horco zeene laa grë zha wxtis co ni grëraa zha ne ndxie ga bui lo Xteb, goṇ zho tib biini nroob ne riab lo me, masaque rlu me zig rlu tib xanjl Dios.

7

¹ Dzigo bnabdiidz meṇ ne nac pxoz nroob ga lo Xteb, rëb me:

—¿Bnë dien pe nli quiayun luu grë ncuane rnee zho i?

² —Grëse to ne nac to menladz naa —rëb Xteb—, laa naa rzaac to zig bets naa, zig pxozgaa naa. Golsiguiel golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, brieequia Dios ndzon ne no gbaa lo me, rëb Dios ³ griee me ga, csan me grë menlidz me, tsie me nëz ne glutaa Dios lo me.

⁴ 'Nacne brie me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios biaadnie me nëz rii, zaatne mban ne nu niina. ⁵ Niicle ne laa me blanso lo liu rii, ni tib lë win zaatne so ni me bdeete Dios lo me; per rëb Dios ib grë zha xpëed me guiaanniew. ¡Ni laa me quianied mëed len dze co! ⁶ Rëbgazh Dios lo me, ib zieban grë zha xpëed me ga ladz beñ dipse len tap gayoo iz, ga csacsi miech zho gunçun zho zho dziin. ⁷ “Per ib tedsod sacsi naa zha ne csacsi zho ga”, rëb Dios, “ni ga griee zho glanso zho nu, nu goolnie zho naa.”

⁸ 'Ni parne glu ib zac mine bnee Dios lo Abraham ga, dzigo psan me diidz grëse mëedbgui ne grieequia lo xtii Abraham none tso tib bey lad zho. Miñ co nagon, zeene laa xpëed me Isaac goc xon ngbidz, laa me bloo Isaac bey co. Scaque been Isaac xpëed me Jacob, ni scaque been Jacob gza tsiipchop zha ne goc xpëed Jacob; lëe gza tsiipchop zha co nagon goc pxozgol ne.

⁹ 'Ziese pxozgol ne ga, blëenie zho bets zho zha ne lë José, pto zho José lo men ne zie wto nëz Egipt. Ni ne nacie Dios José, ¹⁰ psilaa me José lo grëtaa guielnë ne bded José, ni gocniñ me José beenbey rey Egipt José. Ib psaand me José,

bdeed me guielbiini lo José. Zeene gon rey co scataa men nixbiini nac José, dzigo bnabey me bzo José goc me tib men non ne bnabey dipse Egipt; haxta grë ncuaan non ne no lidz rey, me bnabeya. ¹¹ Lëëtaaque len iz ne nac me dziin, biaad tib gbin; dipse xtan zha Egipt, dipse xtan zha Canaan mban bded miech. Grë zha ne goc pxozgol ne ga, guien_{nd}raa pe gow zho. ¹² Laa zeene bin Jacob laa zhobxtil bii no Egipt, dzigo pxeel me zho güeyxi zho zhob ga.

¹³ 'Zeene goc chop vult ziexi zho zhob Egipt, dzigora gona_n zho bets zho ga rnabey Egipt; niiclegaa rey cow, hor coraa been_bey me bets José. ¹⁴ Dzigo bnabey José güeyxi zho pxoz me Canaan, güeyxi zho tseel zho, güeyxi zho xpëed zho. Lo grë zho rgaa zho tson_{ga} tsiin, laa zho bdziin Egipt.

¹⁵⁻¹⁶ 'Sca nace laa Jacob bey Egipt. Ga gut me, dzigo güeyqueets zho me Siquem, tib len baa ne bzhii Abraham lo Hamor; scaque grë xpëed me zha ne goc pxozgol ne ga, ga gut zho. ¹⁷ Grë zha ne brieequia lo xtii zha gol co, zha ne na guiab ne nac men_ladz ne, ndal iz ne bio zho Egipt ga, ni ndaldoo goc zho. Laa zeene ziaadyob cuee Dios zho ga zigne rëble me lo Abraham glo, ¹⁸ laa men ne nac rey Egipt len dze co, psilo ptsidil zho; sac rsoladzdraa me grëtaa dziin ne been José lo men_ladz me. ¹⁹ Psacsi me zho, been me zho zigne gocladztaa me, haxta bnabey me grëse mëëdbgui ne ral gan_draa zho win parne guet win.

²⁰ 'Len dze copaa nagon gol Moisés, tib mëed niow nac win. Tson mëë bloolan xn_{ia}a win win, ²¹ laa zeene brieelodraa ngolan me win, dzigo

güey_{sa}n me win tib ro guiubee Egipt, ga bdziel tib xindzoo_p rey win. Wnaa co go_n win, biaa_n win lo me zig tib xpëed me; ²² haxta bioxco me grëse wseed ne rac zha Egipt, pseed win. Zeene laa win broob, tib me_n nixbiini goc win, niicle ne gnee wina, niicle ncuaa_ne gu_ngaa wina.

²³ 'Choo iz rap Moisés, zeene biab guic me güeyted me lo me_nladz me. ²⁴ Dzigo go_n me laa tib zha Egipt quiagu_n tib zha Israel; nacne bzëëbaque me bla me zho, beet me zha Egipt co.

²⁵ 'Sca been Moisés, na_n me nien grë zha Israel ne Dios bzo me gacnie me zho, csilaa Dios zho ladznia zha Egipt; per biend zho ne scaw. ²⁶ Biini liu co, go_n me laa chop zha Israel nodil, zie me nla me lo xtil zho, bnee me lo zho nonguield ga til zho, guien zho ganle me_nladzaque zho. ²⁷ Dzigo biasaque tib zha ne noquiaaw ga pcheep zho me, ntseeb rac zho rëb zho lo me: “¿Cho bzo luu guiaadnabey luu no, guiaadlisquigaa luu dien pe nodziuu_n no? ²⁸ ¿Te racladz luu ye gutaque luu no zigne beet luu zha Egipt co nieeg?”

²⁹ 'Zeene bin Moisés sca rëb zha co, hor co bzhoo_n me bey me nëz xtan zha Madián. Nëz co ptsieelnia me, ga gop tsiel me chop mëëdbgui.

³⁰ 'Choo iz goc no me nëz xtan zha Madián, tib dze no me cho gui Sinai, tibaque zeene go_n me laa tib anjl zo gro_ltaa tib lo yag zarz, masaque rso bel lo yag co. ³¹ Bzee zdoo me, lëëtaque laa me zie gbiggax me, zeene bin me tsi Dios rëb Dios lo me: ³² “Naa nac Dios ne bliladz pxozgol luu Abraham, pxozgol luu Isaac, pxozgol luu Jacob.”

'Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me. ³³ Dzigo bnee Dios stib, rëb me lo me: "Blit lab luu, sac gax lo naa i zo luu. ³⁴ Laa dze nagon bdziñ ne laa naa csilaa grë zha Israel ladznia zha Egipt; sac ran naa zha nactaa grë guieñë ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga."

³⁵ 'Dzigo laa Dios pxeel Moisés ziesilaa me zha Israel; niicle ne glo rëb zho lo me: "¿Cho bzo luu guiaadnabey luu no, guiaadlisquigaa luu dieñ pe nodziuuñ no?" Per me bzo Dios bnabey lo zho, blee me zho Egipt.

³⁶ 'Nzian grë milagr, nzian grë ncuaaņe nroob ne gzee zdoo ne been Moisés blee me zho ga; zigtaa leñ guiedz Egiptow, zigtaa lo Nisdoo Nizhniew, zigtagaa grë dan bidz ne bio zho dipse leñ choo iz ne bzënie me zho ga.

³⁷ 'Moisés ga bzeet lo pxozgol ne, ne laa Dios gnabey lo xtiique zho grieequia tib meñ ne cxeel me guiadteed xtiidz me, zigne pxeel me Moisés.

³⁸ 'Zeene nonie Moisés zho grë dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan lo ne ga, diidz ne rap guieľmban. ³⁹ Per ib bind zho xtiidz me, leľ gocladz zho mbiire ney zho Egipt stib, ⁴⁰ bnabey zho Aarón rëb zho: "Bzaa tib mdio tedner lo no gacnieñ no laa no guioo Egipt stib; sac loxaque biadbee Moisés no ga, na choot nañ dieñ yo Moisés."

⁴¹ 'Dzigo bzaa zho tib ngon yeen goc zhimdio zho, haxta beet zho grë ma ne bloogon zho lo mdio co; bleyne zho ncuaaņe bzaania zho. ⁴² Nacne

wbiñladz Dios, psaan me zho; psilo zho bleynie zho grë ncuaañe rañ zho zhan gbaa. Beeñ zho zigne bzeetse zha ne biadteed xtiidz me padzeela, zeeñe rëb zho:

Golsoladz ganle,

laa ne nleynie to naa dipse leñ choo iz ne bio to grë dan bidz co,

laa ne niut ma ne ngogon to lo naa,

⁴³ leñ grë mdio ne bzaa to, mdio co bleynie to, lo mdio co pquiitsgzhìb to.

Mdio ne rnee to Moloc,

zaatne zieetaa to tibaque ney to lidza,

zhmel mdio ne rnee to Renfán, pa csaan to ma.

Miñcocxe waa, laa naa cuee to ladz to,

gzonëz naa to guey to grë dan ne riaan zitraa lo guiedz Babiloin.

⁴⁴ 'Leñ dze ne sca bio pxozgol ne grë dan bidz co, tib yu larse goc xyadoo zho, ga biotsow quie ne quia xley Dios. Dioszhal blu lo Moisés zha tsaa yu co. ⁴⁵ Goc bla iza, zeeñe blozh bñitlo Dios grë guiedz ne briñ nu glo, laa Josué blansonieque yu co. Haxta leñ dze ne goc David rey, bii lëew nac xyadoo zho.

⁴⁶ 'David goc tib rey ne gocnziuu lo Dios, bleynie Dios me, dzigo gocladz me nzaa me tib yadoo nroob zaatne mbëzlo zho Dios. ⁴⁷ Per brieelod nzaa mew, Salomónraa goc rey ne bzaaw. ⁴⁸ Nli laa yadoo co biala, per tel Dios, men nroob nac me, led yed me cuëz leñ grë yu ne rzaa miech. ⁴⁹ Zigne zhobneeque lo Xtiidz me, zeeñe znu rëb me:

Gbaa nac zaatne zoob naa,

laa lo guidzliu nac zaatne rzo ni naa.

¿Zha nadien nac yu ne nañ to gzaa to cuëz naa?

¿Pa nadien guiab to gzaa to zaatne gdziiladz naa?

⁵⁰ ¿Niacxe led naad bzaa gbaa?, ¿niacxe led naad bzaa guidzliu?

⁵¹ 'Golgona sca ganle —rëb Xteb—, zigne beenaque grë pxozgol to ga padzeela, scadaaque gon quiayun to niina. Miech nad, miech ntseeb zdoo nac to; ib ronde to mine rnee Espiritu Sant.

⁵² Tel pxozgol to, nelte gondze zho grë zha ne pxeel Dios biadnee xtiidz me; haxta beet zho grë zha ne bzeet ne laa Dios cxeel tib men peet xtold ne bzooblo me guiaad lo guidzliu. Ni niina ne laa Dios pxeel men co, scasaque been to, ptsidil to me, bnabey to bgaa me beet to me. ⁵³ Tibaque squi quia to quiaguiits to Xley Dios; xanjlpaa me biaadsana lo to, ni runde to mine rnabeya.

Beet zho Xteb

⁵⁴ Zeene bin zho sca rëb Xteb, blëeye zho haxta rowye ro zho rwi zho lo me. ⁵⁵ Laa me, ne nacie Espiritu Sant me, zeene blis lo me bui me nëz gbaa, gon me lo guielndzon ne no Dios, gonpaa me laa Jesús zo cue Dios nëz derech. ⁵⁶ Dzigo bnee me, rëb me:

—Ranpaa naa niina gon nzhialse gbaa, laa men ne pxeel Dios biaad lo guidzliu ga, laa me zo cue Dios.

⁵⁷ Mine been zho ptse zho diag zho, ni nguiedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz. ⁵⁸ Zha ne goc textigw ga, blee zho lar ne mbix zho, bdziin zhow tib lo mgui nguieg lë Saul, mgui co pquianapa; laa zho psilo bdeedquie me.

⁵⁹ Sca nodeedquie zho me, laa me rnab lo Dios rnee me:

—Jesús, luu ne nac luu meṅ ne rnabey, luu pcaania zhiespíritu naa.

⁶⁰ Dzigo pquitsgzhíb me, ni pquiaa me stib redz nroob bñab me lo Dios, rëb me:

—Dios, luu ne nac luu meṅ ne rnabey, doḷ ne quiayun miech rii, laa naa rnab lo luu gunquizhd luu zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

8

¹⁻² Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquieḷnë me.

Leṅ dze co, psilo zha ne sca rlëënie zha ne rliladz Jesús, ptsidil zho grëse zha ne rliladz me; dipse leṅ guiedz Jerusalén pquianaḷ zho zho. Grëse zho bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nacse poxtl biaan Jerusalén. ³ Ntseeb rac Saul, rzac me tebaa zha gñitlogazh me grëse zha ne rliladz Jesús. Stib yu stib yu zie me, riebezho me zho lidz zho, mgui wnaasaque rey me riesëëb me zho ladzguiib.

Bdziṅ Xtiidz Jesús nëz Samar

⁴ Laa grë zha ne bzhoon Jerusalén ga, zaatne zieetaa zho rnee zho Xtiidz Jesús lo miech. ⁵ Zig nac Lip, zeene bdziṅ me tib guiedz nëz Samar, psilo me bnee me Xtiidz Jesús lo grë miech co. ⁶ Ndal zho rquiaadiag miṅe rnee me, rzee zdoo zho ran zho grëtaa milagr ne run me. ⁷ Ndal grë zha ne noguitnie meṅdox, riac zho, rquiaadan grë meṅdox co redz zeene laa ma rzhoon; grë zha ne

gutoo, grë zha ne nde ni, runguiac me zho. ⁸ Grëse miech ne no guiedz co, rley zho.

⁹⁻¹¹ Ga no tib men ne rool diidz dox, lë Simón. Ye me rzee zdoo miech grë ncuaane run me. Nzianle iz sca noquidie me zho, grëse menguiedz runbey me, haxta niats rac me rnee me guiendraa cho zig me. Grëse zho, haxta grë zha non rbig lo me, rzac zho lëe poder ne rap Dios ga nacie me.

¹² Laa zene bnee Lip lo grë miech co gocnan zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bliladza, mgui wnaasaque, laa zho brobnis.

¹³ Dzigo yeque men ne lë Simón ga bliladz Jesús, ye me laa me brobnis; zaatne zieetaa Lip nal me zhits Lip, rzee zdoo me ran me grëtaa milagr nroob ne run Dios.

¹⁴ Grë zha poxtl ne no Jerusalén, zene gocnan zho scataa ndal zha Samar nocaania zhiwseed Jesús, dzigo pxel zho Pedr grop Juan zie nêz co. ¹⁵ Laa zho zie gnab zho lo Dios ygaa grë zha ne bliladzle Jesús ga guielbiini chen Espíritu Sant; ¹⁶ sac zene bliladz zho Jesús, loxaque brobnisse zho, gard ygaa zho guielbiini co. ¹⁷ Bdzin zho pxobnia zho guic grë men co, bnab zho lo Dios; dzigo grëse men co laa me bgaa guielbiini ne rdeed Espíritu Sant.

¹⁸ Zene gonn men ne lë Simón ga, ne loxaque rxobniase zha poxtl co guic grë miech co laa zho rgaa guielbiini ne rdeed Espíritu Sant, dzigo laa me rdeed dimi, ¹⁹ rëb me:

—Golneedz poder qui lo naa; zenea ye naa zha ne cxobniataa naa guic ygaa zho guielbiini ne rdeed Espíritu Sant.

20 Pquiab Pedr rëb Pedr lo me:

—¡Bien ganle pe rnee luu! ¿Pa bin luu ye xpoder Dios zac si miech? ¡Tebaa niinagazh nitlo luu grë xtimi luu i! 21 Ni lalnu rieguald luu gun luu dziin rii, ni gdzindгаа dze gun luuw; sac mbed zdoos luu, zienied guic luu gun luu mine rnabey Dios. 22 Blee zhgab yozh qui guic luu, bnab lo Dios zeena togo squia zdoos me luu, gunquizhd me luu dol ne squi bza zdoos luu i; 23 sac rlu niapse guielntseeb nonie guic luu, ni lëëque luu gon nosacsi luu ne squitaa noyunctal luu xtol luu.

24 Pquiabse me rëb me:

—Golgun guielnzaac, golnab lo Dios yquia zdoos me naa, zeena ygaad naa grë guielnedox ne rnee to i.

25 Blozhse bzodiidznie Juan grë miech co grop me Pedr, blozhse pseed zho zho Xtiidz Dios, laa zho wbire zey zho Jerusalén stib. Guiedz ne rd-edtaa zho dib xtan zha Samar ga, rnee zho Xtiidz Dios lo grë miech co.

Bzodiidznie Lip tib men Etiopí

26 Laa Lip no Samar ga, tib dze brieequia tib xanjl Dios lo Lip, rëb me tsie Lip nëz ne rrieer Jerusalén zie nëz Gaza.

27 Dzigo güey Lip nëz co. Tib dan ngana, lëëtaque laa tib men ne nac dziin lo rein ne lë Candás zie ga, dziin nroob nac me lo rein co, sac me ngotsow grëtaa dimi ne no Etiopí. 28 Zobse me tib len carret nroob zie me ga; znu wbirele me Jerusalén güeygan me Dios. Laa me zob leen co qualab me lo Xtiidz Dios mine pquiaa Isá, men ne biadteed xtiidz Dios padzeela.

²⁹ Dzigó bnabey Espíritu Sant Lip tsie Lip yгаа carret co lo Lip. ³⁰ Zeene bgaa carret co lo Lip, bin Lip pa lo nolab men co; nacne rëbchaa Lip lo me:

—¿Pe rien luu cho raquiet zaatne nolab luu i?

³¹ —Rienđ naaw —rëb me—, rquiin tib zha ne gnë lo naa dien zha naca.

Dzigó bredz me Lip biep Lip len carret co, güeysob Lip cue me.

³² Znu rnee zaatne nolab me ga:

Zigne racse mëcwxiił yeen zeene rnaaz zho ma rut zho ma,

scadaa ndooladz goc me,

peet beenđ me zeene laa zho zienie me.

Ni zigne roptsied ma zeene rtsiib zho ma, scaque ni tib diidz ptsired me lo zho.

³³ Niicle ne gon zho scataa ndooladz me, per psacsi zho me.

¡Pa lotaa bdziñ guielntseeb ne been gre menładz me!

Sac gon, ptiche zho xquielmban me lo guidzliu.

³⁴ Dzigó rëbchaa men co lo Lip:

—Bzhiguieł bnë lo naa dien, cho nu znu rzeet Isá lo rii. ¿Pe me bded miñ rii, te stib zhow ye?

³⁵ Dzigó rëb Lip lo me Jesús raquiet ga, ni bnee Lip grëraa mine nac zhiwseed Jesús. ³⁶ Laa zho no nëz, tibaque zeene bdziñ zho tib lugar co no nis; rëbchaa me lo Lip:

—¡Bui ganle laa nis no nu! Mazd bzhiguieł pchoobnisgagh naa.

³⁷ [—Zaca —rëb Lip—, totsaque dib zdoo luu rliladz luu Jesús.

—Rliladz naa me —rëb men co—, rliladz naa ne nli Xpëed Dios nac me.]

³⁸ Dzigo bnabey me blëz carret co ga. Biet me leen co grop me Lip bzëëb zho lo nis co, ga pchoobnis Lip me. ³⁹ Blozhse ga, laa Espíritu Sant blis Lip gonḁraa me Lip; per rley me laa me bio nëz stib, laa me zie.

⁴⁰ Zeene laa Lip brieequia, laa Lip nole guiedz ne lë Azot. Ga psilo me zigse zie me, guiedz ne rdedtaa me rnee me Xtiidz Dios lo grë miech co. Sca bio me nëz, haxta bdiin me guiedz Cesarea.

9

Gon Saul Jesús

¹ Laa mguì ne lë Saul ga, per nli ntseeb rac me, tibaque ne laa guic me zienie gut me grëse zha ne rliladz Jesús. Güey me lo men ne nac pxoz nroob, ² bdeed pxoz co ti xtiidz me guey lo grë zha ne zo lo xyadoo zho nëz Damasc, parne gacnie zho Saul gnaaz zho grëse zha ne rliladz Jesús; zha ne ygaataa niicle mguiw niicle wnaaw, gzobdoo zho zho tsiesan zho ladzguiib Jerusalén.

³ Laa Saul bio nëz, laa Saul zie. Zhile gdziin me guiedz Damasc, tibaque zeene brieequia ti biinidoo zhan gbaa biab zaatne zie me ga. Groḁtaa lo biinidoo co biaan me, biabgazh me liu. ⁴ Liu nix me, bin me zëëb ti tsi men co rnee lo me:

—Saul, Saul, ¿pe nacne quianaḁ luu naa?

⁵ —Been guieḁzaac —rëb me—, bnë dien cho luu.

Dzigo pquiab men co, rëb me:

—Naa nac Jesús men ne squi quiatsidiḁ luu. [Lëëque luu gon nosacsi luu i, rzac luu zigne rzac ngon ne rcaanni, ni lëëque lo guiib lots ne rtseb zho ma riecaanni ma.

⁶ Rdzieb Saul, rzhidz me lo dzeb co rëb me:

—Bzhiguiel bnë dien, ¿pe racladz luu gun naa niina?]

Rëbchaa Jesús lo me:

—Guche i, güey Damasc, ga gnë zho ganle pe nac miñe no gun luu.

⁷ Zha ne ziegza Saul ga per nli bdieb zho, haxta ni gacdraa gnee zho; loxaque tsi men co ron zho zëëb, per choot ran d zho.

⁸ Laa Saul guche ga. Zeene laa me pxal lo me gwi me randraa me, ¡laa lo me pcowle! Zha ne ziegzale me ga bzhen nia me bdziñ me Damasc. ⁹ Tson dze sca brieelod nian me, gzase dze co dowd me, niicle peet god me.

¹⁰ Guiedz Damasc ga, ga no ti mgui ne rililadz Jesús lë Ananí; dzigo gon me Jesús, bredz Jesús me. Pquiab me, ¹¹ dzigo rëbchaa Jesús lo me:

—Güey nëz ne lë Derech, zaatne nac lidz ti mgui lë Judas; ga bnabdiidz men Tars ne lë Saul. Zeene quiazodiidznie me naa, ¹² blu naa lo me laa tib zha lë Ananí bdziñ rxobnia guic me, zeena gbiire gan me stib.

¹³ Pquiab Ananí rëb Ananí:

—¿Saul ye? Ziyon naa name zha nac grëtaa ncuaane noyun me Jerusalén, notsidil me grë zha ne rililadz luu. ¹⁴ Haxta pxoz nroob ne rnabey bdeed diidzbey gnaaz me grëse zha ne no nëz rii.

¹⁵ —Güey —rëb Jesús lo Ananí—, sac laa naa bzooblele me, ib me tsie grë guiedz zit tsieseed me miech xtudz naa, me gneew lo grë zha rnabey, ni lo grëgaa zha Israel. ¹⁶ Na naa glu lo me ganle zha nac grë guielnë ne gan me, zeene laa me quiayunle xtsiñ naa.

¹⁷ Dzigoraa güey Ananí zaatne no Saul ga. Bdziñ me, pxobnia me guic Saul, rëb me lo Saul:

—Saul, bina ganle bets, laa Jesús gon, meñ ne rnabey, meñ ne brieequia lo luu zeene ziaad luu nëz ga, laa me pxeel naa zial naa nu; zeena gnab naa lo me gunguiac me bziaalo luu, ni ycaania luu guielbiini ne rneedz Espíritu Sant.

¹⁸ Zigne sca bnee Ananí, laa lo Saul biacgazh; lega zigne nac xmed mel nac grë ncuaan co brie lo me. Horcogazh laa me brobnis. ¹⁹ Blozh ga laa me dow stib, zhiga zhiga laa me w bire pcaa fuerz.

Goc bla dze no Saul lo grë zha ne riladz Jesús Damasc ga, dzigo brie me ²⁰ güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

²¹ Rzee zdoo grëse miech co ran zho sca rnee me, rneehaa zho:

—¿Led lëe meñ qui ga name scataa ntseeb rac Jerusalén, notsidil me grë zha ne riladz Jesús? Conque nac diidz miñ co ziaad me nu, ziadnaaz me zho tsiesan me zho lo grë pxoz ne rnabey.

²² Per zigse zie dze, mazdraa rac Saul tibaque ne rnee me lo grë miech co, lëe meñ ne zëëble diidz cxeel Dios lo guidzliu ga, nac Jesús. Grë zha Israel ne no ga, rienndraa zho dieñ pe giladz zho.

²³ Goc bla dze no me ga, laa grë zha Israel ne no ga blëe lo me; bnediidz zho rëb zho laa zho gut me. ²⁴ Dze guieel riesobnap zho gzaase zaatne rap biedz nroob ne ndze igo guiedz co nëz, riequiambëz zho ted me, gut zho me. Per gocnan mew, ²⁵ nacte gol ti pcow liu pcaalsa grë zha ne bliladz mine bnee me, bloo zho me ti len chicuid nroob, bzoob zho doow dzigo blit zho me cho

biedz nroob ne sca ndze igo guiedz co. Sca bdeeda diidz brie me ga.

Bdzin Saul Jerusalén

²⁶ Zeene bdzin Saul Jerusalén gocladz me ndzin me lo grë zha ne rliladz Jesús ga, per lel bdzieb zho zeene gon zho me, sac rliladzd zho ne nli ye me bzëëb xnëz Jesús. ²⁷ Dzigo güeynie Bernabé me lo grë zha ne nac poxtl, bzodiidz Bernabé lo zho zha gon me Jesús zeene no me nëz zie me Damasc, zha rëb Jesús lo me; ni zha bdziebd me bnee me lo grë miech cho nac Jesús, leñ dze ne blëz me Damasc. ²⁸ Dzigoraa pcaania zho me. Laa zho gogza me, zaatne zietaa zho zieseed zho miech, ib rdziebd me rnee me cho nac Jesús.

²⁹ Brieequia bla zha Israel ne rnee xtiidz zha Gres bdildiidznie zho me. Zhisaque goca, laa zho gocladz niut zho me. ³⁰ Zeene gocnañ grë zha ne rliladz Jesús gaw, dzigo güeyšan zho me guiedz Cesarea; ga brie me laa me zie nëz Tars, zaatne nac ladz me.

³¹ Leñ dze co, grëse miech ne no xnëz Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guielxtseeb nodraa zho; zigse zie dze rioguicraa zho zha nac Xtiidz Dios. Grëse zho rioxco zho mban zho zigne rnabey me, tibaque nacie Espíritu Sant zho. Ni scagaa, zigse zie dze ndal grë miech ne rzëëbraa rcaania Xtiidz Dios.

Rieted Pedr lo grë zha ne rliladz Jesús

³² Leñ ngbidz coque, zie ziaad Pedr rieted me lo grëse zha ne rliladz Jesús. Nacne güeyted me lo grë zha ne no Lida. ³³ Guiedz co, beenbey me ti mgui

lë Ené, gocle xon iz nix mgui co, ib gacd së me sac dipse me gutoo. ³⁴ Dzigo rëbchaa Pedr lo me:

—¡Ené, niinagazh goṅ laa Jesús guṅguiac luu! Na zeenṅ guche i blis xta luu.

Zigne sca bnee Pedr laa meṅ co biac, laa me guche ga. ³⁵ Grëse meṅ Lida, grëse meṅ Sarón zeene goṅ zho sca biac meṅ co, grëse zho bliladz Jesús.

³⁶ Gaxaque Lida riaan ti guiedz lë Jop. Jop ga no ti wnaa ne rliladz Jesús, lë Tabit (laa xtiidz zha Gres rnee zho me Dorc). Nquialadz me miech, grë zha ne guiend pe yquiin, ruṅ me xyudar zho.

³⁷ Lega nacle blanguidz me, laa me gut.

Zha ne rliladz Jesús ga, laa zho noxco dien zha ygueets me. Bgaz zho me, blozhse ga güeyxob zho me sti leṅ yu ne riaan nëz glaa. Xco co no zho, ³⁸ zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

³⁹ Zigne bdziṅnie zha co diidz, zienalgazh Pedr zhits zho. Bdziṅ zho lidz meṅ co, zolinëz güeynie zho Pedr zaatne zhoob me. Nzian grë wnaa viud ndxie ga, wbigbe zho lo Pedr, roon zho rlu zho grë lar ne bdib me. ⁴⁰ Dzigo bnabey Pedr brieë zho ley grëse zho, laa me biaan ga, pquitsgzhib me bnab me lo Dios. Blozhse ga wbig me lo ngutoo co, bnee me lo me rëb me:

—Guche i, Tabit.

Zigne sca rëb Pedr laa lo ngutoo co bzhiäl, zeene goṅ me laa Pedr zo ga, laa me bzobli. ⁴¹ Bzheṅ Pedr nia me, bliso Pedr me, dzigo bredz Pedr grë zha ne rliladz Jesús ga, ni grë wnaa viud co; goṅ zho laa me brieëbanle.

⁴² Dipse lad guiedz co bzhoob diidz sca brieaban wnaa co; grë zha ne bina, ndal zho bliladz Jesús dib zdoo zho.

⁴³ Nzianlaa dze biaan Pedr ga, blëz me lidz Simón ti men ne rcuudz grë guid ma.

10

Güeyzodiidznie Pedr Cornel

¹ Guiedz Cesarea, ga no ti men lë Cornel, rnabey me lo ti partid menquiib lë partid Italian. ² Zigtaa mew, zigtaa grë menlidz mew, dib zdoo zho rliladz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuane rgad zho lo grë zha ne guiend pe yquiin.

³ Tib dze, bdzele dzew tibaque zeene gon me laa ti xanjl Dios bdzin zaatne zo me, bredzlë anjl co me. ⁴ Dze rwi me lo anjl co, rdzieb me laa me pquiab. Dzigo rëbchaan anjl co lo me:

—Gocnan ganle grëse mine rnab luu lo Dios ron mew, ni ran me grëtaa yudar ne squi quiayun luu lo grë zha ne guiend pe yquiin. ⁵ Gacxe waa, laa naa zialnie diidz lo luu: pxeel bla zha ne tsie guiedz Jop tsiexi zho ti men ne lë Simón Pedr. ⁶ Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguiib zho me.

⁷ Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrë zhaguiib ne zopaa gax lo me; dib zdoo zhaguiib co rliladz zho Dios. ⁸ Blozhse bzodiidz me lo gza zha co zha bzhaac me, dzigo laa me pxeel zho ziexi zho Pedr Jop.

⁹⁻¹⁰ Biini liu, zig rwe ngbidza gaxle Jop zie zho. Lëëtaaque hor co laa Pedr biep nëz glaa guic yu ne rbëz me ga. Rcaabedz me, dzigo laga noyaclo ncuaane gow me laa me biep guic yu co ziezodiidznie me Dios. ¹¹ Dios nozodiidznie me, tibaque zeene gon me laa ti lar nroob ziad-zëëb zhan gbaa, nzhidoo gzatap nëza laaw bdziñ lo me. ¹² Grë lose ma no lo lar co, ga no ma ne rzë gza tap ni, no grë ma ne rzë zigne rzë meel, ni no grë ma ne rsiibe. ¹³ Horco bin me ti tsi men co, rëb lo me:

—Pedr, ma ne racladztaa luu gow luu zac gut luu ma.

¹⁴ Pquiab me rëb me:

—¡Miñ cogaa nagon grieelod! Wlaltaa gard gow naa grë ma beed qui.

¹⁵ Rëbchaa men co lo Pedr:

—Grë ncuaane beenlayle Dios, nodne gnee luuw ncuaan beed.

¹⁶ Blulo lar co tib, bluloquew stib, laa zeene biontaa gon mew dzigo laaw biire bzoquia nëz gbaa.

¹⁷ Lëëtaaque laa Pedr no zhgab dien pe nacne sca gon me lar co, laa zha ne pxeel Cornel ga bdziñ ro yu ne rbëz me ga, ¹⁸ rnabdiidz zho me.

¹⁹ Zhgab co no Pedr, zeene rëb Espiritu Sant lo Pedr:

—Laa tson zha bgui gon ziaadguib luu. ²⁰ Biet, bnee lo zho. Ib peet tsienied guic luu güeynal zhits zho, sac naa bnabey ziaad-xi zho luu.

²¹ Dzigo laa Pedr biet ga, bdziñ me lo zha ne pxeel Cornel ga, rëb me lo zho:

—Naa nac Simón Pedr. ¿Pe nac mandad ne ziaad to?

²² Pquiab zho rëb zho:

—Laa no ziaad xmandad Cornel, ti men ne rnabey lo men_guiib Cesarea. Laa me pxeel no ziaad-xi no luu, sac ti xan_l Dios rēb lo me cxeel me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoo me rliladz me Dios, grēse zha Israel rleynie zho me.

²³ Dzigo bredz Pedr zho bded zho nēz len_g yu; ga biaan zho wdze co. Biiniraa liu zienie zho me, ye palal zha Jop, zha ne rliladz Jesús ziana_l zhits me.

²⁴ Dze ne rac chop ngbidz brieē zho Jop, laa zho bdzi_n Cesarea. Laa Cornel bredzle grē men_lidz me, grē zha ne ndzieeldiidz me; ndal nac zha ne ndxie me lidz me, quiambēz me Pedr. ²⁵ Zeene laa Pedr bdzi_n, brieē me güeydzieelo me Pedr, pquiitsgzhib me lo Pedr nan_g me niun_g me Pedr zigne riega_n me Dios. ²⁶ Dzigo bliso Pedr me, rēb Pedr lo me:

—i_guso i, nodne yquiitsgzhib luu lo naa! Bien gan_{le} samiechaque luu nac naa.

²⁷ Dzigo laa men_guiib co guso ga. Nozodiidz zho laa zho bzēēb len_g yu. Zeene bdzi_n zho zaatne ndxie grē miech co, ²⁸ psilo Pedr bnee me lo zho, rēb me:

—Nan_{le} to gan_{le} zha Israel naa, ni ib lo xley no rnabey nodne ziaab no lidz grē zha zit, per ni ctsieelsad no zho; per laa niina laa Dios blu lo naa, grēse miech ne been_layle me nod pe nacne gbix zdoo naa gan_g naa zho. ²⁹ Gacxe waa, zigne gocnan_g naa laa to rbedz naa, zia_lnal_gazh naa zhits zha ne pxeel to. Nana sca, gol_{nē} dien_g pe nacne bredz to naa.

³⁰ Dzigo bzodiidz Cornel zha bzhaac me, rēb me:

—Nadze rac tap ngbidz ga, zig znaw gon, no naa lidz naa nu nocuan naa, ni nonab naa lo Dios. Tibaque zeene gon naa laa ti mgui zole lo naa, masaque riaazbel xab me, ³¹ në me: “Gocnaṅ gaṅle grēse miṅe rnab luu lo Dios ron mew, ni raṅ me grētaa yudar ne squi quiayun luu lo grē zha ne guiend pe yquiin. ³² Gacxe waa, laa naa zialnie diidz lo luu: pxeel bla zha ne tsie guiedz Jop tsixi zho ti meṅ ne lē Simón Pedr. Gax zaatne nac ro nisdo, ga no ti meṅ lēque Simón, rcuudz me grē guid ma; lidz meṅ co ga rbēz me; ga tsieguib zho me.” ³³ Sca nagon në meṅ co lo naa, nacne bnabey naa bиаad-xi zho luu; ni xquizhgaa luu ne laa luu ziaad. Dios zobwi gaṅle, grēse no laa no ndxie nu par yquiaadiag no miṅe bnabey me luu gnē luu lo no.

³⁴ Dzigo rēbchaa Pedr:

—¡Naraa rien naa, led yed Dios cue miech dien cho nac zha Israel, cho nacgaa zha zit! ³⁵ Sinque grēse miech lo guidzliu, tel pa guiedztaa nac zho, rcaania me zho totsaque ron zho miṅe rnabey me, ni rioxco zho zaacse rban zho. ³⁶⁻³⁷ Rgobey naa ziyonle to Diidz Ndzon ne pxeel Dios lo meṅladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, meṅ ne zēēble diidz ga cxeel me (ni Jesús gon bzaa grētaa ncuane no). Zig nac dib Judé, desde ne psilo Juan pseed me miech Galilé, laa zho gocnaṅa. ³⁸ Ni naṅaxe to gaṅle, bdeed Dios poder lo Jesús, pxeel me Espíritu Sant gocnie Jesús. Zaatne bdedtaa Jesús, pquia zdoo me miech, grē zha ne nosacsi meṅdox psilaa me zho ladznia ma; sacne nli Dios nacnie me. ³⁹ No ne nac no zha ne bzianie

me, grop lo no bdziaṅ no grëtaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho me lo cruz, ⁴⁰ per zeene goc tsoṅ ngbidza laa Dios bleeban me, ni bneedz Dios diidz biire bdziaṅ no me. ⁴¹ Led grëdraa miech goṅ me, loxaque nose bdziaṅ me; sac ib Dios bzooblo no dziaṅ no grë dziin ne been me. Haxta bdioownie no me, bdionie no me, ⁴² ni pxeel me no gnee no lo miech gacnaṅ zho ganle laa Dios bzo me, me guṅ guieḷwxtis gaḷ dze ne laa Dios cuedz grëse miech, zigtaa zha guta zigtagaa zha mbana. ⁴³ Me ga bzeet grë zha ne biadteed Xtiidz Dios lo miech padzeela, zeene rnee zho: “Grëse zha ne gliladz cho nac me, silaa Dios zho lo doḷ.”

⁴⁴ Laa Pedr bii quianeeque, zeene laa grë zha ne noquiaadiag ga bgaa guieḷbiini ne bdeed Espíritu Sant lo zho. ⁴⁵⁻⁴⁶ Grë zha Israel ne ziegza Pedr ga, zeene goṅ zho laa grë zha co psilo quianee stib diidz, ni rdeed zho xquizh lo Dios, bzee zdoo zho goṅ zho ye grë menzit rgaa guieḷbiini ne rdeed Espíritu Sant. ⁴⁷ Dzigo rëbcha Pedr:

—¿Peraa nadienṅ gbiaaz ne, ne cchoobnisgazhd ne zha rii? Laa ne bdziaṅle ganle zigne rdeed Espíritu Sant guieḷbiini lo zha Israel, scaque bdeed me guieḷbiini lo zho.

⁴⁸ Dzigo bnabey Pedr brobnis zho, laa zho bzëëb xnëz Jesús.

Blozh ga bnee Cornel lo Pedr cuëz me ga ti bla dze.

11

Bzodiidz Pedr zha güey me lidz Cornel

¹ Grë zha poxtl ne no Jerusalén, ni grëraa zha ne rliiladzle Jesús zha ne no Judé, bin zho sca bliladz gza menzit co Xtiidz Dios. ² Dzigo zeene laa Pedr bdziñ Jerusalén güey bla zho güeytilidiidznie zho Pedr, ³ blisqui zho lo Pedr pe nacne güey Pedr lidz menzit, pe nacne güeytownie Pedr zho.

⁴ Dzigo psilo Pedr bzodiidz me lo zho zha nacne güey me lidz men co, rëb me:

⁵ —Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti lar nroob ziad-zëëb zhan gbaa, nzhidoo gzatap squina laaw ziaad nëz lo naa. ⁶ Zeene bdixlo naa bui naa dien pe quia lo lar co, gon naa niapse ma no lo co, grë ma ntseeb, grë ma ne rzë gzatap ni, grë ma ne rzë zig rzë meel, ni grë ma ne rsiibe. ⁷ Lo grë ma co nowi naa, zeene bin naa ti tsi men co, në lo naa: “Pedr, ma ne racladztaa luu gow luu, zac gut luu ma.” ⁸ Dzigo pquiab naa rep naa: “Miñ cogaa nagon grieelod, wlaltaa gard gow naa grë ma beed qui.” ⁹ Nëchaa me lo naa: “Grë ncuaane beenlayle Dios, nodne gnee luuw ncuaan beed.”

¹⁰ Tson vuelt sca gon naa lar co. Blulow tib, bluloquew stib, zeene biontaa gon naaw dzigo laaw biire zey gbaa.

¹¹ Loxaque blozh gon naa lar co, laa tson zha bgui blanso ro lidz men ne blëz naa ga, pxeel men Cesarea co zho ziaadguib zho naa. ¹² Ni laa Espíritu Sant bneequ lo naa, no ganañ naa zhits zho, niicle ne zhazit nac zho; nacne bianañ naa. Ye gza xoop zha ne zialnie naa nu bzë bio no.

¹³ Bdziñ no lidz men co, psilo me bzodiidz me lo no zha bzhaac me, në me len yu no me, zeene gon

me ti xanjł Dios, rëb anjł co lo me cxeel me bla zha ne tsie Jop tsixi zho naa ¹⁴ zeeņa gane naa lo me zha grieelo csilaa Dios me lo doł grë menłidz me.

¹⁵ 'Laa naa psilo quiane lo me grë menłidz me, zeene grëse zho laa zho pcaania Espíritu Sant, ni bgaa zho grë guielbiini ne rdeed me zigne bgaaque new. ¹⁶ Ga nagon psoladz naa xtiidz Jesús men ne rnabey ne, zeene znu në me lo ne: "Nli nisse pchoobnis Juan miech, sangue to zgaa to guielbiini ne rneedz Espíritu Sant." ¹⁷ Sca nagon pcaania zho Espíritu Sant, laa zho bgaa guielbiini ne rdeed me zigne bgaaque new. ¿Cho nac naa nadien ne glisqui naa miņe ruņ Dios?

¹⁸ Zeene blozh bin zho grë miņe bnee Pedr ga, peet rëbdraa zho. Psilo zho rleynie zho Dios, rdeed zho xquizh lo me; sac hor coraa bien zho ye grë menzit zrieelo gbig zho lo Dios, gdeed me ti guielmban ndzon ne gdziņd dze lozh lo zho.

Bliladz zha Antioquí Xtiidz Dios

¹⁹ Zeene sca pquianał zho grë zha ne riladz Jesús len dze ne beet zho Xteb ga, nëzrii nëzrec bliaal zho. No zho bdziņ haxta Fenicia, no zho bdziņ Chipr, nogaa zho bdziņ nëz Antioquí. Zaatne bdziņtaa zho bnee zho cho nac Jesús, per loxaque lo grë menładz zho bnee zhow. ²⁰ Niicle ne scaw, lëëque grë zha Israel ne no Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grë zha zit co cho nac Jesús. ²¹ Ni ne nacie Dios zho, ndal grë miech co bzëëb xnëz Jesús.

²² Grë zha ne no Jerusalén, zeene gocnan zhow pxeelaque zho Bernabé güey Antioquí. ²³ Zeene

bdziṅ Bernabé Antioquí, rley me gon me scataa quiayunlay Dios grē miech co; dzigo pso me diidz lo zho ib csaand zho zhiwseed Jesús.

²⁴ Ti men dib zdoo rliladz Dios nac Bernabé, nacie Espíritu Sant me, ti miech wen nac me; gane zeene laa me bdziṅ ga nzianraa zha ne bliladz Jesús.

²⁵ Goc palal dzew, dzigo güey Bernabé guiedz Tars güeyxi me Saul, bdziṅnie me Saul Antioquí. ²⁶ Dipse ti len iz bléz zho ga grop zho, blozh pseed zho grē zha ne bliladz Jesús. Ga gloopaa psilo ne laa grē zha ne rliladz Jesús brieelē CRISTIAN.

²⁷ Len iz co blalaa zha ne noteed xtiidz Dios no Jerusalén. Dzigo brie zho ga güey zho Antioquí. ²⁸ Lad co no tib men lē Agab, psiaab Espíritu Sant guic me bnee me laa ti gbin dox gaṅ miech nēz Israel. (Ni nligaa scase goca, lē gbin co biaad len iz ne zobnabey men ne lē Claud.)

²⁹ Grē zha ne rliladz Jesús Antioquí, zeene bin zho sca rēb Agab, nacie bnediidz zho grē zho, tel palalaa ncuaane rgaa lo zho tib tib zho gdeed zhow gaclo ti gon cxeel zho lo zha Judé. ³⁰ Dzigo ptop zho gon co, zeene laaw goclo, pxeel zho Bernabé grop Saul güeyšana lo grē zha rnabey ne zo lo zha ne rliladz Jesús nēz Judé.

12

Bio Pedr ladzguiib

¹ Len dze co psilo rey Herod notsidil me grē zha ne rliladz Jesús. ² Bnabey me bgaa Jacob bets Juan, beet zho Jacob lo spad.

³ Zeene gon Herod rley grë zha ne rnabey lo menguedz Israel ran zho zha rsacsi me grë zha ne no xnëz Jesús ga, dzigo bnabeyaque me bgaa Pedr bio Pedr ladzguiib; lëëtaque len dze co noyac lni Pascw. ⁴ Laa Pedr no ladzguiib, bnabey me bzo xon nëz menguiib quianap Pedr. Quiambëz me tedse lni co, laa me cuee Pedr gan grë menguedz zha csacsi me Pedr.

⁵ Grë zha ne rliladz Jesús, zeene gocnan zho scataa ndxienap menguiib Pedr no Pedr ladzguiib, psilo zho tibaque quianab zho lo Dios gacnieñ me Pedr.

⁶ Nacle diidz pa dze cuee Herod Pedr. Wdze ne guiini liu co, laa Pedr nixguesse len ladzguiib; tib ga caden zob ti nia me, tibga menguiib tib nëz cue me, ni zhaaque zo zla zha ne quianap ro ladzguiib.

⁷ Tibaque zeene biab ti biinidoo len ladzguiib, laa ti xanjl Dios bdziñ ga. Bdziñ me, pcaañnia me cue Pedr, pcaaan me Pedr, rëb me:

—¡Na zeen guche i!

Zigne sca bnee anjl co, lega zhal caden ne zob nia Pedr ga bzhiala brieew nia Pedr; ⁸ dzigo rëbchaa anjl co lo Pedr:

—¡Pxidoo len luu, pquiaa lab luu ni luu!

Blozhse pxidoo Pedr len Pedr, ni pquia lab Pedr; rëbchaa anjl co:

—¡Wbix xab luu na, zeen dënal zhits naa!

⁹ Nalse Pedr zhits anjl co laa Pedr brieeg ga. Riend Pedr ne nli nosilaa anjl co Pedr, masaque rzac me nonixquieel mew. ¹⁰ Bded zho chop len yu zaatne ndxie menguiib ne quianap, laa zho bdziñ zaatne quia puert guiib ne rrieeg ro nëz. Zigne bdziñ zho, zhal puert co bzhiala; laa zho brieeg. Bzënie anjl co

Pedr spalal, zeene gol zho zaatne rdedlsa nöz co, dzigo laa anjl co psan Pedr ga.

¹¹ Dzigoraa bien Pedr led nonixquieeld Pedr, nli Dios pxeel xanjl me güeysilaa Pedr ladznia Herod, zeena gleyd zha Israel nian zho grë guielnë ne nded Pedr.

¹² Dzigo laa Pedr zie nöz lidz Marí, xniaa Juan Marcw; lëëtaque hor co nzian zho ndxie ga quianab zho lo Dios. ¹³ Zeene bdziñ Pedr pcaañnia Pedr ro yu. Brie ti ndzooop ne quia dziin ga lë Rode, zieso ndzooop dien chow.

¹⁴ Zeene beenbey ndzooop co tsi Pedr, rley ndzooop. Lo guielbley co niicle pxaldaque ndzooop ro yu, rias ndzooop zienie ndzooop diidz lo grë zha ne ndxie ga; rëb ndzooop laa Pedr bdziñ ro yu ga.

¹⁵ Per bliladzd zhow.

—¡Dien pe rool luu! —rëb zho—. ¡Ncuane gliladzd ne rnee luu!

—¡Coo, nli lëë mew! —rnee ndzooop—, laa me zo ga.

—¡Led meda, —rnee zho—, bod anjl ne quianap mew!

¹⁶ Sca no zho, laa Pedr bii nocaañnia ro yu. Zeene güey zho pxal zho ro yu, bzee zdoo zho gon zho nli Pedra, laa Pedr zo ga. ¹⁷ Dzigo blunia Pedr lo zho gnee nguiedzd zho; laa zho bzëëbnie Pedr len yu. Ga psilo Pedr bzodiidz Pedr lo zho zha güeybee xanjl Dios Pedr len ladzguiib; ni pso Pedr diidz lo zho sodiidz zhow lo Jacob, ni lo grëraa zha ne nacgrë zho. Blozhse ga, laa Pedr brie ga.

¹⁸ Zeene biini liu, grë menquiib ne pquianap Pedr len ladzguiib ga, rdzieldraa zho zha gun zho; sac ib biend zho dien yo Pedr. ¹⁹ Zeene laa Herod

pxeel zha ne ziebee Pedr ladzguiib, pa sële Pedr. Dzigo güey zho güeynie zho diidz lo Herod; nacne bnabey Herod gocredz grë zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brieë Judé zey me Cesarea.

Dow mziog Herod

²⁰ Len dze co, pcaalsa menüguiedz Tir ni menüguiedz Sidón güeynee zho lo Herod; sacne rlëënie Herod zho. Lëëque ti men ne nac dziin lo Herod lë Blast güeynie zho bnee lo Herod, bnab zho tilniedraa me zho, niicle zhagaaw laa zho gbig lo me; sac grëse ncuaane rquiin zho, grë guiedz ne rnabey me ga rrieew.

²¹ Dzigo bzo Herod ti dze ne tsie zho tsiezodidznie zho me. Zeene gol dze co, got me lar niazh ne racw rey; bdziñ me bzob me lo zhixcan me, psilo me bnee me lo grë miech co. ²² Goc palo quianee me, psilo zho rleynie zho me, nguiedz roptsie zho rnee zho:

—¡Led miechdraa i gon! ¡Ti diosle i nac men qui quianee lo ne!

²³ Laa me bii quianeeque, zeene biet tib xanjl Dios bdiñ me, psilo dow mziog me, gagazh gut me. Sca gut me, sac beenbeyd me ne Dios nac men ne non, men ne rnabey. ²⁴ Laa Xtiidz Dios, zigse zie dze laaw quiagaazraa lo miech; ndal zha cub ne nozëëb xnëz me.

²⁵ Jerusalén ga no Bernabé grop Saul len dze co; zeene bialse xtsiin zho, laa zho brieëque ga laa zho zie nëz Antioquí zienie zho Juan Marcw.

13

¹ Lo grë zha ne rlıladz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grë zha co no Bernabé, no ti mgui lë Simón ne rnee zho “Men Yaas”, no ti men Ciren lë Lus, gaque no Saul, ni ti men lë Manaén, bets pchoob Herod.

² Laa ti dze lëëtaque ndxie zho noyoolnie zho Dios ni nocuan zho, zeene laa Espíritu Sant bnee lo zho, rëb me:

—Golcueextso Bernabé i grop Saul, zeena csilo zho lo dziin ne gded naa gun zho.

³ Blozhse pcuan zho, blozhse bzodiidznie zho Dios, dzigo pxobnia zho guic Bernabé grop Saul, bnaab zho lo Dios gacnieñ me zho; bnee zho lo zho, laa zho zie.

Güey Saul Chipr grop me Bernabé

⁴ Ga brieë Bernabé grop Saul zienie Espíritu Sant zho bdziñ zho guiedz Seleucia, Seleucia bzëëb zho barcw laa zho zie nëz Chipr (ti guidzliu win ne no lo nisdoo). ⁵ Ye Juan Marcw zienie zho gun xyudar zho.

Bdziñ zho ro guidzliu win co zaatne ndxie guiedz Salamin, biet zho barcw güey zho grë len xyadoo men Israel ne no ga, güeyseed zho miech Xtiidz Dios. ⁶ Ga brieë zho güeyted zho dipse lo guidzliu co bdziñ zho guiedz Pafos; guiedz ne bdedtaa zho bnee zho Xtiidz Dios lo miech. Pafos, ga beenbey zho ti men Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox rool me.

⁷ Guiedz co ga no ti meṇ lë Sergio Paul, meṇ co zob rnabey guidzliu co; dzigo lo meṇ co ga no Barjesús. Ti meṇ nixbiini nac meṇ ne lë Sergio ga, no me liaadz gacnaṇ me zha nac Xtiidz Dios; dzigo bnabey me gocredz Bernabé grop Saul. ⁸ Zeṇe bdziṇ zho psilo Barjesús quiaguib me dien pe yquiaaqui yquiaadiagd meṇ rnabey co Xtiidz Dios.

⁹ Dzigo buitipaque Pabl lo Barjesús (Pabl nac sti lë Saul), ni ne nacie Espíritu Sant Pabl ¹⁰ rëb Pabl lo me:

—¡Biche nu zhin meṇdox! Zhin meṇdox goṇ nac luu, squitaa noquidiee luu miech, notsidil luu diidzli. ¿Zha rna dze ne csaan luu miṇe nac luu i, squi notsidil luu Xtiidz Dios? ¹¹ Goṇ ganle, ¡laa Dios csiaabzi luu, niinagazh laa lo luu ycow, ni spalal xbiini ngbidz gaṇdraa luu!

Zigne sca rëb Pabl laa lo meṇ co pcow, nëzrii nëzrec zie me racladz me dien cho gnaaz nia me.

¹² Zeṇe goṇ meṇ rnabey co sca pcow lo Barjesús, hor co bliladz me Xtiidz Dios, bzee zdoo me goṇ me scataa poder ne ziaadnie zhiwseed Dios.

Bdziṇ zho guiedz Antioquí

¹³ Bded ga, laa Pabl gza Bernabé ni Juan bzëëb barcw stib, laa zho zie nëz xtan zha Panfil. Bdziṇ zho guiedz Perg laa zho briele leṇ barcw, ga ptso Juan lo zho, laa Juan zey nëz Jerusalén; ¹⁴ laa zho bio nëz zie zho nëz xtan zha Pisid, bdziṇ zho sti guiedz lë Antioquí.

Zeṇe goṇ dze ne rdziiladz miech lo dziin, güey zho xyadoo zha Israel. ¹⁵ Blozhse bded zha ne blab lo guits ne pquiaa Moisés, ni blab zho miṇe pquiaa grëraa zha ne biadteed xtiidz Dios padzeela, dzigo

laa men ne rnabey yadoo co bnee lo Pabl grop Bernabé, rëb me lo zho:

—Telne racladz to gnee to chop lan xtiidz to, zac gnee tow niina.

¹⁶ Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib guiedz zha ne noxco gban zigne rnabey Dios; golquiaadiag chop lan xtidz naa ganle gne naa lo to:

¹⁷ 'Dios ne rliladz no nac no men Israel, ib me bzooblo grë pxozgol no laa zho bgab lo me. Me gocniën zho zeene bio zho ladz men Egipt, ni me güeysilaa zho ga, blu me ganle ne nli men nroob nac me. ¹⁸ Dipse len choo iz ne bio zho grë dan bidz ne bded zho ga, pxecw me grëtaa xquielntseeb zho. ¹⁹ Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho. ²⁰ Ni dipse len tap gayoo groļ iz, me bzooblo grë zha ne bzo bnabey lo zho; lëë lultm zha ne bzo me ga bnabey lo zho goc profet Samuel. ²¹ Blozh ga, laa zho bnab so ti rey gnabey lo zho, nacne bzo me Saúl, bzob Saúl choo iz goc me zhirey zho. Lëë pxoz Saúl ga brieelë Cis, men ne ziaad lo xtii pxozgol no Benjamín. ²² Zeene laa Dios ptiche dziin co lo Saúl, dzigo bzo me David goc rey. Lëë David ga rzeet Dios zaatne znu rnee: “Rleynie naa xingan Isaí zha ne lë David, laa naa gonle ib zun David mine gnabey naa.” ²³ Ni lo xtii David co nagon brieequia Jesús, men ne pxeel Dios lo guidzliu biaadsilaa miech lo dol, zigne psanle me diidz lo xmengol no padzeela.

²⁴ 'Len dze ne merle xoobnen cho nac Jesús, len dze co bnee Juan Bautist lo grë men Israel: csaan zho xquieIntseeb zho gnab zho perdon lo Dios, zeeṇa chobnis zho. ²⁵ Laa zeeṇe zhile gdziṇ dze ne gut zho Juan, dzigo bnee me lo miech rëb me: "Golḡacnaṇ gaṇle, led naad nac men ne quiambëz to ga cxeel Dios. Merle gunbey to me, ti men non nac me, per ni par gac naa ti ngunḡziin win ne glit lab me ni me raguiald naa."

²⁶ 'Golḡacnaṇ sca gaṇle bets: zigtaa tow ne ziaad to lo xtiṇ Abraham, zigtagaa tow ne nac to miech stib guiedz zha ne rliladzle Dios, ib laa Dios pxeel Jesús csilaa me ne lo xtol ne grëse ne. ²⁷ Grë zha Jerusalén ni grë zha ne rnabey lo zho, ib biend zho cho nac Jesús, niicle ne scataa gzobse dze ne rdziladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bnab zho gut me zigne bneese grë zha co. ²⁸ Niicle ne goṇ zho peet xtold me, niicle ne brieequiad dol ne pquiaqui zho me, per bguib zho bdeeda diidz bnabey Pilat gut me.

²⁹ 'Blozhse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne blit me lo cruz, güeyqueets zho me. ³⁰ Per bleeban Dios me. ³¹ Grë zha ne güeynal zhits me zeeṇe brieeme Galilé bdziṇ me Jerusalén, nzian zho goṇ me; ni niina grëse zho laa zho quianee lo miech gaṇle cho nac me.

³² 'Scaquegaa no grop no Bernabé, laa no ziaadnie diidz lo to gacnaṇ to gaṇle niina ne laa Dios bleeban Jesús, laa me been mine bnee me lo pxozgol ne padzeela. ³³ Lëe Jesús ga raquiet

lo Salm brop, zaatne rnee: “Xpëed naa nac luu. Desde nadze laa zho gunbey ne Xpëed naa nac luu.” ³⁴ Ni bzeetle Dios ne laa me cueeban Jesús, bzeetle Dios xind xcuerp me len baa; min co ga raquiet lo Xtiidz me, zaatne rnee: “Zunlay naa luu, zigne bnese naa lo David gun naa.” ³⁵ Laa stib lo Salm ne pquiaa David rnee: “Gdeete luu diidz xin xcuerp naa len baa.” ³⁶ Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo xcuerp me. ³⁷ Led meda, zhaa men ne raquiet ga; gacxe na rneew waa peet gacd xcuerp men co, zbeeban Dios me.

³⁸⁻³⁹ ¡Grëse to bets, golgacnan sca ganle! ¡Jesús nac men ne rsilaa miech lo dol! Zha ne gliladztaa me dib zdoo zho, tel pe nactaa grë xtol zho, sanmbe me zho. Mine waltaa brieelod ngaa to, niicle ne zienal to xley Moisés; sac niicle gun tow grëse zigne naca, csanmbeda to lo dol.

⁴⁰ ¡Golguien sca gacnroladzde to! Zeena ygaade to mine bzeet zha ne biadteed xtiidz Dios padzeela, zeene znu bnee zho:

⁴¹ Grëse to ne rzhidznie to mine nac diidzli, bii zan to ganle laa naa gun ti milagr nroob ne gzee zdoo to;

per znitlo to, sac gliladzde tow niicle guiaad zha ne gzodiidza lo to.

⁴² Blozh bnee Pabl; laa zeene laa Pabl griee ga grop Pabl Bernabé bnaab grë miech co lo zho, siguiel zho quiet sti zhmal co biire tsie zho tsieseed zho zho. ⁴³ Zeene brie zho len yadoo co, nzian grë zha Israel, nzian grë zha stib guiedz zha ne rliladzle Dios zienal zhits zho. Nèz no zho bnee

zho lo grë miech co tiblⁱque tso guic zho tsienal zho zhiwseed Dios, guien zho ganle pa lotaa noxco me zho.

⁴⁴ Biet sti zhmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtiidz Dios. ⁴⁵ Zha ne rnabey lo grë zha Israel ne no ga, zeene gon zho scataa ndal miech ne goclo ga, blëe zho lo Pabl, ndox zho lo me, rëb zho led diidzlid nac mine rseed me.

⁴⁶ Niicle Pabla, niicle Bernabéw bdziebd zho, dzigole bnee zho lo zho rëb zho:

—Nli to glo riegual yquiaadiag Xtiidz Dios ne nac to zha Israel. Per ne squi run to guielntseeb nëde to ycaania tow par ygaa to guielmban ndzon ne rneedz Dios; na laa no guioseed grë zhazit. ⁴⁷ Ni scalegaa rnabey Dios gaca, sac znu rnee me:

Laa naa bzole luu tsienee luu Xtiidz naa lo grë menzit,

luu gac zig ti biini ne gziini lo grë miech ne ndxie lo guidzliu;

zeena guien zho zha laa zho lo dol.

⁴⁸ Grë zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grëse zha ne nole ygaa guielmban ndzon ne gdeed Dios ga, grëse zho dze cogazh laa zho bliladz Jesús. ⁴⁹ Dipse dan co, gocnan miech Xtiidz Dios.

⁵⁰ Grë zha Israel ne rlëe lo Pabl ga, psilo zho pquiil zho grë men wnaa ne nac diidz noxco Xtiidz Dios, ni güey zho güeynee zho lo grë zha ne nac men non lad guiedz co; zeena ctsidil zho Pabl grop Bernabé, gunxoon zho zho dan co. ⁵¹ Zeene bin Pabla grop Bernabé, par glu ne nonguield sca been

zha co zho, beenmbe zho grë yudie co ni zho laa zho brieë ga, laa zho zie nëz Icon. ⁵² Grë zha ne bliladz Jesús ga, nguieel rac zho, rdeed Espíritu Sant guieelbiini lo zho.

14

Bdziñ Pabl Icon grop me Bernabé

¹ Zeene bdziñ Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grë zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza. ² Laa grë zha Israel ne bliladza, psilo zho bloo zho diidz lo grëraa miech guiedz co glëënie zho Pabl grop Bernabé. ³ Niicle sca been grë zha co per wbid zho, bii blëz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grë milagr ne bdeed me diidz run zho par glu ne nli Xtiidz me nonee zho.

⁴ Dzigo grë miech ne no lad guiedz co goc zho chop dii, grol zho racnie grë zha Israel ne rlëë ga, zgrol zho racnie grop zha poxtl co. ⁵ Zha ne rlëë ga, zigtaa zha Israela zigtagaa zha guiedz cow, bnedidz zho grë zho wxtis laa zho tsie tsiedeedquie zho Pabl grop Bernabé. ⁶⁻⁷ Zeene bin Pabla grop Bernabé, mazd laa zho brieë ga, laa zho zie nëz xtan zha Licaon. (Güey zho Listr, güey zho Derb ni grëraa guiedz ne ndxie gax ga; güeynee zho lo grë miech co zha nac Xtiidz Dios.)

⁸ Guiedz Listr ga gon zho ti mgui në ni, wlaltaa lo xquieelmban me ib gard së me; sac scale në ni me zeene gol me. ⁹ Zeene gon Pabl dze zob me rquiaadiag me miñe nonee Pabl lo grë miech co,

dzigo dzeque bui Pabl lo me, gon Pabl dib zdo me rliadz me nli zrieelo guṅguiac Dios me; ¹⁰ dzigo nguiedz bnee Pabl lo me, rēb Pabl:

—¡Beeṅni ni luu, zeeṅa bzoli!

Zigne sca bnee Pabl, znuse guso nguzhoon me, bzoli me laa me psilo bzē. ¹¹ Zeēne gon grē miech co sca biac me, psilo zho con xtiidz zho nguiedz rnee zho:

—¡Diosle i gon, nasi zig rlu miech rlu me laa me biet gbaa ziaadgaṅ me ne!

¹² ¡Masaque rzac zho lē xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibbraa rnee. ¹³ Ro guiedz co ga zob xyadoo zhimdio zho Júpiter, dzigo brieē pxoz ne no yadoo co grē me miech lad guiedz, zienie zho ngon, zienie zho guiee, naṅ zho gut zho ngon co cogon zho ma lo Pabl grop Bernabé. ¹⁴ Zeēne bien Pabla grop Bernabé wbinladz guic zho. Ptsiez zho xab zho, bzēēb zho lad grē miech co, nguiedz rnee zho lo zho:

¹⁵ —¡Ndzinli golgac! ¿Pe nacne squi rac to? ¡Golgaṅ gaṅle miech guidzliuque nac no, tibaque nac ne grē ne! Laa no ziaad lo to ziadseed no to wseed cub ne nac Xtiidz Dios, zeeṅa guieṅ to csaan to grē ncuaane paat rquiind ne run to i, gbiire gbig to lo Dios meṅ ne nlipaa mban. Me bzaa gbaa, me psan guidzliu, me psan nisdoo, grēse ncuaane no gbaaw, ncuaane no lo guidzliuw, ncuaane no lo nisdoo, me bzaaw grēsew. ¹⁶ Niicle ne glo bdeed me diidz been miech grē ncuaane gocladztaa zho, ¹⁷ per psaanladzd me zho. Gocnie me zho zigne racnieque me ne niina, rsiaab me nisguie rac

xcuaa ne, rneedz me ncuaane rdioow ne gzataa dze, rneedz me guiebley lo ne.

¹⁸ Niicle sca rnee grop zha poxtl co, nen bin grë miech co diidz beete zho ngon co ngogon zho ma lo zho.

¹⁹ Leñ dze co, blalaa zha Israel ne ziaad nëz Antioquí ni nëz Icon bdziñ Listr ga. Psilo zho bloo zho diidz lo grë miech co gocntseeb zho lo Pabl; güey grë miech co bdeedquie zho Pabl.

Masaque bzhaac zho gutle Pabl, bdoobniu zho me güeyron zho me tibladd ro guiedz. ²⁰ Grë zha guiedz co zha ne rliladzle Jesús, zeene bin zhow, güey zho zaatne nix me ga. Lëëtaaque ndxie zho lo me, zeene laa me guche; ga guche me laa zho zeynie me nëz leñ guiedz. Biini liu, pcaa me nëz grop me Bernabé laa zho zie nëz Derb.

²¹ Bdziñ zho Derb, psilo zho bnee zho Xtiidz Dios lo grë miech co; ndal grë zha ne bliladza. Blozh ga, laa zho wbi ga biire güeyted zho nëz Listr, güeyted zho Icon, ni güeyted zho Antioquí, ²² güeynee zho lo grë zha ne rliladz Jesús ga, pchoobladd zho zdoo zho, pso zho diidz lo zho, niicle nroob guieñe ne noded zho per none tibaque gac guic zho tsienal zho Xtiidz Dios; sac ible sca nzian ncuaane ted zho laga gdziñ dze ne gdziñ zho zaatne rnabey Dios.

²³ Tib tib guiedz co, bzose zho grë zha ne so gnabey lo grë zha ne rliladz Jesús ga; rlozhse rcuan zho grë zho zho ni rzodiidznie zho Dios, dzigo laa zho rsañ zha co ladznia me yquianap me zho.

Bdziñ Pabl grop Bernabé nëz Siria stib

²⁴ Nëz no Pabl grop Bernabé bded zho dib xtan zha Pisid, bzëeb zho xtan zha Panfil, bdziñ zho

guiedz Perg. ²⁵ Blozhse bnee zho Xtiidz Dios lo grë miech co, dzigo laa zho brieë ga, bdziñ zho guiedz Atalia. ²⁶ Atalia ga bzëëb zho barcw bdziñ zho sti guiedz ne lë Antioquí, gataa laa zho psiaal viaj co. Guiedz coque ga brieë zho grop zho güey zho grë guiedz co güeynee zho Xtiidz Dios lo miech; zeeñe sca bnab grë zha ne rliladzle Jesús ga lo Dios gacniën me zho tsiegun zho xtsiñ me.

²⁷ Zigne bdziñ zho Antioquí ga, bnabey zho pcaalsa grëse zha ne rliladz Jesús, bzodiidz zho lo grë miech co grëse zha gocniën Dios zho güeygun zho xtsiñ me, ni zha rquia zdoo Dios zha ne nacd zha Israel rbedz me zho ye zho rzëëb xnëz me.

²⁸ Xtselaa bio Pabl ga grop me Bernabé, blëz zho lo grë zha ne rliladz Jesús ga.

15

Pcaalsa zho Jerusalén

¹ Ga no Pabl grop Bernabé zeeñe bdziñ bla zha ne ziaad nëz Judé, psilo zho noseed zho grë zha ne rliladzle Jesús ga, rnee zho lo zho ib none tso zho bey zigne rnabey xley Moisés, niicle ne rliladzle zho Jesús; zeeña sca csilaa Dios zho lo xtol zho.

² Zeeñe gon Pabl sca noseed zha co miech, nacne bdildiidznieque Pabl zho grop Pabl Bernabé. Dzigo mazd bnediidz grë zha ne rliladz Jesús ga, bzo zho zla zha ne gacgza Pabl grop Bernabé tsie zho Jerusalén tsienabdiidz zho lo zha poxtl ni lo grë zha ne rnabey lo zha ne no ga, diën pe guiab zho.

³ Nacne brieë zho zie zho. Nëz no zho bded zho xtan zha Fenicia, xtan zha Samar; zaatne notaa zha ne rliladz Jesús, rzodiidz zho lo zho grëse zha nobedz Dios grë zha ne nacdreaa zha Israel, rsaan

zho grē zhiwseed xmenḡol zho laa zho rliladz Jesús. Rley grē miech co ron zhow. Sca bio zho nēz, laa zho bdziḡ Jerusalén.

⁴ Zeene bdziḡ zho Jerusalén, pcaalsa grē zha poxtl, grē zha ne rliladz Jesús ga, ni grē zha ne rnabey lo zho. Dzigo ga bzodiidz Pabl grop Bernabé grēse zha gocnie Dios zho, zeene güeyted zho grē dan co güeynee zho Xtiiḡz me lo miech. ⁵ Miḡ co quianee zho zeene guso bla zha ne glo goc farisé rēb zho, grē zha ne nacd zha Israel zeene laa zho rliladz Jesús ib none tso zho bey, ni none guḡ zho grēse miḡe rnabey Xley Moisés. ⁶ Dzigo nacne bnabey grē zha poxtl co ni grē zha rnabey co, ycaalsa zho stib dieḡ zhapaa gaca, pe nonguiela tso grē zha zit bey co.

⁷ Zeene pcaalsa zho, goc pa lo quianee zho zeene guso Pedr rēb Pedr lo zho:

—Grēse to bets, goḡquiaadiag miḡe gne naa lo to nu gaḡle. Led rsoladz to, zeene griḡḡpaa psilo quiagaaz Xtiiḡz Jesús lo miech, ible Dios bzooblo naa pxeel me naa gaseed naa grē zha ne nacdree zha Israel gliladz zho me. ⁸ Ni megaa ne ruḡbey me zdoo tib tib miech, laa me blu gaḡle, niicle ne zha zit nac zho laa me pcaania zho; pxeel me Espíritu Sant nacie zho, zigne pxeelaque Espíritu Sant nacie ne. ⁹ Gotsaa gwi ne gaḡle, led yed Dios rbe dieḡ cho nac zha Israel cho nacгаа zha zit; zigtaa zhaw, zigtagaa new, laa me pcaania ne porne dib zdoo ne bliladz ne me. ¹⁰ ¿Zha nac dzigo ne racladz to gnabey to grē zha co guḡ zho grē miḡe nac xley ne? ¿Pe niacxe rienraa ne lo Dios dzigo? ¡Niicxe ne name, niicxe xmenḡol

ne brieelod niuna zigne naca! ¹¹ Golguien ganle, zigtaa zhaw zigtagaa new laa me csilaa ne lo dol grè ne, per nacda por ncuane rdziuun ne; sinque laa me csilaa ne porne nquialadz me ne.

¹² Zeene blozh sca bnee Pedr, dzese biac zho grè zho; dzigo laa Pabl grop Bernabé psilo bzodiidz grètaa milagr ne blu Dios lo grè menzit zaatne güeynee zho Xtiidz me lo grè miech co. ¹³ Blozhse bnee grop zha co, laa Jacob gusoque rëb me:

—Grëse to bets, golquiaadiaggaa chop lan xtidz naa naganle gne naa lo to. ¹⁴ Laa Pedr bzodiidzle lo ne ganle zha psilo bredz Dios grè zha zit, bzooblo me zho ye zho gac zha ne sëëb xnëz me. ¹⁵ Ga nagon goca zigne zhobneese lo Xtiidz me, miñe pquiaa grè zha ne pxeel me padzeela, rneew:

¹⁶ Tedse nu ganle,
laa naa cuedz grëse miech ne ygab lo naa;
grè zha xtii David zha ne bzozit, laa zho gbig stib.

¹⁷ Horco grëse zha zit, laa zho gon ganle cho nac naa,
zeena grieelo sëëb zho xnëz naa.

¹⁸ Znu nac xtiidz Dios, ni padzeelale bzeet me ne laa me gun miñ co.

¹⁹ 'Miñ co nagon grè zha zit ne rliladzle Jesús, ib nonguielda ga gnabey ne zho gun zho miñe nac xley ne. ²⁰ Sinque mazd yquia tib diidz cxeel ne lo zho gon zho, grè ma ne rut miech rgogon zho lo grè zhimdio zho, ib gowd zho bëël co; grè ma ne rxieed ren zeene ret ma, gowd zho ma; ni niicle grèragaa ma ne gut zho, ib gowd zho xchen ma. Grè zha bgui, nodne tsonie zho wnaa ne nacd tsieel zho; niicle wnaagaaw, nodne tsonie zho mgui ne nacd tsieel zho. ²¹ Niicle mazd padzeelaw, tibaque

quiayon miech guṇd zho miṇ co; sac desde hor co tib tib guiedz bzoſe Moisés tib zha ne gneew lo miech leṇ xyadoo zho, dze ne rdziiladz zho lo dziin.

²² Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grëraa zha ne rliladz Jesús ga. ²³ Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nac poxtla, zha ne rnabeya ni grëraa zha ne rliladz Jesús nuw, grë no laa no rquiaabdiuzh to grëse to bets ne nac to zha ne no guiedz Antioquí, ni grëraa guiedz ne ndxie nëz Siria i, ni nëz Cilis.

²⁴ Niina ne gocndion no laa bla zha ne nacgrë no nu biaad lo to i, biaadcots zho guic to dien peraa no guṇ to. Gacnan to ganle led nod pxeel zho, ²⁵⁻²⁷ gane niina bzodiidz no grë no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac goṇ rbeeladz zho xquielmban zho quiayun zho xtsiin Jesús.

²⁸ Lo godiidz ne bdziun no, laa no bdzianle nonguielda ne dien peraa gnabey no to guṇ to, ni niiclegaa Espíritu Sant scaque rnee me. Rquiind ne peraa guṇ to, lëëlew ga totsaque tsoxco to ²⁹ gowde to xpëel grë ma ne rgogon miech lo grë zhindio zho; grë ma ne rxieed ren zeene ret ma, gowde to ma; ni niicle gowdgaa to xchen grë ma ne gut to. Grë zha bgui, nodne tsonie zho wnaa ne nacd tsieel zho; niiclegaa wnaaw, nodne tsonie

zho mgui ne nacd tseeel zho. Miñ rii nagon nac mine no tsoxco to.

'Guiaannie Dios to sca."

³⁰ Gza tap zha co laa zho brieel Jerusalén, laa zho zie nëz Antioquí. Zeene bdziñ zho ga, bnabey zho pcaalsa grëse zha ne riladz Jesús, dzigo bdeed zho guits co lo zho. ³¹ Zeene gocnañ grë zha co zha rnee low, rley zho sacne pchooblada zdoo zho. ³² Blozhse ga, psilo Judas grop Silas pseed zho grë miech co Xtiidz Dios, zeena dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

³³ Xtselaa blëz Silas ga grop Judas, laa zeene gol dze ne laa zho grieel gbiire zho nëz Jerusalén stib, ine güeyzonëz grë zha co zho, rdeed zho xquizh lo zho. ³⁴ [Laa zho nole nëz, tibaque zeene rëb Silas laa Silas guiaanaque ga spalal dze.] ³⁵ Laa Pabl grop Bernabé ible laa zho biaan ga been zho xyudar grë zha ne noseedle miech ga.

Ptso Pabl grop Bernabé

³⁶ Goc palal dze no Pabl guiedz Antioquí ga grop me Bernabé, zeene rëb me lo Bernabé laa zho gbiire tsie grë guiedz ne güeynee zho Xtiidz Dios lo miech ga, par gacnañ zho dien yo grë zha co. ³⁷ Dzigo gocladz Bernabé ye Juan Marcw nienie zho; ³⁸ per bzhiguiel Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynal Juan nlozh nsiaal zho lo dziin co.

³⁹ Miñ co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nëz grop Bernabé Juan bzëeb zho barcw zie zho nëz lo guidzliu win ne no lo

nisdoo lë Chipr; ⁴⁰ laa Pabl goc grop Silas. Blozhse bñab grë zha co lo Dios gacniën me Pabl grop Silas, laa zho brieë ga ⁴¹ güeyted zho grë guiedz ne ndxie nëz xtan zha Siria, grë guiedz ne ndxie nëz Cilis, güeynee zho lo grë miech ne rliladz Jesús nëz co, güeychoobladz zho zdoò zho.

16

Beenbey Pabl Timoté

¹ Leñ dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne rliladzaque Jesús lë Timoté, ti meñ Israel ne rliladzle Jesús nac xniaa me, laa pxoz me nac meñ Gres.

² Grëse zha Listr, zha Icon, zha ne rliladz Jesús tibaque rzeet zho Timoté rnee zho ti miech ndzinli nac me, nace bnee Pabl lo me tsienal me zhits Pabl. ³ Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeena tsod pe glisqui grë zha Israel ne no nëz co.

⁴ Laa me zienal zhits Pabl. Guiedz ne rdedtaa zho rnee zho lo grë zha ne rliladz Jesús ga, tsoxco zho guñ zho grë miñe pso zha poxtl ga diidz, grë zho zha rnabey ne no Jerusalén. ⁵ Zeene ron grë zha cow, dib zdooraa zho rnalo zho Dios, zigse zie dze racnzianraa zha ne rliladz Jesús.

⁶ Blozh ga, tibbdeed zho xtan zha Frij ni xtan zha Galás, sac bdeete Espíritu Sant diidz nienee zho Xtiidz Dios lo miech grë guiedz ne ndxie nëz Asia ga. ⁷ Zeene bdziñ zho zaatne rsilo xtan zha Misia gocladz zho nie zho nëz xtan zha Bitin, scaque bdeete Espíritu Sant diidz nie zho nëz co. ⁸ Dzigo

tibbdeed zho dib xtan Misia bdziñ zho ti guiedz ne ndxie ro nisdoo lë Troas.

⁹ Guieel co blulo ti mgui Macedon lo Pabl, rnab me gun Pabl guielnzaac tsie Pabl nëz co, tsiegun Pabl xyudar grë miech co.

¹⁰ Nacne hor cogazh bzhixcuaa no, sac bien no ible Dios racladz guio no nëz co guionee no Xtiidz me lo miech.

¹¹ Dzigo brie no ga bziaab no ti len barcw bdziñ no ti lo guidzliu win ne no lo nisdoo lë Samotras. Biini liu brie no ga bdziñ no Neápolis, ga bliaaz no wdze co. ¹² Biini sti liu co brie no Neápolis bziani no bdziñ no Filip. Lëe guiedz co riaan zaatne rsilo xtan zha Macedon, niapse men Roma no ga; nzianlaa ngbidz bliaaz no ga.

¹³ Laa tib dze ne rdziiladz miech lo dziin, brie no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdziñ no nzianlaa men wnaa ndxie ga, dzigo psilo no bnee no lo zho cho nac Jesús. ¹⁴ Lad co no ti wnaa Tiatir lë Lidia, rto me grë lar nizhnie nlaan mine nac lar niazh; ye me dib zdoo me rliladz me Dios. Laa me noquiaadiag mine nonee Pabl ga, zeeñe psiaab Dios guic me bililadz mew.

¹⁵ Dzigo hor cogazh brobnis me grë menlidz me; blozh ga, bredz me no guiobiaaz no lidz me, nëchaa me lo no:

—Telne rzac to nli dib zdoo naa rleyne naa Dios, gohtë sca cuëz to lidz naa.

Rzoobguic me lo no, nacne biobiaaaze no lidz me.

Bio Pabl ladzguiib grop Silas

¹⁶ Tib dze, lëëtaque zio no zaatne riezodiidznie no Dios, bdieelo no ti ndzooop nguieg noguitnie men_udox. Zëëb diidz grëse tel pe rnabdiidz miech lo ndzooop, rnee men_udox cow; nroob dimi ne riab nia zha ne rnabey ndzooop. ¹⁷ Na_u ndzooop zhits no, nguiedz roptsie ndzooop rnee ndzooop:

—¡Xtsiin Dios ndzon ne zob gbaa gon noyun gza mgui rii! ¡Laa zho ziadseed to zee_una gacna_u to zha csilaa Dios to lo xtol to!

¹⁸ Nzian dze zaatne rdzieeltaa no ndzooop tibaque sca rnee ndzooop. Zeene bieedtaa guic Pabl, biireque me bnee me lo men_udox ne noguitnie ndzooop ga, rëb me:

—Jesús nacie naa, ni laa naa rnabey luu gon niinagazh psaan ndzooop qui.

Zigne sca rëb Pabl laa men_udox co bzhoon.

¹⁹ Gza zha ne rnabey ndzooop ga, zeene gon zho run_udraa ndzooop guie_unsin co gdziniaa ndzooop dimi, bnaa_uaque zho Pabl grop Silas güeyzo zho zho lo wxtis, rëb zho:

²⁰⁻²¹ —¡Golwi ganle pe nac ncuaane noyun grop zha Israel rii lad guiedz nu! ¡Nogodil zho miech, laa zho quiaseed miech ncuaane nonguieldraa dziuun ne nac ne zha Roma!

²² Pcaalsa grëse miech co, grëse zho ntseeb rac zho lo Pabl grop Silas. Dzigo bnabey wxtis co brieexab zho grop zho bdeed bar zho zho, nroob bdi_u zho zho. ²³ Blozhse bdi_u zho zho laa zho psëëb zho ladzguiib, bnabey zho men ne quianap ladzguiib ga tibaque yquianap me zho, sac tel laa zho xoon me tsietizha. ²⁴ Zeene bin men co sca rëb zho, güeyaque me güey_usëëb me zho stib le_una mi_une riaan caa_uraa, ga psëëb me ni zho lad chop lë yag nroob.

²⁵ Wdze co, zig grol guieela laa Pabl grop Silas bii noyoolnie Dios, ni rnab zho lo me gacnieṅ me zho. Grēse zha ne no ladzguiib ga, ron zho sca no Pabl grop Silas. ²⁶ Tibaque zeene bni ti zhodox, psiniw dib nacse ladzguiib co, grēse ro ladzguiib co bzhial, guiib ne no nia grē zha ne no ga, wbiḷa.

²⁷ Lēēlēd brieē mcaallo meṅ ne quianap ga, zeene gon me grēse ro ladzguiib co zonial, masaque güeynie guic me bzhoonle grē zha ne no ga, bdobaque me spad ne ney me laa me zie gut me me. ²⁸ Horco broptsie Pabl lo me, rēb Pabl:

—¡Gute luu luu! ¡Grē no ndxie no, choot bzhiooṅd!

²⁹ Lēēlēd bñab me biini, bzēēb nguzhoon me leṅ ladzguiib, masaque rzhidz me dzeb pquiitsgzhib me lo Pabl grop Silas. ³⁰ Blee me zho ga, rēb me lo zho:

—Golnē lo naa, ¿pe nac miṅe guṅ naa zeena csilaa Dios naa lo grētaa xtoḷ naa?

³¹ —Dib zdoo luu bliladz Jesús, meṅ rnabey ne pxeel Dios lo guidzliu —rēb zho—, dzigo silaa me luu lo doḷ, silaa me meṅlidz luu ne.

³² Dzigo güeynie me zho lidz me, bnee zho Xtiidz Dios lo me grē meṅlidz me. ³³ Guieel co no me bdiib me zhits zho, zaatne brēē bar ne bloobar zho zho; blozhse ga, laa me brobnis grē meṅlidz me.

³⁴ Bñabey me goclo ti guielwagw downie me zho, rley me, niicle grēgaa meṅlidz mew rley zho ne laa zho bliladz Jesús.

³⁵ Biini liu, pxeel wxtis zha ne güeynie diidz lo me cuee me Pabl ladzguiib grop Pabl Silas.

³⁶ Dzigo güey me güeynee me lo Pabl rēb me:

—Laa wxtis pxeel diidz cuee naa to ladzguiib; zacle nasca griee to, peet tsieniedraa guic to.

³⁷ Dzigo rëbchaa Pabl lo zha ne bdziñnie diidz ga:

—¡Zha ndzielguictaa zhiwxtis to gon! Squi ndxie menguedz bdiñ zho no, ni gardle gacnañ zho dien pe nli no pe falt ne rdziaap no. Bnabey zho bio no ladzguiib, ni zha Roma nac no; nana racladz zho zhlianse griee no. ¡Lëda ga gon! ¡Goltsie golguiab lo zho, lëezhal zho guiaad guiadbee zho no nu!

³⁸ Dzigo güey zha co güeynie zho diidz lo wxtis. Zeene bin wxtis zha Roma nac Pabl, bdzieb zho; ³⁹ lëëlëd güey zho ro ladzguiib güeynab zho dispenser lo Pabl grop Silas. Blee zho zho ladzguiib, ni bnab zho lo zho siguiel zho mazd gbi zho guiedz co.

⁴⁰ Ga brie zho güey zho lidz wnaa ne lë Lidia ga, bnee zho lo grë zha ne pcaalsa ga, zha ne riladz Jesús, pso zho diidz lo zho tiblrique gac zho tsienal zho xtiidz me. Blozhse ga, dzigo laa zho brie zho guiedz co.

17

Güey Pabl Tesalónica grop me Silas

¹ Brie zho guiedz Filip grop me Silas, güey zho güeyted zho guiedz Anfípolis ni guiedz Apolonia, bdziñ zho guiedz Tesalónica. Lad guiedz co zob ti xyadoo zha Israel, ² dzigo güey Pabl güeynee me Xtiidz Dios lo grë zha ne rcaalsa ga, zigne runaque me grëraa guiedz ne zieded me.

Blëz zho ga tson zhmaal, gzobse dze ne rdziiladz miech lo dziin güey Pabl güeyzodiidznie Pabl grë zha co, ³ bzeet me lo zho grë zaatne raquiet grëtaa ncuaane ted meñ ne cxeel Dios lo guidzliu ga, ni

zha grieeban me; ni blu me lo zho gacnan zho ganle lëe men co ga nac Jesús.

⁴⁻⁵ Ndal zha ne pquiaadiag xcodiidz Pabl, bien zho ne nli sca naca, laa zho bliladz Jesús, ndal zho nac zha nëz Gres, zha ne noxcole miñe rnabey Dios, ye blalaa men wnaa ne nac men non lad guiedz co. Laa zha Israel ne rnabey yadoo co, zeene gon zho scataa ndal zha ne bliladz Jesús, blëe zho; güey zho güeytop zho grë zha yozh ne quianzë lad guiedz co, ti ruid ne been zho lad guiedz. Güey zho güeysëeb zho lidz Jasón nan zho niebee zho Pabl ga grop Silas, ngo zho zho ladznia grë miech co.

⁶ Zeene gon zho bgaad grop zha co lo zho, bnaaзақe zho Jasón ni zla zha ne rliladz Jesús, bdozni zho zho bdziñnie zho zho lo wxtis, roptsie zho rnee zho:

—¡Golgan ganle laa zha ne sca quianzë nocots guic grë miech, laa zho blansole nu! ⁷ Ni Jasónpaa rdeed zaatne rbëz zho. Racladzdraa zho gon zho miñe rnabey rey César, sac rnee zho no sti zhirey zho lë Jesús.

⁸ Grë zha wxtis co ni grë menguiedz ne pcaalsa ga, zeene bin zho sca rnee grë zha co, riendraa zho zha gon zho. ⁹ Miñe been zho beenquizh zho Jasón ti mult gza Jasón zla zha co, dzigo laa zho wbi ga.

¹⁰ Pcow liu co, wxina laa grë zha ne rliladz Jesús ga bleese Pabl ga grop me Silas, pxeel zho zho nëz Beré. Zigne bdziñ zho Beré, gloque ti xyadoo zha Israel güey zho.

¹¹⁻¹² Grë zha Israel ne no Beré ga, rley zho rquiaadiag zho miñe rnee Pabl grop Silas, gzobse dze rlab zho lo Xtidz Dios rwi zho dien pe nli miñe

rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa meṅ wnaa co zha non nac zho guiedz co. Tibliladz nac grē miech co, gocntseebd zho zigne gocntseeb zha Tesalónica.

¹³ Laa zeṅe gocnaṅ zha Israel ne no Tesalónica laa Pabl nolaque guiedz Beré, güeyaque zho güeyquıl zho grē miech co glēenie zho Pabl. ¹⁴⁻¹⁵ Dzigo lēēlēd brieē bla zha ne rliladz Jesús ga, zienie zho Pabl nēz ro nis; laa Silas grop Timoté biaan ga. Güey zha co güeyṣaṅ zho Pabl guiedz Aten; laa zeṅe laa zho wbi, pxeel Pabl diidz lo Silas grop Timoté tsieniob zho Aten.

Leṅ dze ne no Pabl Aten

¹⁶ Laga quiambēz Pabl gdziṅ Silas grop Timoté güey me güeyted me lad guiedz co, wbiṅladz guic me goṅ me led zhid grē mdio ne riegaṅ grē miech co. ¹⁷ Nacne bioxco me bnee me Xtiidz Dios lo zho, güey me xyadoo grē zha Israel ne no ga, bzodiidznie me zho grē zho zha guiedz co zha ne rliladzle Dios. Gzobse dze rie me leṅ guiedz rienee me lo grē miech ne rdziṅ ga. ¹⁸ Tib dze bdzieelo me bla zha rac ne zianaṅ zhiwseed ti meṅ lē Epicur, ni zla zha ne zianaṅ wseed ne rnee zho estoic; psilo me bzeet me Jesús lo zho, bnee me zha brieēban Jesús. Zeṅe bin zho zha rnee me, no bla zho rzhidznie me, rnee zho:

—¡Dieeṅ pe riab guic meṅ qui rnee me, ziaadquidie me miech!

Zlagaa zho rnee, nend cho zhiwseed sti Dios ne rliladz miech stib dan zienie Pabl, gane sca rnee Pabl; ¹⁹ dzigo rēb zho lo Pabl:

—Bzhiguiel mazd, sē luu guio ne lozh sodiidz luu lo no dien zha nac wseed ne ziaadnie luu,²⁰ sac wlaltaa gard dzion no grē ncuaaṅe rnee luu i.

²¹ No zho liaadz gacnaṅ zho pe rnee Pabl, sac sca nac grē zha Aten, niiclegaa grē zha ne quiadziṅ ga, rdziladz zho rded-dze zho rzodiidz zho dien zha nac grē diidz cub ne griiṅ ron zho.

²² Bdziṅ zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rēb me:

—Grēse to ne nac to meṅ Aten, raṅ naa ne nligaa rioxco to rleynie to grē meṅ ne rzac to nac Dios;²³ sac leṅ dze rii biateed naa zaatne zob grē xdios to, haxta no zaatne niaa ti lo pcoog quia chop lan diidz ne znu rnee: “MIN RII NIAA PAR DIOS NE RDZIUUNBEYD NE.” Golgacnaṅ sca ganle, Dios ne runbeyde to ga, runbey naa me ni lēē zhiwseed me none naa lo miech leṅ dze rii.

²⁴ 'Dios co bzaa guidzliu, me bzaa grētaa ncuaaṅe no lo guidzliu; gacd ne guiab miech zha gzaa ti zaatne cuēz me, sac meṅ nroob meṅ rnabey nac me, me rnabey gbaa, me rnabey guidzliu.

²⁵ Niicle rquiindgaa me dien zha yquianap zho me, sac grēse ne ne nac ne miech, me rneedz guielmban lo ne, me rneedz grētaa ncuaaṅe rquiin ne.²⁶ Lo tib nēzaque miech ne bzaa me ga, bnabey me brieequia grēse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho.

²⁷ Laa me psan zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grē ne,²⁸ sac gon, niapse por xpoder me laa xcuerp ne niaa zigne

naca, laa ne mban, laa ne rriel. Lëew ga bnee bla menladz to, zha rac ne znu rëb: “Xtii Dios nac ne.”

²⁹ Gase na ganle gotsaa gwi ne, conque xti Dios name nac ne, pe nac dzigo gliladz ne lëe Dios ga nac grë cho mdio or, cho mdio plat, cho mdio quie ne riab guic miech rzaa zho; ³⁰ ni ib sca rililadz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grë ncuaane bliladz zho ga gbig zho lo me, mese gleyne zho; ³¹ sac laa me bzole tib dze ne gacredz grëse miech lo me yгаа zho mine tsieguial zho tib tib zho, tel zha wban zho. Ni laa me blule ganle cho nac men ne gun guielwxtis co, lëe men co ga gon bleeban me.

³² Zeene bin zho bzeet Pabl no ti men ne brieeban, nzian zho rzhidznie Pabl, zla zho rëb:

—Na dien pa sti dze lozh yquiaadiag no mine rnee luu i.

³³ Gataa pcuëez zho lo xcodiidz Pabl, laa Pabl wbi lo zho ga. ³⁴ Brieequia blalaa zha Aten bliladz Jesús, lëe tib zho ga nac mgui ne lë Nich (men ne nacgrë zha ne nac wxtis) ni ti wnaa lë Dámaris.

18

Güey Pabl guiedz Corint

¹ Brie Pabl Aten bdzin me guiedz Corint. ² Ga beenbey me ti men Pont lë Aquil, ti zha xti zha Israel nac Aquil. Roma no me glo, wriin bdzin me Corint ga grop tsieel me; sac bnabey rey Claud brie grëse zha Israel ne no Roma. ³ Dzigo güey Pabl blëz Pabl lo zho ga, sac ye zho rzhixcuaa grë

lar nroob ne rquia ncal, tipse pquia zho dziin ga gza zho.

⁴ Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús. ⁵ Zeene laa Silas grop Timoté bdzin Corint, dzigo laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús. ⁶ Laa zeene gon_{ta}aa me rond zho diidz, le_l ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—¡Laa naa bial_l bial_{ne} naa lo to per pquiaadiagde to mi_{ne} rne naa; xtolle to nasca tel_l laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

⁷ Dzigo laa Pabl psilo güey lidz ti men_{ne} ne no gaxaque zaatne zob yadoo co lë me Just, dib zdo me rliladz me Dios. ⁸ Len_{ne} dze co ndal zha Corint bliladz Jesús zeene bin zho mi_{ne} rnee Pabl, haxta ti men_{ne} ne rnabey xyadoo zha Israel lë Crisp, grë men_lidz me bliladz Jesús, dzigo grëse zho laa zho brobnis.

⁹ Ti wdze blulo Dios lo Pabl, rëb me lo Pabl:

—¡Gdziebd luu! ¡ib ycuëëzd luu lo dziin ne noyun luu i, bnee xtudz naa lo grë miech qui! Ndal grë miech rii no sëëb xnëz naa. ¹⁰ Peet tsienied guic luu, choot grieelod lega pe gun_{ne} luu sac naa quianaap luu.

¹¹ Nacne blëz Pabl ga stib iz grol_l, pseed me grë miech co Xtiidz Dios.

¹² Laa zeene bzob men_{ne} ne lë Galión zobnabey me xtan Acay, grë zha Israel ne no Corint ga bnediidz

zho grë zho bnaaz zho Pabl güeyzo zho me lo Galión ¹³ rëb zho:

—Laa no ziaadnie mgui rii lo luu, sac laa me quiaguiits xley no, quiago me guic miech tsiegan zho Dios sti mod miñe ni nacdraa ley.

¹⁴ Laa Pabl zie gnee, zeene pquiab Galión rëb me lo grë zha co:

—Telne niaca miñe no pe ti falt, pe ti guielntseeb ne quiayun me, dzigosi naa raguial gun guielwxtis.

¹⁵ Per telne laa to ziaadnie me nu porne rdziladzde to miñe quiaseed me miech, rdziladzde to tel cho rzeet me, sac led scad nac xley to, tsow golgan dien pe gun to. Nodaque xtil to guic naa.

¹⁶ Bleega Galión zho nëz ley.

¹⁷ Dzigo bnaaz zha guiedz co ti men lë Sóstenes, men ne rnabey xyadoo zha Israel ga; gonlo Galión bdiñ zho me, per peet rëbd Galión.

Biire bdziñ Pabl guiedz Antioquí

¹⁸ Goc spalal dze no Pabl Corint ga, dzigo bnee me lo grë zha ne rliladz Jesús ga laa me gbi; ye Aquil ni Priscil wnaa ne nac tsieel Aquil nole guic tsienal zhits me.

Nacne zeene laa me brieë, ye zho bzëëbgza me barcw, laa zho zie nëz Cencre. Lëëtaaque len dze co noxco Pabl gun me tel pe nac ncuaane rëb me lo Dios gun me, dzigo zeene bdziñ zho Cencre bnabey me liu liu ptsiib guic me.

¹⁹ Cencre bzëëb zho barcw stib, zie zho nëz Efés. Bdziñ zho Efés, güey Pabl xyadoo grë zha Israel ne no ga güeynee me Xtiidz Dios lo zho. ²⁰ Dzigo bnab zho mbëz me lo zho ga ti blalaa dze, per brielod mbëz me ²¹ sac laa guic me no gdziñniob

me Jerusalén ygaa me lni ne ziaadyob len̄ dze co, rēb me:

—Na tel̄ne zneedz Dios diidz, bii zial̄teedaque naa dien̄ yo to.

Gataa biaan̄ Aquil grop Priscil, laa me bzēēb barcw stib zie me nēz Cesarea. ²² Cesarea brieē me barcw, laa me zie nēz Jerusalén. Bdziñ me güeyquiaabdiuzh me grē zha ne rliladz Jesús ga; biireraa me ga bdziñ me Antioquí.

²³ Goc palal dze no me Antioquí, laa me brieēque ga güeyted me grē guiedz ne ndxie dib xtan zha Frij, dib xtan zha Galás, güeynee me lo grē zha ne rliladz Jesús ga dib zdoo zho gleynie zho Dios.

²⁴ Len̄ dze co bdziñ ti men̄ xtií zha Israel guiedz Efés, ti men̄ Alejandríw lē me Apol. Ti zha rac nac me, rien̄ me zha gnee me Xtiidz Dios lo miech. ²⁵⁻²⁶ Güey me xyadoo zha Israel ne no ga, nguieel̄ rac me, peet dzeb guiend̄ lo me psilo me nonee me lo zho grēse miñe bnee Juan Bautist zeēne bzeet Juan Jesús; sac loxaque miñ co bin me zeēne gocnañ me cho nac Jesús.

Lad co co no Aquil ni Priscil, zeēne gon̄ zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

²⁷ Grē zha ne rliladz Jesús ga, zeēne gocnañ zho laa guic me no tsie me nēz Gres, dzigo ye zho rēb wen tsie me, pquiaa zho ti cart pxeel̄ zho lo zha ne no nēz co zaacse ycaania zho me. Zeēne bdziñ me nēz co, pseed me grē zha co. Rley zho blozh gocnañ zho cho nac Jesús; ²⁸ sac squi ndxie miech rsioog me ro grē zha Israel, rnee me lo zho lēēle men̄ ne quiambēz zho cxeel̄ Dios ga nac Jesús, ni rlu me lo zho pa lo zhobnew lo Xtiidz Dios.

19

Biire güey Pabl Efés

¹ Leñ dze ne no Apol Corint, laa Pabl bdziñ Efés. Blozhse güeyted Pabl grë guiedz ne ndxie nëz xtan zha Galás, laa me bdziñ ga. Ga bdzieel me blalaa zha ne riladz Jesús, ² dzigo bñabdiidz me lo zho, rëb me:

—¿Pe bgaa to guielbiini ne rneedz Espíritu Sant, zeene bliladz to Jesús?

Pquiab zho rëb zho:

—¿Guelbiini ye? Gard goñ dzion no rdeed Espíritu Sant guielbiini.

Dzigo rëbchaa Pabl:

³ —¿Pezhe waa pseed to zeene brobnis to?

—Zhiwseedse Juan Bautist gocndion no —rëb zho.

⁴ Dzigo bnee Pabl lo zho zha nac wrobnis ne biaadnie Juan. Rëb me lo zho nacse wrobnis co par glu miech ne laa zho csaan guelntseeb, laa zho sëeb xnëz Dios; per grëse zha ne bgaa wrobnis co ib none gliladz zho Jesús, men ne bzeet Juan ga zeene rëb Juan ile ziaad me.

⁵ Miñ co bin zho nacne brobnis zho stib zigne psan Jesús diidz. ⁶ Zeene laa Pabl pxobnia guic zho bñab me gdeed Espíritu Sant guielbiini lo zho, hor co psilo zho nzian lo diidz ne rnee zho; ni bnee zho tel pe nac miñe racladz Dios gacnan miech. ⁷ Lo gza zho rgaa zho tsiipchop, niapse zha bguiw.

⁸ Tson mëë blëz Pabl ga, tibaque rie me xyadoo grë zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús. ⁹ Per zeene goñ me

no palal zho ib rond diidz, le_l psilo zho squi ndxie miech rneenë zho Jesús, nacne bleextsoque me grë zha ne rliladzle Jesús, güeynie me zho zaatne nac xyuscuel ti men_l lë Tiran; ga rcaalsa zho gzobse dze rieseed me zho.

¹⁰ Dipse len_l chop iz blëz me ga pseed me grë zha co; nacne grëse miech ne no dib nëz Asia ga, zigtaa zha Israela zigtagaa grëraa miech cow, bin zho zha nac Xtiidz Dios. ¹¹ Bdeed Dios diidz been_l me grë milagr nroob ne rzee zdoe miech; ¹² sac haxta lar ne rzëse nia me, lar ne rbixse me rzhoob lad men_l ne rzacnë laa zho riac, niicle grëgaa men_ldox ne noguitnie miecha, rzhoon_l ma.

¹³⁻¹⁴ Ga quianzë gadz xpëed ti zhipxoz zha Israel lë Escev, stib guiedz stib guiedz rie zho riegun_lcxoon_l zho men_ldox ne noguitnie miech. Ti vuelt, nan_l zho na ye zho cuedz lë Jesús gacniën_l me zho gun_lcxoon_l zho men_ldox; bdzi_ln zho zaatne gun_lcxoon_l zho ma, rëb zho:

—iZig zobwi Jesús ne rzeet Pabl, laa no rnabey to go_lrieegazh i niina!

¹⁵ Pquiabaque ma rëb ma lo zho:

—Wen wen run_lbey naa Jesús ni nangaa naa cho nac Pabl, sangue to gon_l ni lalnu run_lbeyd naa to.

¹⁶ Znuse bias men_l ne noguitnie men_ldox co, bnaaz me gza zha co bdi_ln me zho. Ib blëbd zho lo me, masaque dib brëë rna zho, ni xab zho nacwdraa, laa zho bzhoon_l.

¹⁷ Grë miech ne no Efés, zigtaa zha Israela, zigtagaa grë zha guiedz cow, zeene bin zhow per nli bdzieb zho; grëse zho bien_l zho ne nli men_l non, men_l rnabey nac Jesús.

¹⁸ Haxta ye grë zha ne rliiladzle Jesús, hor co laa zho bleero pe nac grë ncuaane ndzinlid ne bliladz zho glo. ¹⁹ Nzian zha ne biil diidz dox güeyxi zho grë xquits zho, squi ndxie miech laa zho bzëëga grësew. Zeene biobey palal goconon grëtaa guits co, biirew zig chooptsii mil pes plat. ²⁰ Ga blu poder ne nacie Xtiidz Dios, sac grë zha ne bina bdzëë lo xquielmban zho.

²¹ Bded ga, biab guic Pabl tsieted me nëz xtan zha Macedon, xtan zha Gres, gbiire me ga laa me tsie Jerusalén stib; haxta rnee me Jerusalén griee me tsie me Roma. ²² Nacne ptedner me Timoté grop Rast (zha ne noyū xyudar me len dze co) zie zho nëz Macedon, laa me bii biaan nëz Asia ga.

Gocntseeb zha Efés

²³ Len dze co brieequia palal zha Efés ptsidil zho zha ne rliiladz Xtiidz Dios. ²⁴ Guiedz co no ti men ne rundziin guiib plat lë Demetr, rzaa me grë yadoo yeen zig niaada xyadoo xnaxnazh zho Dian; nroob dimi ne rial me grë me zha ne runnie me dziin co; ²⁵ bnabey me pcaalsa grë zha ne quia dziin lo me, ni grëragaa zha ne runaque dziin co, rëb me lo zho:

²⁶ —Rien naa ziyonle to, ziyangaa to ganle laa mgui ne rnee zho Pabl quianzë lad guiedz nu, rnee me nlid Dios ga nac grë mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz miecha. ¿Pe gnë to zha dziuun ne? ²⁷ Golguien ganle noxtseeb guiabdraa xtsiin ne, ni nanwen to ganle lëë xtimi ne nu. Ni tebaa mincosegaaw,

mine mazdraa noxtseeb nend grëse miech csaanladz xyadoo nazhnazh Dian, nend grëse miech ne rleynie me dib Asia, diibgaa lo guidzliuw con guiaanladz zho me.

²⁸ Zeene gon grë zha co sca rëb Demetr, rlëe zho, roptsie zho rgo zho xviv Dian. ²⁹ Wdzeepaaw grëse menquiedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdozni zho zho bdziñnie zho zho ro yulow.

³⁰ Nacne gocladz Pabl nie me nienee me lo grë miech co, per psaand grë zha ne rliladz Jesús ga. ³¹ Haxta bla zha wxtis ne ndzieeldiidz Pabl, pxeel zho diidz lo me tsied me.

³² Zhaase zhaase rnee grë miech co ndxie zho ro yulow ga, no zho haxta ni rien d pe nacne zie zho ga. ³³ Blalaa zha Israel, zeene gon zho scataa rac grë miech co, bdoz zho zhiw ti men lë Lejandr gocladz zho nee me chop lan xtiidz zho. Laa men co blis nia me parne cuedze zho gnee me; ³⁴ zeene gon zho zha Israel nac me, psilo zho stib grëse zho nguiedz roptsie zho, rgo zho xviv Dian rnee zho:

—¡Men ndzondoo nac Dian! ¡Men ndzon nac xnaxnazh ne!

Zig chop hor bre zho ga sca roptsie zho.

³⁵ Dzigo brie meñ ne zobnabey ga, blunia me lo zho cuedze zho; zeene laa zho bredze, psilo me bnee me lo zho rëb me:

—Golgon ganle, grëse miech lo guidzliu nan zho guiedz rii zob nazhnazh Dian, nan wen zho gbaa biet me zob me nu; ³⁶ tsod zha ne guiab led scada. ¿Pe nac nadien ne squitaa rac to? Golguien ganle nonguielda i squi lëelëd dieen pe rzhixcuaa to. ³⁷ Golwi ganle, laa to ziaad-zo grop zha rii

nu, ¿pe nadien been zho? Nacd zho cho zha ne quiaguitnie yadoo, cho zha ne nozhidzniegaa xnaxnazh ne. ³⁸ Nana, telne racladz Demetr pe glisqui me grè me zha ne rquianie me dziin, gacxe na no yulow waa. Niac niaad zho niaadnab zho guielwxtis, ni zogaa zha ne yquiaadiaga. ¡Ga glisqui zho pe run tib, pe rungaas tib! ³⁹ Laa telne noragaa pe racladz zho glisqui zho, dzigo niac niacredz grèse zha ne nac wxtis, zha ngobey dien zha niaca. ⁴⁰ Sac gon ne squi been to nadze, noxtseeb glisqui zha Romaw lo ne; ni pe nadien dzieets ne telne laa zho glisquiw.

⁴¹ Blozhse sca bnee me laa me wbi lo zho ga, niicle zhagaaw laa zho zey.

20

Güey Pabl nêz Macedon ni nêz Gres

¹ Zeene laa ruid co blèz, dzigo bredz Pabl grèse zha ne rliladz Jesús, bnee me lo zho zaacse gac zho. Blozhse bnee me lo zho, laa me brie ga zie me nêz xtan zha Macedon; ² güeynee me lo grè zha ne rliladz Jesús nêz co, pso me diidz lo zho zaacse gac zho. Nêz co brie me bdzin me nêz Gres. Ga blèz me tson mëë.

³ Laa zeene laa me gbi ga tsie me nêz Siria, laa me ziele sëëb me barcw zeene gocnan me laa zha Israel ne no ga bnediudz pa tsietin zho me, nacne güeydaque me barcw, mazd bio me nêz güeyted me nêz Macedon.

⁴ Blalaa zha ne bzënal biogza no me, bzë ti men Beré lè Sópater xingan ti men lè Pirr; bzë chop zha Tesalónica, Aristarco ni Segund; ti zha Derb lè Gay, Timoté, ni schop zha nêz Asia, Tíquico ni Trófimo.

⁵ Gol no Filip laa zho bner, per biaan no diidz Troas cuëz zho no; ⁶ laa no bliaaz ga, ga bdieed no lni Pascw. Zeene bded lni co laa no bziaab barcw, laa no brieë ga. Goc gaay ngbidz no no lo nis laa no bdziñ lo zho Troas, dzigo bliaaz no Troas ga gadz ngbidz.

⁷ Zeene gol dze dmingw, bio no yu ne rcaalsa zha ne rliladz Jesús ga. Ti yu tson xcuaaw, laa no pcaalsa par dziuun no xtsee ne psan Jesús diidz ga gun grë zha ne rliladz me. Laa no ndxie grë no, dzigo psilo Pabl pseed me no; nzian ncuaane nonee me lo zho sac guini liu co laa me greeë ga; gol grol guieela rsiaaldaqe me. ⁸⁻⁹ Nzian nac biini ne noquia len yu co; zaatne nac ro ventan ga zob ti niib lë Tic. Wdzeelaaw rsiaaldaqe Pabl, tibaque bzhen mcaal niib co, wbix niib ga biab niib nëz ley; ni glaaw, len yu ne riaan glaaraa ga ndxie no. Zeene güeylis zho niib laa niib gutle.

¹⁰ Biet Pabl, bdziñ me lo niib bdeedz me niib.

—¡Gdziebde to! —rëb me—. ¡Zrieëban niib!

¡Ni nligaaw brieëban niib! ¹¹⁻¹² Grëse zho per nli rley zho. Blozh ga bdieep no glaa stib bdziñ no len yu co, dzigoraabdiiz Pabl guietxtil pquiin no. Blozhse bdziuun no xtsee co, laa Pabl psilo bnee lo zho stib, quianeëque Pabl laa liu biini.

Bdziñ Pabl Milet

¹³ Lban co psiaal Pabl, laa me wbi ga laa me zie nëz Ason nzëni me; laa no bziaab barcw bdiednieer no lo me. Bdziñ no Ason ga bliaaz no me zigne biaan no diidz. ¹⁴ Zeene blanso me lo no, laa no bziaab barcw gza no me bdziñ no guiedz Mitilen. ¹⁵ Biini liu brieë no Mitilen, bdieed no gax

Quío, bietraa stib dze co bdziñ no Samos, ga bliaaz no; bzia no lo nis co zig sti dze dzigoraa bdziñ no Milet.

¹⁶ Biotieete no Efés, sac laa guic Pabl no gdziñniob me Jerusalén, zeeña ygaa me lni Pentecostés. ¹⁷ Nacne zigne bdziñ no Milet pxeel me diidz Efés bredz me grë zha ne zo lo zha ne rililadz Jesús ga. ¹⁸ Zeeñe blanso zho, bnee me lo zho rëb me:

—Wen wen runbey to naa, nanle to ganle zha noxco naa noyun naa xtsiin Jesús men ne rnabey ne. Wlal ne psilo ziyal naa nëz Asia nu, ¹⁹ blactaa biin naa lo grë miñe bdeed naa, blactaa lo guielxtseeb ne ziyo naa, tibaque quianañ grë zha Israel quin zho naa. ²⁰ Per gon to ganle, tibaque bioxco naa bialseed naa to miñe nac diidzli, zigtaa pseed naa to zaatne rcaalsa tow, zigtagaa pseed naa to stib yu stib yu. ²¹ Grëse miecha, tibaque miñe pseed naa zho, miñe bne naa lo zha Israel miñcoque bne naa lo miech stib guiedz; grëse zho bnee naa lo zho none csaan zho xquielntseeb zho dib zdoo zho gnalo zho Jesús, zeeña gbig zho lo Dios.

²² 'Scaque niina ne laa Espíritu Sant rnabey ga naa Jerusalén, nanñ naa dien peraa nac ncuaane gdzieelo naa ga; ²³ per nanpaa naa ible zgo zho naa ladzguiib, ible sacsi zho naa, sac guiedz ne gdziinta naa min co rnee Espíritu Sant teed naa. ²⁴ Lo guielxtseeb co no naa per rquiad zdoo naa xquielmban naa; miñe nziuuraa lo naa laga gdeeda diidz ib laa naa no gne lo miech pa lotaa rleynie Dios zho, zeeña ine gley naa csiaal naa dziin ne bzo Jesús naa nu quiayun naa. ²⁵ Rien naa lo grë

to ne nac to zha ne bialseed naa gocnan to zha nac xnëz Dios, gandraa to lo naa lo guidzliu rii. ²⁶⁻²⁷ Laa naa pseedle to grëse miñe nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoldraa naa ga. ²⁸ Golguien sca, jgolquianap to, ni scagaa golquianap grë zha ne zo to lo! jGolwi ganle xnëz Dios no zho, haxta lo cruz gut Xpëed me bdiizh me xtolzho! Ni stiba, jib Espíritu Sant bzo to yquianap to zho zigne rquianap baxtor xpëcwxiil zho!

²⁹ jNsin golso! Sac rienle naa zeene laa naa gbiche lo to, ib zrieequia grë zha ne guiaad guiaadquidie to, zguib zho zha gnitlo zho to zigne run grë coyot mëcwxiil. ³⁰ Haxta lad to, zrieequia bla zha ntseeb ne ctsëe Xtiidz Dios, squiil zho to tsienal to zhiwseed zho. ³¹ Gacxe waa laa naa rne lo to, jnsin golso! Golsoladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to. ³² Dios nac men ne gacnien to, laa naa rsan to ladznia me grëse to; Xtiidz Ndzon me miñe rnee ganle zha nquialadztaa me to, lëew lozh quix biini to dib zdoo to gnalo to me, zeena yгаа to zaatne gneedz me cuëz to grë to zha ne noraa xnëz me.

³³ Wlaltaa ib rzobladd naa dimi, ib rzobladd naa lar, guiep naa tebaa zha yquianie naa grë ncuaan co. ³⁴ Len dze ne blëz naa lo to, gon to ganle niapse nia naa bdziniaa naa ncuaane pquiin naa, ncuaane pquingaa grë zha ne bzënie naa. ³⁵ Ga blu naa lo to ganle, ib none dziuun ne dziin zeena grieelo dziuun ne xyudar zha ne guiend pe yquiin. Ib riaanladz naa xtiidz Jesús men ne rnabey ne, zeene znu bnee me: “Mazdraa nroob guielbley ne

rgaa zha ne rgad, lëdle zha ne rad.”

³⁶ Zeene blozh bnee Pabl lo zho, laa me pqui-itsgzhib ga grë me zho bzodiidznie zho Dios.

³⁷ Blozhse ga, tibga tibga zho wbig bnee zho lo me, bnaaz zho nia me, bdeedz zho me. ³⁸ Mban rac zho psilo zho roon zho, rsoladz zho rëb me gandraa zho lo me. Blozh ga, güey zho güeyzonëz zho me zaatne sëeb me barcw.

21

Biire güey Pabl Jerusalén

¹ Blozhse bzhieen no nia grë zha Efés co, laa no bziaab barcw, laa no zio bdzin no ti lo guidzliu win ne no lo nisdoo colë Cos. Biini liu brieë no ga bdzin no lo sti guidzliu win colë Rodas. Rodas brieë no bdzin no guiedz Pátara. ² Guiedz Pátara, ga bziaab no ti barcw ne zie nëz xtan zha Fenicia. ³ Zeene zieded barcw congalizaatne riaan guidzliu win ne lë Chipr, bui no nëz revés rlupaa guidzliu co. Laa no zio haxta bdzin no guiedz Tir, xtan zha Siria, ga blëz barcw cobiet grë yo ne neya.

⁴ Zigne bdzin no ga bdzieet no barcw bziaab no lad guiedz co, biodziel no grë zha ne rliladz Jesús ga; bliaazaque no lo zho ga ti zhmal. Dzigo psiaab Espíritu Sant guic zho rnee zho lo Pabl, tebaa siguieł me mazd tsied me Jerusalén.

⁵ Zeene laa no brieë ga, grëse zha ne rliladz Jesús grë tsieel zho grë xpëed zho biaad-zonëz zho no ro nis co; dzigo lo yuzh co ga pquiitsgzhib no grë no, bzodiidznie no Dios. ⁶ Blozhse bzhieen no nia zho, laa zho wbi ga.

⁷ Brieë no Tir bdzin no guiedz Tolemaid, ga bio no bioquiaabdiuzh no grë zha ne rliladz Jesús ga,

bliaaz no lo zho tib dze. ⁸ Biini liu brieē no ga bdziñ no guiedz Cesarea, ga biobiaaz no lidz ti men ne noneeque Xtiidz Dios lo miech, lē Lip. Lēē Lip co ga gogza sxoop zha ne bzo been xyudar zha poxtl. ⁹ Quianie me tap ndzoope ne gard ctsieelnia, gzase zho bdeed Dios guielbiini lo zho rnee zho tel pe nac mine racladz Dios gacnañ miech.

¹⁰ Nzianle dze goc no no lidz Lip, zeene blanso ti men ne ziaad nēz Judé lē Agab, biadquiaabdiuzh me no. (Ye me rnee tel pe nac mine racladz Dios gacnañ miech.) ¹¹ Zigne blanso me lo no ga, bzhen me lar ne rbe leñ Pabl, pxidoo mew nia me ni pxidoo mew ni me, nē me:

—Znu gon rnee Espíritu Sant gzobdoo zha Israel bizhuan lar rii, co zho me ladznia zha Roma zeene laa me gdziñ Jerusalén.

¹² Grē zha ne rliladz Jesús ga, zeene bin zho sca rēb men co, rnab zho lo Pabl tsied me Jerusalén, yeque no sca rnee lo me. Mban rac no rdzioon no.

¹³ Pquiabaque me nē me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalén, niicxe haxta gut zho naa waa porne rleynie naa Jesús. ¡Loxaque rsiaab guielnē to naa i gon squi rac to!

¹⁴ Bdzianse no nlid yquiaadiag me xtiidz no, dzigo mazd psaan no, rdzieets no:

—Golgotsaa csaan ne, Diostaa nañ dien zha gaca.

¹⁵ Bdedse ga bzhixcuaa no laa no brieē ga, laa no zio nēz Jerusalén; ¹⁶ blalaa zha ne rliladz Jesús Cesarea ga bzēnal zhits no, bzēnie zho ti men Chipr lē Mnasón. Izle rliladz me Jesús, lidz me biobiaaz no zeene bdziñ no Jerusalén.

17 Grè zha ne riladz Jesús Jerusalén, rley zho zeene gon zho laa no bdziñ, blèzlo zho no.

18 Biini liu co güeynie Pabl no lidz Jacob bioquiaabdiuzh no me, lèëtaque laa grè zha rnabey ne zo lo grè zha ne riladz Jesús Jerusalén ga, ndxie ga. 19 Blozhse pquiaabdiuzh Pabl grè zha co, dzigo psilo me bzodiidz me lo zho grèse zha gocniñ Dios me güeyseed me grè miech stib guiedz. 20 Zeene bin zhow per nli rley zho, rdeed zho xquizh lo Dios; dzigo rëbchaa zho lo me:

—Bets, ye zha Israel gon ndaldoo zho zililadz Jesús; per racladz zho tibaque tsienal zho miñe rnabey Xley Moisés. 21 Grè zha ne no nu bin zho laa luu güeyseed grè men wladz ne no guiedz zit, nac diidz blu luu lo zho tsienaldraa zho Xley Moisés, codraa zho xpëed zho bey, niicle tsienaldraa zho grè zhiwseed xmengol ne. 22 ¿Zha ganle dziuun ne? Sac zeene gon zho laa luu blanso, ible ziaadguib zho luu. 23 No tap bets ne nu ziaadyoble gun zho miñe bnee zho lo Dios; miñe gaca güey 24 güeynie zho yadoo, golgun grè miñe rnabey ley, bdiizh ctsiib guic to gza to; zeena ga gan grè zha rii ganle nlid grè miñe rnee miech luu ga.

25 'Sangue grè miech stib guiedz zha ne riladz Jesús, laa no pxeelle diidz lo zho zigne bzodiidz ne nu: grè ma ne rut miech rgogon zho lo zhimdio zho, gowd zho bëel co; grè ma ne rxieed ren zeene ret ma, gowd zho ma; ni niicle grëgaa ma ne gut zho, ib gowd zho xchen ma; grè zha bgui, nodne tsonie zho wnaa ne nacd tsiel zho; niicle wnaagaaw, nodne tsonie zho mgui ne nacd tsiel zho.

Bnaaz zho Pabl

²⁶ Laa Pabl zienie gza zha co. Biini liu güey me gza me zho güeygun zho miñe rnabey ley; blozh ga güey zho yadoo güeynie zho diidz pa dze gza miñe quiayun zho ga, zeena gal dze co laa zho tsienie gon ne gdeed zho tib tib zho. ²⁷ Laa zeene merle gza gadz ngbidz ne quiayun me miñe rnabey ley ga gza me zha co, lega naclew gon bla zha Israel ne ziaad nēz Asia laa me no len yadoo. Nacne wbig zho ²⁸ bzheñ zho zhicw me, roptsie zho rnee zho:

—¡Grēse to menquiedz! ¡Golgun xyudar no gnaaz ne men rii! Sac lēē me ga quianzē quiaseed me zha wladz glēēnie zho ladz zho, rnee me lo zho gundraa zho grē miñe rnabey ley, gapdraa zho respet yadoo rii; haxta grē zha zit zizēēbnie me nu. ¡Noguitniele me lugar nda rii!

²⁹ Sca rnee zho, sac gon zho Pabl len guiedz Jerusalén ga ziegrop me ti zha Efés lē Tróximo, dzigo rzac zho güeynie me zha co len yadoo.

³⁰ Pe ga bin grē menquiedz, grēse zho bdzin wbigbe zho lo Pabl bdozni zho me blee zho me len yadoo, zigne blee zho me ga lēēlēd psioog zho ro yadoo; psilo zho noguin zho me, nan zho gut zho me.

³¹ Zeene gocnan men ne rnabey lo menquiib ne ndxie ga laa ruid co noyac, ³² lēēlēd brieenie me grē xmenquiib me ni grēraa zha ne rnabey lo zho. Zeene gon grē zha ne noguin Pabl ga, laa grē menquiib co bdzin, dzigora blēz bdiñ zho me.

³³ Dzigo wbig men rnabey co, bnabey me grē zhaguiib co bzoob zho Pabl chop caden. Bnabdiidz me lo grē miech co dien cho nac Pabl, pe quiayun me ne scataa rlēēnie zho me. ³⁴ Psilo zho nguiedz

roptsie zho, zhaase zhaase ncuaane rcaadzdoꝛ zho me. Gonse men rnabey co rlud dien pepaa rlisqui zho, nacne bnabey me grë menꝛuiib co ziesan zho Pabl yu ne rbëzpaazho.

³⁵ Laa grë menꝛuiib co csilo soquianie Pabl lo scaler ne rdziꝛ ro yu co, gataa mazd bzoobyꝛn zho me, sac ntseeb rac grë miech co; ³⁶ nalbe zho, roptsie zho rnee zho:

—¡Golnitlogazh men qui! ¡Niinagazh golgut me!

³⁷ Laa grë menꝛuiib co csëëble me leꝛ yu co, zeene bnee me lo men rnabey co, rëb me:

—¿Pe zrieelo gne naa ti xtidz naa lo luu?

Dzigo rëb men rnabey co:

—¿Mod rac luu rnee luu xtiidz zha Gres? ³⁸ ¿Led luud ga dzigo nac ti zha Egipt ne psilo racntseeb lo gobiern leꝛ dze rii? Nac diidz, tap mil zha ntseeb nacnie zho, laa zho ziese nëz dan.

³⁹ —Led naada —rëb Pabl— men Israel nac naa. Guiedz Tars gol naa, lëë guiedz co nac mine nroobraa lo grë guiedz ne ngab Cilis. Na laa naa rnab lo luu, beenꝛ guieꝛnzaac bneedz diidz gne naa chop lan xtidz naa lo grë miech qui.

⁴⁰ —Zaca —rëb men co.

Lo scaler co zo Pabl blunia me lo grë miech co cuedze zho. Zeene laa zho biacdze, dzigo psilo me bnee me xtiitsë me grë me zho, rëb me:

22

¹ —Grëse to men wladz, laa naa rzaac to zig ti bets naa zig pxozgaa naa, golquiaadiag mine gne naa nu ganle zeena gacnan to quiayund naa mine rquiaqui to naa.

² Zeene gon zho xtiidz zho rnee me, grëse zho dzese bre zho; dzigo rëb me:

³ —Men Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc men ne pseed naa. Pseed me naa grëse zigne nac xley xmengol ne, grëse zigne nac zhiwseed zho; pseed me naa tibaque noxco naa runnon naa lë Dios zigne noxcoque tow. ⁴ Mine been to nu nadze, ye naa blactaa squi ben naa ptsidil naa grë zha ne rliladz Jesús, pquianał naa yгаа zho guet zho; mgui wnaasaque razobdoo naa zho lidz zho rasan naa zho ladzguib. ⁵ Men ne nac pxoz nroob ni grë mengol ne goc wxtis guiedz riı len iz co, zha co nanpaa ganle nli sca ben naa; sac zha bneedz ti xtiidz zho bi naa ndziınnie naa lo zha ne rnabey xyadoo grë men wladz ne no Damasc, zeena niacnie zho naa nianaz naa grëraa zha ne no ga rliladz Jesús, nialnie naa zho Jerusalén nu nded zho caxtigw.

⁶ Min copaa nagon brie naa nu za naa nëz co. Zhile gdziın naa Damasc, zig rwe ngbidza tibaque zeene ziaad ti biinidoo nëz zhan gbaa biab lo naa. ⁷ Biabgazh naa liu, ga nix naa bin naa ti tsi men co rnee me lo naa: “Saul, Saul, ĩpe nacne quianał luu naa?” ⁸ “ıBeen guielnzaac bnë dien cho luu!”, rep naa. Dzigo në men co lo naa: “Naa nac Jesús men Nazaret ne squi quiatsidil luu.”

⁹ Grë zha ne zanie naa ga, bdzieb zho gon zho biini co, per biend zho pe rnee men co lo naa. ¹⁰ Dzigo rep naa lo me: “Bzhiguiel bnë dien, ĩpe racladz luu guı naa niina?” Nëchaa me: “Guche i,

güey Damasc ga gnë zho ganle pe nac miñe no gun luu.”

11 'Dzigo bzhen zha ne zanie naa ga nia naa, bdziñnie zho naa Damasc; sac lo biinidoo co pcow lo naa. 12 Ga no ti mgui lë Ananí, zëëb diidz rioxco me grë miñe rnabey ley, grëse men wladz ne no ga nanpaa zho ti men wen nac me; 13 dzigo biaad me zaatne blëz naa ga, në me lo naa: “Saul, niinagazh gon bets laa luu gbiire gwi stib.” Zigne sca bnee me laa lo naa biac, gongazh naa me. 14 Dzigo nëchaa me lo naa: “Dios men ne bliladz grë pxozgol ne, ib men co bzooblo luu gacnan luu pe nac miñe racladz me gac, me bzooblo luu gunbey luu men ne nacle diidz ga cxeel me lo guidzliu, ni gon luu tsi men co. 15 Ib laa me bzo luu tsienee luu lo miech miñe bzhaac luu ga, miñe bin luu ga. 16 Guso i sca, zeena chobnigazh luu. Dib zdoo luu bredz Jesús, bñab lo me csañme me luu lo xtol luu.”

17 'Zeene laa naa blanso Jerusalén nu, tib dze lëëtaque no naa yadoo nozodiidznie naa Dios, 18 tibaque blulo me lo naa në me: “Na zeena biobladz brieer Jerusalén nu, sac ib gliladzd grë miech rii miñe gnee luu zeene gnee luu xtidz naa lo zho.” 19 “Per runbey zho naa waa”, rep naa lo me, “nanpaa zho scataa ra naa grë yadoo raxizhoo naa grë miech ne rliladz luu, rnabey naa rguin zho zho ni rio zho ladzguiib, 20 niicle zeene beet zho Xteb men ne bnee xtiidz luu ga, ye naa bded diidz beet zho me, haxta pquiianaap naa xab grë zha ne bdeedquie me.” 21 Dzigo në me lo naa: “Na zeena pcaaniob nëz brieer nu, sac gon laa naa cxel luu stib dan tsienee luu xtidz naa lo grë menzit.”

22 Zeene bin zho sca rëb me bdeetraa zho diidz nee me, psilo zho nguiedz roptsie rnee zho:

—¡Ib rieguialdraa gban men qui! ¡Golnitlogazh me!

23 Nguiedz zëëb tsi zho, ib rioogd ro zho, masaque rdzib zho xab zho ni rchoon zho yudie laglaa.

24 Dzigo psëëb men rnabey co Pabl len yu co, ni bnabey me grë menquiib co quin zho Pabl, zeena cueero Pabl dien pe nac ncuaane been Pabl, zha nac ne scataa rac grë miech co lo Pabl. 25 Laa zho blozhle pxidoo me, laa zho csilo quin me, zeene rëb me lo sti zha ne rnabey lo grë zhaguiib co:

—¿Pe nonguiela dzigo ne lega quin to ti zha Roma, ni gardle gac guielwxtis dien pe nlipaa no xfalt zho?

26 Zeene bin zha co sca rëb Pabl, lëëlëd güeynie zho diidz lo men ne rnabey zho ga, rëb zho:

—¿Zha gon gun luu? Sac zha Roma me nac mgui co.

27 Dzigo güey men rnabey co rëb me lo Pabl:

—Bneeli lo naa, ¿dien pe nli na men Roma nac luu?

—Nliw —rëb Pabl—, zha Roma nac naa.

28 Rzedz yan men rnabey co rëb me:

—¡Naasi zha Roma nac naa, ni nroob dimi bdizh naa bgab naa lo zha Roma!

Dzigo rëbchaa Pabl:

—Sangue naa, desde gol naa bgab naa lo zha Roma.

29 Grë zhaguiib ne bzo nguin Pabl ga parne cueero me, lëëlëd whiche zho lo me, niicle men rnabey cow bdzieb me zeene gon me nli zha Roma

nac Pabl, sac nrooble nac falt ne niuñ me ga lega nabey me nguñ zho ti zha Roma.

Bnee Pabl lo wxtis Israel

³⁰ Zeene biini liu, bnabey meñ rnabey co pcaalsa grë zhipxoz non zha Israel ni grë meñ ne nac zhi-wxtis zho, sac racladz me gacnañ me dien pepaa nac ncuane rquiaqui rlëenie grë miech co Pabl. Dzigo pxadz me Pabl, blee me Pabl bzo me Pabl lo zho.

23

¹ Dze bui Pabl lo grë zha wxtis co, dzigo psilo Pabl bnee me rëb me lo zho:

—Laa naa rneli lo to nu ganle, mbe zdoo naa, Dios zobwi ganle zanałd naa ncuane rdziguiend me.

² Zeene gon Ananí (meñ ne nac pxoz nroob) sca rëb Pabl, bnabey me zha ne zo gax lo Pabl, rëb me:

—¡Golcap ro zha qui!

³ Dzigo rëbchaa Pabl lo me:

—¡Tebaa squique cap Dios ro luu! ¡Nac luu gon zig ti lidz nguts loxaque nëz zhitssew stib rna! ¿Pa rquiin ne laa luu zob i? Led luu zo par cobey luu tel no pa ti ley ne zaguits naa, na lel luule noguiitsa bnabey luu bdiñ zho naa.

⁴⁻⁵ Pquiabbe zha ne ndxie ga rëb zho:

—¡Bieñ ganle lo pxoz nroob i, lo meñ ne quiayun xtsiin Dios i noquiabro luu!

—Golgun dispensar —rëb Pabl—. Nand naa lëe pxoz nroob i, tel niaca mine nan naaw ne scad naa; sac zhobnee lo Xtiidz Dios: “Gneened luu zha ne rnabey ladz luu.”

⁶ Zeene bien Pabl groḷ zha wxtis co zianal zhiwseed zha saducé, zgroḷ zho zianal zhiwseed zha farisé, dzigo psilo me nguiedz bnee me rëb me lo zho:

—iGrëse to bets, goḷgona ganle, zha farisé nac naa, niiclegaa pxoz naaw farisé goc me! iNi porne rliladzpaa naa gon zrieeban zha ne ret, miñ co gane znu zo naa lo to nu!

⁷ Zeene sca rëb Pabl, psilo zho bdildiidz zho. Goc zho chop dii, ⁸rree zha saducé rnee nlid grieeban zha ne ret, nlid no anjl, nlid no espíritu; laa zha fariséгаа na rnee zrieeban miech, no anjl ni no espíritu. ⁹Nguiedz zëeb tsi zho noneelsa zho, dzigo gusoque bla maistr ley ne nacgrë zha farisé, rëb zho:

—Laa ne bdzianle ganle, iñi ti falt rapd mgui qui! iPe nadien dziuun ne? Nend ti espíritu ga, ti xanjlgaa Dios ga sca bnee lo me.

¹⁰ Zeene gon men ne rnabey lo menGUIIB ga, laa lo xtil zho noyac nroobraa, bdzieb me rëb me nend znuse gzhiih zho Pabl; bnabeyaque me gocredz menGUIIB güeyxi zho Pabl biire güeyšan zho me len yu ne rbëz zho ga.

¹¹ Goḷ guieel co, blulo Dios lo Pabl rëb me:

—Gdziebd luu, zigne bnee luu xtidz naa lo miech Jerusalén nu, scaque none tsienee luuw lo grë zha ne no Roma.

Gocladz zho niut zho Pabl

¹²⁻¹³ Zeene biini liu, ndziibsraa choo zha Israel bnediidx rëb zho gowd zho, ni tib ro peet guied zho haxta gut zho Pabl; telne gund zho miñe rnee zho maase csiaabzi Dios zho. ¹⁴ Dzigo güey zho lo pxoz

ne rnabey, lo grë zha ne nac zha non lo men_guiedz, bzodiidz zho min_e no guic zho ga, ni rëb zho:

¹⁵ —Nana gon, gol_nab lo men ne rnabey lo men_guiib cxeel me Pabl lo to gzhe, gol_quiaalo noraa pe lozh yquiep to Pabl; laa no nsinle ziobmbiaaz. Zeene laa zho tednie Pabl, ga dziuut no Pabl.

¹⁶ Dieen zha bin ti xingan bzian Pabla, nacne lëelëd güey win yu ne rbëz men_guiib ga güeynie win diidz lo Pabl. ¹⁷ Dzigo bredz Pabl ti zha ne rnabey lo men_guiib co, rëb Pabl lo zho:

—Bzhiguiel güeynie mëed rii lo men ne rnabey to, sac laa win no tsienie ti diidz lo me.

¹⁸ Bzhen men rnabey co nia mëed co, güeynie me win lo men nroob ne rnabey zho, rëb me:

—Laa naa zial_nie mëed rii nu me, dien pe nac diidz ne ziaadnie win lo luu; Pabl ne no ladzguiib ga bnab lo naa guaial_nie naa win.

¹⁹ Dzigo bzhen men rnabey co nia win, güeynie me win stib nëz, bnabdiidz me lo win dien pe nac diidz ne zienie win lo me. ²⁰ Dzigo rëbchaa win:

—Laa zha Israel gon bnediidz gnab zho cxeel luu pxey naa Pabl lo zhiwxtis zho gzhe, yquiaalo zho gnë zho noraa pe yquiep zho me. ²¹ Bzhiguiel gliladzd luu xtiidz zho, sac ndziibsraa choo zha ne nacgrë zho rëb zho laa zho tsiesoblan nëz gutgazh zho me zeene laa me ted. Biaan zho diidz grë zho, gowd zho, ni tib ro peet guied zho haxta gut zho me; haxta rëb zho tel laa zho gund min co maase gdzibdee Dios zho. Ible zun zhow, loxaque quiambëzse zho dien pe guiab luu.

²² Blozhse ga dzigo bzonëz me win, ni pso me diidz lo win choot lo gneed win ne laa win güeynie diidz lo me.

Güey Pabl lo gobernador Wech

²³ Lëälöd bredz meñ rnabey co chop zha ne zo lo meñguiib, rëb me:

—Laa zhaguiib goñ none griee naguieel tsie zho Cesarea, na zeen golzo zha ne tsie; none tsie chop gayoo zha ne sëni, tsongal tsii zha ne sob guay, schop gayoo zha ne güey lanz. Naguieelgazh, zig rlozh xtsee none griee zho nu; ²⁴ sac laa zho none tsiesan Pabl Cesarea. Ni golcoxab ti guay ne sob Pabl, sac none ndip ndaan me gdziñnie to me lo gobernador Wech Cesarea.

²⁵⁻²⁶ Dzigo pquiaa me ti guits ne güey zho gdziñnie zho lo gobernador, rneew:

“¡Diuzh Gobernador Wech!

’Naa nac Claud Lisias, laa naa rxel guits rii lo luu gzodiidz naa ganle zha nacne bnabey naa ziaadsan zho meñ qui zaatne zob luu i.

²⁷ Zha Israel bnaaz me gocladz zho niut zho me, laa zeene gocnan naa zha Roma nac me nacne pxeeaque naa zhaguiib güeyla me lo zho. ²⁸ Gocladz naa niacnan naa dien zha nacne rlëenie zho me, dzigo biane naa me lo zhiwxtis zho. ²⁹ Ga goñ naa led ncuaane rnad rlëenie zho me; tel zha nac xley zho ncuaan co rlisqui zho; nacda ncuaane guiab ne rieguial guet me, tsogyugaa me ladzguiib. ³⁰ Zeene gocnan naa laa palal zho bnediidz gut zho me, nacne bnabeyaque naa ziaadsan grë meñguiib qui me lo luu i. Niiclegaa zha ne rlëenie mew, laa naa rep lo zho guiaad zho lo luu i, zeena i gnë zho dien zha nacne rlëenie zho me.

’Lëöd bii gdzieel ne sca dien.”

³¹ Zeene laa liu pcow, zig rlozh xtseew laa grë meñguiib co pcaanie Pabl nëz; dib guieel bio zho

něz bdzi_nnie zho me guiedz Antípatris. ³² Biini liu, loxaque zha ne zob guay ga pcaa něz zienie zho me Cesarea, laa grëraa men_guiib co wbire bdzi_n Jerusalén stib.

³³ Ze_ene bdzi_n zho Cesarea, bdeed zho guits ne zienie zho ga lo men_n ne nac gobernador, dzigo laa zho psan_n Pabl ga.

³⁴ Blozhse blab me lo guits co, dzigo bnabdiidz me lo Pabl die_n pa guiedz gol Pabl. Dzigo rëbchaa Pabl lo me, zha Ćilis nac Pabl.

³⁵ —Nasca —rëb me—, ze_ene laa zha ne rlëenie luu glanso nu, dzigo yquiaadiag naa die_n zhapaa nac xti_l to.

Dzigo bnabey me, pquianap men_guiib Pabl za-atne nac len_n yulow Herod.

24

Gocredz Pabl lo gobernador Wech

¹ Ze_ene goc gaay ngbidza, laa Ananí men_n ne rnabey lo pxoz bdzi_n ga, gza me blalaa zha ne nac zha non lo men_guiedz Israel, zienie zho ti licenciad lë Tértulo; grë zho laa zho zie zienie zho diidz lo gobernador pe nacne rdil_nie zho Pabl.

² Dzigo bnabey gobernador gocredz Pabl. Ze_ene laa Pabl bdzi_n, psilo licenciad co bzeet me grë ncuane rquiaqui zho Pabl, rëb me:

—Xquizhdoo luu gon_n gobernador, ne squitaa ndzielguic luu rien_n luu zha gnabey luu, gane zaacse mban men_ladz no niina, blactaa ncuane yquiin lo no noyun_n luu. ³ Rzac zdoo now, tel_n pa lotaa zo no rsoladz no luu nac luu men_n ne rnabey no. ⁴ Nli nonguielda dziu_nneed no luu,

per been ti guielnzaac pquiaadiag ganle pe nac ncuane rlisqui no quiayun mgui ne zo lo ne nu.

⁵ 'Masaque nac me lo no zig nac ti guielguidz dox ne rded, grëse guiedz quianzë me noyungüet me menladz no gacndaan zho lo men ne rnabey no. Lëë me ga zo lo grë zha ne rnee zho nazaren.

⁶ Zeene bgaa me, lëëtaque laa me no len yadoo ro ne zob Jerusalén quiayunguzee me xyadoo no. Nacne gocladz no gagazh nguizh me falt co zigne rnabey xley no; ⁷ per biaad Lisias grë xmenguiib me ntseeb rac zho biaadla zho me lo no. ⁸ Na nagon zac luuzhal yquiep me, zeena gan luu ganle nli quiayun me grë mine rnee no nu.

⁹ Grë zha Israel ne zienal ga, pquiabbe zho rëb zho nli quiayun me grë min co.

¹⁰ Dzigo blunia men ne nac gobernador ga lo Pabl gnee Pabl; nacne psilo Pabl bnee me rëb me:

—Nanle naa ziele iz zob luu nu rquiaadiag luu grë ncuane rac xtan no nu, gane rley naa zial naa lo luu par yquiaadiaggaa luu ganle zha nac xtidz naa.

¹¹ 'Na rac tsiipchop ngbidz ga bdzin naa Jerusalén, biagan naa Dios len yadoo nroob ne zob ga (niicle tel niaca mine grieë diidz ganle).

¹² Laa naa bia Jerusalén biagan naa Dios, choot biatilnied naa ga; niicle len grëragaa yadoo wina, ro nëzgaaw, waltaa noquiild naa miech cho lo gactseeb zho. ¹³ Grëse mine rquiaqui grë zha qui naa grielod glu zho nliw, sac led ncuane gocda.

¹⁴ 'Mine nac diidzli, niina wriin psan Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanal naaw, dib zdoo naa quiayun naa dziin

lo Dios men ne bliladz pxozgol no; ni scaquegaa, noxco naa grëse minë nac ley. Rliladz naa grëse minë bnee grë zha ne biadteed xtiidz me. ¹⁵ Rliladz naa zdziñ dze ne cueeban Dios grëse miech, zigtaa zha wena zigtagaa zha ntseeba, ni haxta zha ye zho rliladz min co. ¹⁶ Ni min copaa nagon gane tibaque noxco naa guiaanmbe zdoo naa, guntaldraa naa xtol naa zigtaa lo Diosa zigtagaa lo samiech naaw.

¹⁷ 'Nod naa Jerusalén tibaque, blale iz goc no naa ladz menzit; dze ne bdziñ naa Jerusalén ga, laa naa bia porne zasañ ti gon lo menladz naa ni zanie naa ti gon ne gded naa lo Dios. ¹⁸ Min co nagon nacne no naa len yadoo zeene gon grë zha qui naa. Blozhle ben naa grë minë rnabey xley no rdziuun no zeene sca riosañ no gon, zeene laa bla zha Israel ne no nëz Asia blanso lo naa ga; per choot miech taf ndxienied naa ga, niicle choot noquiildgaa naa. ¹⁹ Zha co nagon riegual niaad nu, nlisqui zho tel pe ncuaane rzac zho nonguield noyun naa ga. ²⁰ Zha ne ndxieggaa nu niina, zac gnë zho telne brieequia falt ne rquiaqui zho naa zeene gocredz naa lo wxtis Jerusalén. ²¹ Te goon falt ga naye ben naa, lëë gdib nguiedz bne naa lo zho rep naa: "Laa naa racredz lo to, zig nac zeene falt ga rap naa loxaque ne rliladz naa zdziñ dze ne grieeban miech." Scase nagon naca.

²² Nanle gobernador co led ncuaane gund zha ne rliladz Jesús ga rquiaqui zho Pabl, dzigo bnee me lo zho cuëz zho nieeda gdziñ Lisias, dzigo dien zhapaa guiaan xtil zho. ²³ Bnabey me zha ne zo lo menguiib yquianap zho Pabl, ni pso me diidz zaacse gac zho lo Pabl, gdeed zho diidz ted grë zha

ne ndzieeldiidz Pabl tsiegan zho Pabl.

²⁴ Goc blalaa ngbidza, bnabey gobernador co gocredz Pabl lo me grop tsiel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús. ²⁵ Zeene bzeettaa Pabl, zha nac guielwxtis, zha none tsoxco miech gund zho mine riaabtaa guic zho, ni zha gdziñ dze ne gun Dios guielwxtis, dzigotaa laa me bdzieb, rëbchaa me lo Pabl:

—¡Lëëlewga na nadien! Na zeene guioba, dzigo naazhal cuedz luu guiaad luu zidiidz ne stib.

²⁶ Zhiga zhiga rbedz me Pabl, sac quiambëz me dien pe gdziibd Pabl dimi csilaa me Pabl.

²⁷ Zeene goc chop iz sca no Pabl ladzguiib ga, laa Wech brieë guielgobrador, bzëëb ti men lë Pons Fest. Niicle brieë Wech per psilaad me Pabl, sac racladz me dien zha guianñziuuraa me lo grë zha Israel.

25

Güeyzo zho Pabl lo gobernador Fest

¹ Zeene goc tson ngbidz bdziñ Fest Cesarea pcaania me guielgobrador, laa me brieë güey me Jerusalén.

² Grë zha pxoz non ni grë zha ne rnabey lo menguedz Israel, zeene bin zho laa Fest bdziñ Jerusalén lëëlëd güey zho lo me güeyxob zho xdemand Pabl; ni ³ bnab zho lo me cxeel me Pabl Jerusalén. Laa zho rnab min co sac laa zho bnedidzle, nëz tsiesoblan zho, yquiambëz zho ted Pabl gut zho Pabl. ⁴⁻⁵ Per bdeete Fest diidz, rëb me laa Pabl nole ladzguiib ga, tel zha ne zrieelo tsie, ga glisqui zho tel pe nac falt ne rquiaqui zho Pabl;

benque z_lase dze laa me gbiire guey nēz co dzigo zac tsienal_ zho zhits me.

⁶ Ndziib_sraa ti zhmal blēz me Jerusalén ga, dzigo laa me biire zey Cesarea. Zna dze bdziñ me bi-inigazh liu co güey me yulow, bnabey me gocredz Pabl. ⁷ Laa grē zha Israel ndxiele ga, wbig zho lo Pabl ndal grē falt nroob ne rcaadzdo_l_ zho me, per loxaque diidzsew, guiēnd zha glu zho ne nlipaa goca. ⁸ Dzigo pquiab Pabl rēb Pabl:

—Grētaa mine rquiaqui zho naa i, ni tiba nlid. Wlaltaa gard quits naa xley no, gard quitnie naa xyadoo no, niicle gardgaa gacntseeb naa lo zhiwx-tis zha Roma.

⁹ —¿Pe racladz_d_gaa luu tsie luu Jerusalén? —rēb Fest—. Ga gbiire yquiaadiag naa xtil_ to i zeena glu dien_ chopaa rap do_l_.

Sca rēb me, sac racladz me dien_ zha guiañnziuu me lo grē zha Israel. ¹⁰ Dzigo rēbchaa Pabl:

—¡Gad naa! ¡Nod pe nac ga naa ga, to riegual_ gun_ guiel_wxtis rii! Benque nan_ wen luu gan_ le peet falt nzēēbd naa lo zha Israel. ¹¹ Tel_ niaca mine nli ziyun_ naa pe guiel_ntseeb ne raguiāl_ naa guet naa, maase guet naa. Per na nan_paa naa ni ti ncuaane rquiaqui zho naa i nlid, ¿pe nac dzigo cho co naa ladznia zho gut zho naa? Laa naa racladz, mazd gol_needz diidz tibaque ga naa lo zhiwx_tis nroob ne, men_ ne zob Roma.

¹² Dzigo bzodiidz Fest grē me men_ rac ne nacie me dziin; blozhse ga rēbchaa me lo Pabl:

—Guiēnd rson sca. ¡Tel_ lo César racladz luu tsie luu, na maase tsie luu!

Gocredz Pabl lo Agrip

13 Zeene goc bla zhmalá, laa rey Agrip grop wnaa ne lë Berenis bdziñ Cesarea ga güeyquiaabdiuzh me Fest. 14 Nzianlaa ngbidz blëz me ga, dzigo bzodiidz Fest lo me laa Pabl sca no ladzguiib ga, rëb Fest:

—Len dze ne bii nac Wech dziin biab ti mgui ladzguiib nu, 15 laa len dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me. 16 Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli miñe rquiaqui zho me togo nlidgaaw; 17 nacne biaad zho nu. Zna dze blanso zho, biinigazh liu co bnabey naa gocredz me. 18 Tibaque ni naa bod no pe ti falt nroob ne rquiaqui zho me, per zeene biaad zho yulow gon naa 19 lëë gdib tel zha nac grë ncuaane rliladz zho miñ co rlisqui zho, ni rlisqui zho pe nacne zienal me zhiwseed ti mgui lë Jesús, gutle men co ni laa me rnee mban me.

20 Zeene gon naa grë ncuaan co rquiaqui zho me nli riend naa zha gun naa, dzigo rep naa lo me, telne racladzga me zac tsie me Jerusalén ga dien zha guiaan lo xtil zho. 21 Per bnëd me, lel bñab me tsie me lo César; gane niina laa me bii no i, nieeda gne naa lo César dien pa hor grieelo cxel naa me nëz co.

22 Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegazh gnabey naa gacredz me.

²³ Biini liu, ti lni nroob ne rac laa Agrip ni Berenis bdziñ leñ yu ne rac guielwxtis ga, grë zha non ne rnabey lo menguiib, grë zha non lo menguedz, nañ zho zhits me. Dzigo bnabey Fest gocredz Pabl, zeene laa Pabl bdziñ ²⁴ laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrë ne nu nadze, golwi ganle lëë men rii nagon rlëëniedox zha Israel, racladz zho guet me; zigtaa Jerusaléna zigtagaa nuw ziyaadnab zho lo naa gnabey naa guet me. ²⁵ Sangue naa gonle naa rapd me falt, par guiab ne riegual guet me; per laa me bnab tsie me lo César, na laa naa no cxel me nëz co.

²⁶ Nli rienñ naa dien pe nac diidz ne cxel naa lo César, ne squi lega ncuaane nlid rquiaqui zho me. Min co nagon bnabey naa gocredz me lo to nu, ni laga laa luu ziaadгаа nu rey Agrip, bzhiguiel pquiaadiag ganle zha rzë xtiidz me; zeena togo zdzziel naa pe nac diidz ne cxel naa gal dze ne laa me tsie nëz co. ²⁷ Sac nonguield ga gun naa telne sobdoo me cxel naa me, ni tel cxeld naa diidz dien pe nac xfalt me!

26

Bnee Pabl lo Agrip

¹ Dzigo rëb rey Agrip lo Pabl, mezhah gnee dien zha naca. Nacne blis nia Pabl psilo Pabl bnee Pabl rëb Pabl:

² —Rley naa gon rey Agrip ne laa naa zial lo luu nadze, zeena gzodiidz naa lo luu gacnan luu ganle nlid grë ncuaane rquiaqui grë menladz naa naa.

³ Rley naa sac nan naa nanpaa luu zha nac grë xcostumbr no, grë ncuaane rliladz no. Rnab naa

lo luu sca, guieete luu yquiaadiag luu grë miñe gne naa!

⁴ Grëse zha Israel nan wen zho ganle zha mban naa, sac mëedlas naa bdziñ naa Jerusalén, ga broob naa. ⁵ Nanpaa zho zha farisé goc naa, ni zha farisé nac zha ne rioxcoraa run grëse miñe rliladz zha Israel. ⁶ Per mazd gon, laa zho rlëë lo naa porne dib zdoo naa rliladz naa laa Dios beenle miñe psan me diidz lo grë pxozgol no. ⁷ Grëse zha Israel, zigne ziaad zho lo gza tsiipchop dii ne psan xmengol no, grëse zho dze guieel bii quiambëz zho gac miñ co. jMasaque rzac zho dol ga quiayun naa rliladz naa laaw gocle! ⁸ Haxta to, zeene rzet naa zrieeban miech, rzhidz to ron tow, ¿pe rzac to naa grieelod Dios gun me miñ co?

⁹ Glo nli ptsidil naa grë zha ne rliladz Jesús men Nazaret, masaque rzaac naa lëew ga quiayun naa. ¹⁰ Pe zhidaa zha ne blo naa ladzguiib Jerusalén, haxta grë pxoz non bneedz diidz ben naa grë miñ co; ni zeene rnabey zho ret grë zha co, ye naa rded diidz ret zho. ¹¹ Nzian grë yadoo win bia naa, biasacsi naa zho haxta gneenë zho Jesús. Blëeniedox naa zho, haxta grë guiedz zit bia naa biaguib naa zho.

¹² Miñ copaa nagon brie naa za naa guiedz Damasc, masaque grë pxoz rnabey bneedz ti xti-idz zho bi naa laa naa za. ¹³ Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nëz zhan gbaa biab lo naa, ni lo grë zha ne zanie naa ga, nroobraa nac biini co lo xbiini ngbidz. ¹⁴ Grëse no biab liu, dzigo bin naa ti tsi men co rnee me xtiidz no, bredz me naa në me: “Saul, Saul, ¿pe nacne quiana luu

naa? Lëëque luu gon nosacsi luu i, rzac luu zigne rzac ngon ne rcaanni, ni lëëque lo guuib lots ne rtseb zho ma riecaanni ma.” ¹⁵ Dzigo rep naa: “Been guieInzaac bnë dien cho luu.” Nëchaa men co: “Naa nac Jesús, men ne squi quiatsidil luu. ¹⁶ ¡Na zeena guche i, bzoli! Laa naa bredz luu zeena gun luu xtsin naa, tsiezodiidz luu lo miech mine blozh bzhaac luu nu, ni grëragaa mine naraa gan luu. ¹⁷ Peet tsienied guic luu, naa yquianaap luu, niicle zhaladz luuw niiclegaa zha zita peet grielod gun zho luu. Sac laa naa cxel luu grë guiedz zit ¹⁸ tsienee luu lo miech gacnan zho mine nacpaa diidzli, zeena griece zho lo ncow gbig zho nëz lo biini, griece zho lадznia mendox ygab zho lo Dios. Dib zdoo zho gliladz zho naa zeena gun Dios zho perdon, ni ygaa zho zaatne gdzin grëse zha ne mbe zdoo.”

¹⁹ Min co nagon rey Agrip nacne bioxco naa ben naa mine në men co lo naa ga. ²⁰ Glose Damasc psilo naa bne naa lo miech, ga brie naa bdzin naa Jerusalén, bia naa dib Judé ni grë guiedz zit, bne naa lo miech csaan zho grë xquieIntseeb zho gbig zho lo Dios.

²¹ Min co nagon nacne rlëënie zha Israel naa, biadnaaz zho naa len yadoo ro ne zob Jerusalén, gocladz zho niutgazh zho naa. ²² Gocniën Dios naa, gane laa naa bii zo nu quiane naa Xtiidz me zigtaa lo grë zha wina zigtagaa lo grë zha nona. Noseete naa miech stib wseed, sinque laa naa rne mine bzeetaque Moisés ni grëragaa zha ne biadteed xtiidz Dios padzeela. ²³ Tel zha, bzeetle zho ib sacsi miech men ne cxeel Dios ga, ni me gac men ne glopaa grieegan, me gac zig ti biini ne

gziini lo grëse miech, zigtaa zha Israela zigtagaa grë menzita.

²⁴ Tibaque nguiedz bnee Fest rëb me lo Pabl:

—¡Bod rzhinle guic luu gon Pabl! ¡Ne tibaque nagon rio luu wseed gane squi riots xtiidz luu!

²⁵ —Coo, gobernador Fest —rëb Pabl—, led rzhind guic naa. Niapse mine nac diidzli min co none naa, ²⁶ laa rey Agrip zob i, me nan ganle nli grë mine rne naa nu. Tibliladz naa none naaw lo me, sac nanopaa naa nan me nli mine rnee naa, nacda ncuaane goc ngeets zhlian. ²⁷ ¿Led nli lëë rey Agrip riladz luu mine bzeet grë zha ne biadteed xtiidz Dios padzeela? Nanpaa naa riladz luuw.

²⁸ Pquiab rey Agrip, rëb me lo Pabl:

—¡Zlalaque nu gon laa luu cole guic naa ye naa sëëb xnëz Jesús!

²⁹ Dzigo rëbchaa Pabl:

—¡Nend zhilew o nroobragaaw, per rnab naa lo Dios led loxaque luudse sëëb xnëz me, sinque ye grëraa zha ne noquiaadiag mine none naa nu niina; zeena ygaa to mine bgaa naa nu, per led znud sob caden rii nia to!

³⁰ Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho brieega. ³¹ Grëse zho rnee peet xtold Pabl, rapd me falt ne guiab ne riegual guet me, riegualgaa tso me ladzguiib.

³² —Niapaa nsilaa ne me —rnee Agrip lo Fest—, telne nabd me tsiepaa me lo César.

27

Pxeel zho Pabl nëz Roma

¹ Bdzin̄ dzew, laa Fest bnabey tsie Pabl n̄z Roma, dzigo laa zho psan̄ Pabl lадznia ti men̄ ne rnabey lo men̄guib l̄e Jul, gza Pabl zlalaa zha ne no ladzguib ga. L̄e Jul co rnabey lo tib dii men̄guib ne rnee zho “Augusto César”.

² Ye no zional̄ zhits Pabl grop no Aristarco, laa no bziaab ti xbarcw zha Adramit zie gr̄e guiedz ne ndxie ro nis n̄z Asia, laa no pcaa n̄z laa no zio.

³ Biini liu co laa no bdzin̄ guiedz Sidón. Zeene bdzin̄ no ga, wen goc Jul lo Pabl bdeed me diidz güey Pabl güeyquiaabdiuzh Pabl gr̄e zha ne runbey Pabl ga, gr̄ese zho rleyne zho me bl̄ezlo zho me.

⁴ Ga brieed no bdieed no tib ro guidzliu win ne l̄e Chipr, psaac guidzliu co palal, sac psilo rrieed me rtsire me barcw ne zio no ga. ⁵ Laa no zio, bdieed no gax ro guidzliu ne nac xtan zha Cilis ni xtan zha Panfil, bdzin̄ no ti guiedz ne ndxie xtan Licia l̄e Mira; ⁶ ga bdzieed no barcw ne zio no ga. L̄eëtaaque noguib Jul sti barcw ne guio no, laa ti xbarcw zha Alejandrí no grieed ga tsie n̄z Italia, dzigo bziaab no barcw co laa no zio stib.

⁷ Tsow ga zie barcw co, nzian dze goca, nen dzig-oraa bdzin̄ no gax guiedz Gnid; ib rb̄ezdaque me, nace bguib zho dien̄ pa n̄z zhi rcaan̄ me, dzigo güeyne zho barcw co n̄z Cret. Tib ro guidzliu win co zio no bdieed no Salmon; ⁸ nen bdzin̄ no zaatne rnee zho Buenos Puertos, gaxle ga riaan̄ ti guiedz l̄e Lasé. ⁹ Nrooble dze goc no no lo nis, len̄ dze co laa m̄e nāl̄ psilole ni z̄eëb diidz gacd s̄e barcw len̄ m̄e co, nace bnee Pabl lo gr̄e zha ne zienie no ga, ¹⁰ r̄eb me lo zho:

—Gol̄gona gan̄le, tel̄ne laa ne grieed nu len̄ dze rii, rgobey naa ib znitlonie ne barcw rii lo nis.

¹¹ Laa ne niacnie Jul Pabl niac mine rëb Pabl ga, le_l mazdraa bliladz me xtiidz zha ne rsëë barcw ni me_n ne nac bizhuana. ¹² Stiba, zaatne nac Buenos Puertos ga rapda zaatne zaacse cuëz miech le_n mëë na_l, nacne nzian zho rëb mazd gdzi_n guiedz Fenice, ga zac gbiaaz no gdipse le_n mëë na_l. Ro guidzliu win co riaan Fenice, nligaa zhi rcaan me ga.

¹³ Zeene laa ti me win ne znu ziaadquia psilo brie_e lo nis co, zootle na nli griedraa me. Nacne lëë_lëd bnabey zho bziaab no barcw, blisglaa zho lar nroob ne rcaan me rzë_w, laa no zio, gax gax ro guidzliu co zienie zhow. ¹⁴ Zhisaque goca zeene laa ti me dox ne rnee zho Nordest psilo brie_e, laa me co psilo rtsire barcw. ¹⁵ Niicle racladz zho tsienie zhow nëz ne no guio no ga, per rsaand me; gonse zho led ncuaane gacda, mazd psaan zho zienie mew nëz ne racladztaa me.

¹⁶ Scale zienie me barcw ne no no ga, biotieed no gax ro guidzliu win ne lë Clau_da, ga në në brieelo blis zho grë canó win ne na_l zhits barcw ga bzëëba nëz le_n barcw; ¹⁷ dzigo blibdoo zho barcw co zeena gb_ilda, ni blit zho lar nroob ne rcaan me rzë_w, sac rdzieb zho rëb zho telne scaquia lar co nend tsieniezhoo mew nëz ro nis, pa tsiesobnagwa lo yuzh.

¹⁸ Zeene biini sti liu co mazdraa rrie_e me, ni guixoo ne ziaadnie me, nacne blee zho grë yo ne no le_n barcw bla_al zhow lo nis. ¹⁹ Goc bion ngbidz scataa zo guie dox co, bnabeyaque zho blee no grëse ncuaane runx_tsiin zho le_n barcw bla_al now lo nis.

²⁰ Goc bla ngbidza rbëzdaque guie dox co, rlu-draa lo mel per ni lo ngbidz rludraa, dzigotaa rdzieets no nlidraa griequiaa no. ²¹ Niicle wagw choot rsoladzdraa, dzigo bnee Pabl lo grë zha ne ziogrë no ga, rëb me:

—Tebaa nion to xtidz naa nagon nzhiguiel to nrieed ne Cret, zeena ndzieelod ne grë ncuanea nodziañ ne nu, niicle nlaaldgaa ne grë yo co lo nis. ²² Per laa ne znule bzhiaac zha dziuunraa ne. ¡Gdziebde to! ¡Peet gacd ne! Niicle nitlo barcw rii, per choot peet gacd. ²³ Led nanle to ganle, xnëz Dios no naa ni xtsiin me noyuna, nieewdze pxeel me ti xanj me ²⁴ në lo naa: “Gdziebd luu gon Pabl, peet gacd luu, sac ib none laa luu gdziñ lo rey ne zob Roma. Niicle grë zha ne ziadgrëe luu len barcw i peet gacd zho, sac bin me miñe rnab luu.” ²⁵ Gane rne naa lo to peet tsienied guic to, nanle naa csaand Dios ne, ible zac miñe në anjl co lo naa. ²⁶ Ib tedsod, no pa ti lo guidzliu win ne no lo nis rii tsiezo me rii ne.

²⁷ Zeene goc tsiida ngbidz sca nëzrii nëzrec zienie me no, laa no no lo Nisdoo Adriático. Wdze co, zig groļ guieela, bien grë zha ne rsëe barcw ga gaxle ti ro guidzliu ga nonie barcw no; ²⁸ dzigo ptiix zho dien palal quiet nis ga, gon zho loxaque gal yas guieta. Bzë zho spalal biire ptiix zhow stib, gale guieta loxaque tsiiptib yas. ²⁹ Gataa laa zho bdieb rëb zho nend pa tsiecaan barcw lo quie, dzigo psilëe zho lo doo ne zob gza tap guiib cruz nroob ne quia nëz zhits barcw, bron zho gza guiib co lo nis, zeena tsowga së barcw; rzac zho tebaa laa liu biinile.

³⁰ Grë zha ne ruñ dziin len barcw, gocladz zho

nzhoon zho, psilo zho noxadz zho grë canó win ne ney barcw, rquiaalo zho zig nac zeene guuib cruz nroob ne ney barcw nëz quiaaw quialit zho csëeb zho len nis. ³¹ Zeene gon Pabla, rëbcha me lo Jul ni lo grë xmenguiib Jul:

—iLaa grë zha rii gon racladz xoon! Csaande to, sac telne laa zho xoon nlidraa grieequia to lo nis rii.

³² Dzigo pchug grë men GUIIB co doo ne zob grë canó win co, bron zhow lo nis.

³³⁻³⁴ Silgaw, bii ncow rnaw laa Pabl bnee lo zho gow zho, rëb Pabl:

—iNone gow to! Golwi ganle nale gac tsiin ngbidz ga ni ti lë peet gard gow to, ni squique raguiesde to zaacse. Peet tsienied guic to, ni tib to peet gacd.

³⁵ Blozhse sca bnee Pabl lo zho, bzhen Pabl ti quietxtil, squi ndxie zho grë zho bdeed me xquizh lo Dios, dzigo beengrol me quietxtil co laa me psilo wagw. ³⁶ Dzigoraa peet güeyniedraa guic zho, ye zho laa zho psilo dow. ³⁷ Lo grë no zig zio no len barcw co rgaa no chop gayoo tsongaltsiimtib.

³⁸ Blozhse bdioow no, dzigo laa zho blee grë zhobxtil ne zie len barcw ga blaal zhow lo nis, zeena gnitnë barcw spalal. ³⁹ Zeene laa liu blozh biini, gon grë zha ne rsëe barcw ga laa ti lë ro guidzliu rlu gax ga, per riend zho dien paw. Natlaa nac ro guidzliu co, rlu zac gdziin barcwa, nace rëb zho dien pe grieelod gdziinnie zho barcw ga.

⁴⁰ Dzigo pchug zho doo ne zob guuib cruz nroob ne no len nis ga, biaanse guuib co ga. Psilëe zho doo ne naaz yag nlag ne rchug nis rzë barcw, ni blisglaa zho lar nroob ne rcaan me rzëw; zeena csëe mew gdziina gax ro guidzliu co.

⁴¹ Per ziese zho, lëetse lo yuzh ne zobli len nis co güeytsiba, loxaque güeysëëbguica ga laa nëz zhitsa psilo nobilaque, sac grëse nis ne rias riecaan choo co. ⁴² Dzigotaa laa grë menguiib co gocladz niut grë zha ne zie ga guey ladzguiib, rëb zho nend znuse xoobnis zho xoon zho. ⁴³ Per bdeete men ne rnabey lo zho diidz, sac racladz me gut zhō Pabl. Mazd bnabey me zha ne rac rzhoobnis, zac ner zho xoobnis zho grieequia zho ro nis co; ⁴⁴ laa grë zha ne gacd xoobnis, zac maase grë yag biats ne nobil barcw xoobnisnie zho. Sca bdeeda diidz brieequia no ro nis grëse no.

28

Blëz zho Malt

¹ Zeene bdzin no ga, dzigotaa gocndion no lëe guidzliu win ne lë Malt ga. ² Grë miech ne no ga pquiadox zdoo zho no, bzëëg zho gui bredz zho no bdzëë no, sac lala rac nal ni scataque bgaa no guie.

³ Ye Pabl güey güeytop chop lë yag ne cuib lo gui. Lëëtaaque laa me nodziiba lo gui, tibaque bias ti meel ne zizhoon lo zhindzëë gui co, pquiaalay ma nia me, quiataque ma ga. ⁴ Grë miech ne no ga, zeene gon zhow rneechaa zho:

—Ise nagon rlu, nzëëb men qui ngutoo! Niicle blaa me lo nisdoo, per no guie lwxtis ne quianab guet me.

⁵ Znuse bdzib Pabl nia me bron me meel co lo gui. ⁶ Grëse zho rwi quiambëz zho dien pa hor sigui me, te tibaque tsobe me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

⁷ Gaxaque ga quia tib lë liun̄ meñ ne rnabey lo guidzliu win co lë Publ, dzigo bneedz me zaatne bliaaz no ga tson̄ ngbidz ni bneedz me ncuaañe bдиоow no.

⁸ Lëëtaaque len̄ dze co laa pxoz me nix rlan xlëë ni yoobchen. Dzigo güeynee Pabl lo me, bnab Pabl lo Dios guiac me; blozhse bnab Pabl lo Dios, pxobnia Pabl guic me, laa me biac. ⁹ Zeene bin grë miech cow, zha ne rzacnëtaa riaadnie zho zho lo Pabl, run̄guiac Pabl zho. ¹⁰ Dzigo rleynie zho no, nroob grë ncuaañe bgad zho lo no. Zeene goł dze ne laa no wbii ga, scasaque nroob ncuaañe yquiin no nëz bneedz zho.

¹¹ Tson̄ mëë bliaaz no lo guidzliu co, dzigo laa no brieë ga bziaab no ti len̄ xbarcw zha Alejandrí, ti barcw ne blëz ga dipse len̄ mëë nal̄ co. Guic barcw co quia chop mdio, mdio ne rnee zho Cástor ni mdio ne rnee zho Pólux. ¹² Bdziñ no guiedz Siracús, ga bliaaz no tson̄ ngbidz. ¹³ Siracús brieë no, gax gax ro guidzliu zio no bdziñ no guiedz Regio; biini liu in̄e zhoob ti me ne ziaadquia lo nis co, dzigo laa no brieë Regio laa no zio. Biiniraa sti liu bdziñ no guiedz Puteoli, ¹⁴ ga bdziñ no lo blalaa zha ne riladz Jesús. Bnab zho lo no gbiaaz no, nacne bliaaзаque no lo zho ga ti zhmal. Garaa brieë no bdziñ no Roma.

¹⁵ Grë zha ne riladzle Jesús Roma, zeene bin zho laa no gdziñ ga, brieë zho biaad-xinëz zho no. Zhis zho biaddzieel no zaatne lë Foro de Apio, szhis zho biaad zaatne lë Tres Tabernas. Zeene gon̄ Pabl scataa biaad-xinëz zho no, rley me rdeed me xquizh lo Dios.

Bdziñ Pabl Roma

¹⁶ Zeene bdziṅ no lad guiedz Roma, bdeed zho diidz Pablzhal bguib ti yu ne blöz me grop me menḡuuiḡ ne quianap me, blood zho me ladzguuiḡ.

¹⁷ Goc tsonṅ ngbidz bdziṅ no ga, dzigo bredz Pabl grē zha ne nac zha non lo zha Israel ne no ga. Blozhse pcaalsa zho, rēbchaḡ me lo zho:

—Laa naa bredz to nu gonṅ bets, gacnanṅ to ganḡle laa grē zha ladz ne bnaaz naa Jerusalén, güeyzo zho naa lo zhiwxtis zha Roma rnab zho guet naa, per gneli naa lo to ganḡle, peet bend naa lo zho, ni ti zhiwseed xmenḡol ne bditsd naa. ¹⁸ Niicle wxtisgaaw, blozhse pquiēp zho naa gonṅ zho raapd naa falt, nacd naa zha ne rieguialḡ guet; dzigo gocladz zho nsilaa zho naa.

¹⁹ 'Per zeene gonṅ naa nēd menḡladz ne csilaa zho naa, nacne bnabaque naa ziaadnie zho naa lo César nu. Miṅ co nagonṅ nacne zialḡ naa nu, ziald naa cto naa menḡladz ne o cteedquiegaa naa zho.

²⁰ Wen ne laa naa beenbey to nagonṅ, ni beenbeygaa to naa; gacnanṅ to sca ganḡle laa caden rii zob nia naa, per nacda por pe falt ne rap naa, sinque laaw zob nia naa porne rliladz naa laa Dios pxeelle menṅ ne quiambēz menḡladz ne ga.

²¹ Dzigo pquiab zho rēb zho lo Pabl:

—¡Wlaltaa, ni ti guits ib gard cxeelḡ menḡladz ne lo no zaatne gzeet zho luu! Niiclegaa grē zha wladz ne zilanso nuw, rneed zho laa luu noyūṅ pe guielntseeb. ²² Per na laga laa luu ziaad nu, siguielḡ luu sodiidz luu lo no dieṅ zhapaa nac wseed ne rliladz luu i, sac blactaa zidzion no, zaatne notaa zha ne rliladza rlēenie miech zho.

²³ Dzigo pso zho ti dze ne tsie zho.

Zeene gol dze co, nzian zho pcaalsa zaatne rbëz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lëele meñ ne nac diidz cxeel Dios ga nac Jesús; blu me lo zho grëse zaatne zhobneew, zigtaa lo grë miñe pquiaa Moisésa, zigtagaa lo grë miñe pquiaa grëraa zha ne biadteed xtiidz Diosa. Dipse dze sca bzodiidznie me zho grë miñ co.

²⁴ Brieequia bla zha ne bliladz grë miñe bnee me ga, ni scaquegaa brieequia zha ne bliladzda.

²⁵ Grë zha ne riod zdoo miñe rnee me ga, laa zho psilo noriee, nacne rëb me:

—Ib lëepaa miñe nac to i ga nagon bzeet Espíritu Sant, zeene psiaab me guic profet Isá znu rëb Isá
²⁶ lo grë xmengol to:

Niicle peraa gon to, niicle peraa gan to,
per peet guiende to;

²⁷ sac gocntseeb zdoo to.

Zob diag to, ni peet ronde to;

zob lo to, ni peet rande to.

Ncow nac guic to,

gane peet ronde to, peet rande to;

niicle rioxcodgaa to gbig to lo naa zeena csilaa naa
to lo xtol to.

²⁸ Golgacnan sca ganle, miñ co gane laa Xtiidz Dios quiagaaz lo grë miech stib guiedz, ni zhasi gon noliladz zhow.

²⁹ [Zeene gon zho sca rëb Pabl mazdraa blëe zho, nodildiidzlsa zho laa zho zey.]

³⁰ Dipse len chop iz blëz Pabl ga, ga bree me ti len yu ne bio me. Ga rdziñ grë miech ne zienee lo me,

³¹ zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho

nac Jesús. Dipse len̄ dze co, ib biod zha ne ntsidil̄
pe nacte sca noseed me miech.

**Diidz ne rdeed guielmban
New Testament in Zapotec, Mixtepec
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 22 Feb 2024 from source files
dated 29 Jan 2022

5317ca58-7555-5e4c-a420-e1e9210e2df2